

## **Suão Sesus soho wasaniha ziwatahaka**

Suão Sesus tuk zinymyrykyta. Taparaka Tsiaku iziky tazo tuk iwatsa piknutsa tahatõhõryk humo ziknasizokonaha, iwaze ustsã kytsã piknutsã nisbykyknaha. Sesus ziaakzoze tazo zerekik ituk niukuru. Sesus tazo bo ziksizoze Deus hyrikoso ituk niapykyryk iwatahi papeu humo Sesus soho ziwatahaka iwatsahi katsã kino niwatihi tanymyryky.

### *Suão Sesus wasaniha soho ziwatahaka.*

<sup>1</sup> Tapara mybarawy isuknihybyize Sesus Kiristu my. Atahi koikny baktatu Deus. Inaro kino ana zuba – Deus harere baba zuba – hÿ. Tapara bijoikpe wytyk nizukni – Deus harere baba zuba – nikara. Atahi Deus tihi nikara. Deus koikny baktatu nikara. Iwa tapara nikara.

<sup>2</sup> Iwa tapara Deus koikny baktatu. Atahi – Deus harere baba zuba – niwatihi. Deus tuk atatu nikara hÿ.

<sup>3</sup> Deus nanabyi nizukni ihumo hi. Nanabyi nizukninaha ituk tu nikara.

<sup>4</sup> Tazikwy humo tsizubarẽna mykara. Tazikwy humo myzubaha myspitu tsimykarãna. Myzubaha nisihyrinymyryky. Wasaniha ty hi sibo ziwatawyky. Hawa myzubaha amypubyriha bo iktsã mykarãna iwa Sesus myzubaha nisihyrinymyryky. Sihyrinymyrẽtsã moziknaha. Atahi rika wata niy.

<sup>5</sup> Rika miwa haeze pok maha zeka amypubyri mozik. Iwaha hi – Deus harere baba zuba – myzubaha bo nisihyrinymyryky iwatsahi ihumo sispirikporëtsa moziknaha. Iwatsahi wasania ty nimyhyrinymyrykynaha rika ty hopok my tawa. Myzubaha simysopyksapybyitsa nikaranaha. Asahi wasani haty batu ziknakaranaha. Wasaniha ty – Deus harere baba zuba – nisihyrinymyryky, atahi rika ty pok maha tawata.

<sup>6</sup> Aiba Deus maku myzubaha bo zipaha. Suão inarokota niy.

<sup>7</sup> Deus sohotsa zumuze Sesus mybo ziwatawy. Sesus – Deus harere baba zubata – hÿ niy. Iwaze Sesus amypubyriha hyritywa kytsa bo ziwatawyky iwatsahi kytsa Deus harere bo hyÿ mykaranaha.

<sup>8</sup> Suão byitatu – Deus harere baba zuba. – Isoho tsasohotsazubata nitsasoko. Ata soho hi ziwatawyky. Myzubaha pe nikara:

<sup>9</sup> – Deus harere baba zubata hi mozumuze pahahyrinymyry. Mybarawy bo mynasikze myzubaha Deus harere ty mysihyrinymyry iharere amypubyriha hyritywa my – Suão niy.

<sup>10</sup> Iwaze mybarawy bo inasik. Myzubaha bo zumu. Tapara mybarawy nizukni. Ata hi izumu. Iwaze mybarawy ezektsa ihumo batu sispirikpo. Tsimysapyrëta tu mybarawy ezektsa ihumo batu sispirikpo.

<sup>11</sup> Tatukytsa bo izumu. Sudeja ezektsa tatukytsa bo izumu. Asa kino niwatihi ihumo sispirikpo byitsa nikaranaha.

<sup>12</sup> Wastuhu ihumo sispirikporëtsa. Iwatahi ispe niy:

– O ikiahatsa Deus tuktsa tsimoziknaha. Kahumo tsimyspirikponahaze Deus tyryktsa tsimoziknaha. Deus hyrytsa tsimoziknaha – niy.

<sup>13</sup> Deus hyrytsa niyziknaha. Aparakbaha wytykyryk ikny nipupurukuknaha. Kytsa wytykyryk niwatihi isty tyrykzuwy naha humo nipupurukuknaha. Kytsa aba ziknakaranaha iwatsahi sihyrytsa nipupurukuknaha. Deus hyrytsa meky watu. Deus ispe:

– O ikiahatsa kahyrytsa tsimoziknaha. Iki-ahatsa Sesus harere bo hyŷ tsimykarannahaze ihumo ahaspirikporëtsa iwatsahi kahyrytsa tsimoziknaha – my. Iwa Deus tahyrytsa soho mot-sasoko.

<sup>14</sup> – Deus harere baba zuba – mywata niyzik. Sesus Kiristu maku babata niyzik. Ata zuba Deus tse. Atahi mybo inasik. Mytuk zikzuruku niy. Kytsa tuk ziknapykyryk. Sesus Kiristu sihumo tsimypokzitsiarëta ziknakara, nisitsumuëhĩ tsihikik tsimyzihikrëta wasania ty nisihyrinymyryky. Deus harere ty nisihyrinymyryky. Isoho tsimaha:

– O atahi imysapyrënikita ipunihikrënikita – tsimaha.

<sup>15</sup> Suão Batista Sesus soho ziwatawyky iwatahi myzubaha bo hua nikara. Atahi:

– O Sesus imysapyrënikita. Utakta batu. Atahi tazikwy tsizubarëna my. Utakta batu. Kazikwy tsikaeni zuba. Uta kapurukbyizetu atakta koikny baktatu mykara. Tawahi koikny baktatu my.

<sup>16</sup> Katsaktsa mysopyksapybyitsa tsimykarannaha. Sesus myzibytuhukutu mymysapywyky. Katsaktsa mysopyksapybyitsa

tsimykaranaha atahi myhumo tsimypokzitsiarêta my, iwatahi myzibytuhukutu mymysapywyky hÿ.

<sup>17</sup> Tubabatu Moises Deus harere ziwatahaka. Ana harere humo hyÿ tsimykaranahaze, wasani tsimaha, Moises niy. Sesusta mype niy:

– O ikiahatsa humo kamypokzitsiarêta. Ahasopyksapybyitsa tsikykaranaha iwaha humotu Deus ahahumo tsimypokzitsiukrêta.

Deus harere ty nisihrinymyryky.

<sup>18</sup> Ba aty tohi Deus iny. Ikatahi itse zuba ziny. Ata Deus ihumo tsimypokzitsiarêta. Atahi mybo inasikze, mytuk zikzuruku iwatahi Deus mybo ziwatawy – niy.

*Suão Batista isoho nitsaso.*

<sup>19</sup> Iwaze kytsa Sudeja ezektsa taparaktsa ziknapamykysokonahatsa sistsumuêhÿtsa iwatsa Suão Batista bo kytsa nisipeha. Aty skaraba ikia Suão Batista pe taha. Iwaze Suão Batista bo zumunahaze asahi:

– Aty skaraba ikia. Tozeka ja ikia Deus zapehata. Tozeka ja usta ja. Katsa batu myhrinymyry – nikaranaha.

<sup>20</sup> Iwaze Suão tihi:

– O batu. Utakta Deus humo kapehabyita atahi kytsa mymyokhyrykta – niy. Iwa nitsasoko.

<sup>21</sup> Iwaze kytsa ipe niahazo:

– Aty skaraba ikia. Ikia hi sa Erias – niaha.

– Erias byitatu – niy.

– Ikia hi sa Deus sohokotsa – niaha. – Tubabatu Moises nitsaso Deus sohokotsa mozumu. Ikia hi sa isohokotsa – niaha.

Batu niy.

22 – Iwaze Suão pe niaha mypetykta aty skaraba ikia. Katsa mybo tytsasokta iwaze taparaktsa bo tsimaha. Hawa ikia soho mytsaty tsimykaranaha. Tsinymyry tsihikiknaha – nikaranaha.

23 Suão tihi:

– Utakta jerukbara eze hua mykara niy. Opykani motsasoko. Hawa Isaijas Deus sohokotsa tubabatu ziwatahaka atsatu mynakara. Deus harere tsiwabyziukunahaktsa. Iharere bo hyÿ tynakaranahaktsa kytsa mykara – niy. Iwa Suão niy.

24-25 Kytsa zumukunahatsa Suão pehatsitsa, Pariseutsa maha. Ipe niaha:

– Ikia Kiristu byitatu Erias byitatu. Deus sohokotsa byitatu tsiky. Iwatatu sa kytsa pihik ty tsimysiharasusuku – niaha.

26-27 Suão ispe niy:

– Utakta pihik ty kytsa mysiharasusuku. Usta ahatuk mykarata. Aba ikiahatsa batu ahany hÿ. Utakta Deus harere ty pahahyrinymyry. Abahi ata kino niwatihi pahahyrinymyry. Izikwyrënikita. Utakta tsikaeni zuba kahyrinymyrytatu. Atahi tsihyrinymyrëta hÿ utakta batu. Iwaze utakta ihumo kasikpybyrëta. Ipyryksuktsa mysibokik zeka kasikpybyrëta mozik utakta iwabyita tu my. Atahi imysapyrënikita iwatahi utakta kasikpybyrëta – niy.

28 Iwa Suão nitsasoko. Kytsa asahi ibo izumukunaha iwa nitsasoko. Betanija eze nisiharasusuku. Betanija koiknykta sak eze buburu Sorodão inarokoha.

*Deus hozipyrykza wata izumu.*

<sup>29</sup> Byi izokorozoze iwaze Suão Sesus bo nikoze jokeryk inaukuru. Iwaze Suão kytsa pe niy:

— Iktsaziutahaktsa kytsa. Ta maku bo iktsaziutahaktsa. Atahi Deus izipehata. Ziknapamykysokonahatsa hozipyrykzatsa ziknasibakanaha kytsa sisopyksapybyitsa ziknakaranaha, sisapyzeken hozipyrykzatsa ziknasibakanaha. Iwaze Deus sisopyksapybyitsa nikaranaha nisiokzohik. Nawa ata kino mysapyzeken mohyrikosokda. Mysopyksapybyitsa tsimykaranaha atahi mysapyzeken mohyrikosokda. Hozipyrykzatsa watsa — Suão niy. Sesus soho iwa nitsasoko.

<sup>30</sup> Tapara isoho iktsasoko. Ahape iky: — Atahi izikwyrënikita ana hi iwaby niy. Uta batu. Kazikwy tsikaeni zuba. Utakta kapurukbyize atakta niwata tu atahi koikny baktatu. Tawahi mynapykyryk — iky.

<sup>31-33</sup> — Sesus tsimysapyrëta izikwy tisapyrëna. Taparaka batu kahyrinymyry. Aba kahyrinymyrëta. Tapara Sesus zikwy ty batu tyny. Jatu tu Deus zikpeha:

“Myzubaha tysiharasusu” niy ana humo hi zikpeha. Myzubaha pihik eze iksiharasusuku.

Deus zikpehaze tihi: “Atahi tsimysapyrëta izikwy tsizubarëna tsipiny” niy. Iwa tsipiny.

“Utakta kahyrikoso myzipeha. Kahyrikoso mynasik amyttudu wata mynasikke maku papyry bete inazok. Ata kino tsimysapyrëta izikwy tisapyrëna tsipiny. Atahi pahatsumuëhĩ. Atahi kahyrikoso pipehaze ahatuk mynapykyry hỹ” niy. Iwa Deus kabo nitsasoko. Zikpehaze iharere bo hỹ iky — Suão niy. Kyze Suão nitsasokozo.

<sup>34</sup> – Iwaze jobo iktsa icy. Deus tahyrikoso amytudu wata inasikze iktsa icy. Amytudu Sesus papyry bete inazoze ikozo. Sesus Deus zipehata kahyrinymyrêta. Iwatahi ahabo: “Sesus Deus tse babata tsimysapyrêta izikwy tsizubarêna”. Iwa ikiahatsa bo mykara – niy.

*Tapara babatsa Sesus tuktsa.*

<sup>35</sup> Iwaze Suão Batista Sesus bo nikozozo. Suão zinymyrykynahatsa petoktsa tuk niriktohoko.

<sup>36</sup> Iwaze Sesus ziharamuze.

– Iktsaziu tahaktsa – Suão niy. – Atahi Deus zipehata. Hozipyrykzatsa wata myzubaha pibezenaha. Sisopyksapybyitsa sapyzekenya mo-hyrikosokda – niy.

<sup>37</sup> Niahatsahi Suão zinymyrykynahatsa iharere ziwabynahaze zerekiknaha. Sesus hapik niukurunaha.

<sup>38</sup> Sesus tasukpe bo uwok niyze sibo iktsa niy. Ipe niy:

– Amo sa kapik tsinakurunaha. Amy sa tsip-iberikinaha – niy.

– O myhyrinymyrytsa haneze sa awanu sapy – petoktsa iapik niukurunahatsa nikaranaha.

<sup>39</sup> – Pany! Katuk tyzinyre – niy.

Iwaze Sesus hapik niukurunaha. Iwanu sapy bo zumukunaha. Tyk boze niy. Ibaze nidyhydyhykynaha. Ituk nipamykysokonaha. Ibaze tu zunubaiknaha.

<sup>40</sup> ãdere inarokota. Atahi Simaõ tsy niy. Suão ziwabyze Sesus hapik niukuru.

<sup>41</sup> Kyze zokorobyi tu atsoko taziky bo niukuru. Zihobykze ipe niy:

– O kaziky Deus zipehata Kiristu tsinynaha. Atahi Deus bo mymyoktyhyrykta my – niy.

<sup>42</sup> Iwaze taziky Sesus bo ziockyhyryk. Izumuze Sesus ibo iktsaziu niy. Ipe niy:

– O ikia hi Simaõ Suão tse. Abaka mekytu anaro myzik. Sepas ty pinaroko. Sepas Peduru atsatu maha. Petök inarohota atsatu piwatawyky. Atahi harahare wata – mykara.

*Sesus Piripi Natanieu iwa ahatsa nisipeha.*

<sup>43</sup> Iwaze izokoroze Sesus:

– Utakta Karireja bo moparak – niy.

<sup>44</sup> Tapara jubyi tu Piripi ziberiki ipe niy:

– Aidykta katuk – niy. Piripi Betesaida ezekta niy. Anaeze Ædere Simaõ ahatsa zikzurukunaha Betesaida ezektsa niaha. Sesus Piripi zihobykze ipe:

– O katukta – niy.

Piripi hyĩ niy.

<sup>45</sup> Kyze Piripi Natanieu iberiki zihobykze. Ipe niy:

– O Natanieu katsaktsa Deus zipehata tsinynaha. Tubabatu Moises isoho ziwatahakata. Tapara Deus sohotsitsa niwatihy isoho ziwatahakanahatsa. Abaka tsinynaha. Sesus inarokota. Soksetse. Nasare ezekta – niy.

<sup>46</sup> Niytahi Natanieu ipe niy:

– Anahi batu kanyhy niy. Tyzeka ja amy Nasare eze ja tisapyrẽna – niy.

– Pany katuk iktsa tsimy! – Piripi niy.

<sup>47</sup> Iwaze Sesus Natanieu bo nikozo. Izumuze Sesus kytsa pe niy:



– Iktsataha. Atahi mozumuku Isareu ezekta. Maku mospihikbatabyikita tsimysapyrëta – niy. Iwa Sesus Natanieu soho nitsaso.

<sup>48</sup> Iwaze Natanieu Sesus pe niy:

– Haneze sa tsikny – niy.

– O tapara Piripi zaberiki, uta botu any, ikia umaha pukezi tsikdyhykyze anaeze any – Sesus niy.

<sup>49</sup> Natanieu ipe niy:

– O ikia Deus tse babata. Ikia Isareu ezekta tu abazubata tsimy – niy.

<sup>50</sup> – O ikia kahumo tsaspirikporëta. Tapara umaha pukezi tsikdyhykyze any tawy iwatahi kahumo tsaspirikporëta. Kazikwy hi abazuba bo iktsa tsimy.

<sup>51</sup> Utakta maku babata iknasikta ahawata ikyzik, ikiahatsa bijoikpe zoksapare naha bo iktsa tsimy. Kyze tsipinyaha bijoikpe iknyktsa Deus tsumuëhïtsitsa kabo nasik nasikiknaha. Iwaze neduk nedukuknaha. Ana hi tsipinyaha – Sesus niy.

## 2

### *Sesus mysukzawy bo niukuru.*

<sup>1-2</sup> Kyze petok zuruze Sesus mysukzawy bo niukuru. Mywanu horokwy myikaha Kanaã eze. Kanaã Karireja eze niy. Sesus je imyikaha bo niukuru. Sesus tuk zinymyrykynahatsa kino niwathi imyikaha bo niukurunaha. Tapara zihitsa ispe niy:

– Pany! Kamyikaha bo tynaha – niy.

Yhÿ niaha. Iwaze simyikaha bo niaha.

<sup>3</sup> Kyze duabohotsa tsik zikukunaha. Iwaze duabohotsa tsik nipykze Sesus je tihi tatse pe niy:

– Katse duabohotsa tsik nepykba – niy.

<sup>4</sup> – Kaje amykzo byihuktsa. Abaka Deus zikwy piwatawy zeka batu wasani ziky – niy.

<sup>5</sup> Niytatsahi zihitsa tsumuẽhĩtsa pe niy:

– O kytsa katse ahape my zeka hyỹ tsimaha – niy.

<sup>6</sup> Bytykareze tu pihik suk niapykyryk. Napetok napetok napetok pihik suk niy. Pihik suk morosuk ibuzoinikia zuba tsipomobyitsa. Sudeutsa tapara tahadisahakanaha tahatsyhyrypikiknaha. Bykyze tahatsyhyrypikikzonaha simypewytsa niwatihi nisiokipikiknaha. Siwahoro eze pihiksuk tsizubarẽna.

<sup>7</sup> Iwaze Sesus zihitsa tsumuẽhĩtsa pe niy:

– Pihik ty susutaha! Pihiksuk tyzihareknahaktsa! – niy.

Hyỹ niaha.

– Pihik ty zak bo tu tyharektaha.

<sup>8</sup> Iwaze pihik ty zihitsa bo nyny tsimaha – ispe niy.

Hyỹ niaha. Iwaze pihiksuk ty okok maraksu maraksu nikaranahaze iwaze zihitsa bo wabehyryk niy.

<sup>9</sup> Pihik tu duabohotsa tsik niyzik. Zihitsa ziakpy. Zihitsa batu inyhy. Aty sa pihik duabohotsa tsik nizuknihik anahi batu inyhy. Sitsumuẽhĩtsa zuba zinymyrykynaha. Niytahi zihitsa tasukzakata pe niy:

<sup>10</sup> – Taparaka kytsa bo duabohotsa tsik tisapyrẽna situaktsa bo nyny ziknakaranaha. Bykyze tahasoroknahaze zuba duabohotsa tsik isapybara

ty situktsa bo nyny ziknakaranaha. Ikiakta batu. Aba zuba ikia duabohotsa tsik tisapyrëna tsipokz-itsarëna mybo nyny tsiky – niy.

<sup>11</sup> Iwaze Sesus zinymyrynahatsa ihumo sispirikporëtsa.

– O atahi Deus zikwy ziwatawy – nikaranaha. Tapara Deus zikwy Kanaã ezektsa bo ziwatawyky. Kanaã Karireja eze niy. Anaeze hi Deus zikwy Sesus tuk niapykyryk niy.

<sup>12</sup> Niahatsahi Kaparanaũ hudikhudikwy bo ni-aha. Sesus, taje, tatukytsa, zinymyrykynahatsa ahatsa Kaparanaũ bo zumukunaha. Anaeze niapykyrykspyknaha.

*Sesus Deus wahoro zubata bo zumu.*

<sup>13</sup> Kyze Sesus zinymyrykynahatsa tuk Serusarëhe bo niukuru. Sudeutsa myikaha bo pororo ziknakaranaha. Tubabatu Deus taparaktsa Esito ekze mekybotu nisioktyhyryk ana bo hi mytsaty ziknakaranaha. Myikaha paskoa inarokoha niy.

<sup>14</sup> Deus wahoro zubata isturupeze bo zumuze nitsuk. Anaeze kytsa sizubarëtsa bo nikoze. Wastuhutsa pikuzatsa ty, hozipyrykzatsa ty, amy-tudutsa ty iwatsa ty nisihuakaknaha. Utsa kytsa okyrysaro humo harape bo zihuakaknaha. Anaeze nidyhydyhykynaha. Kytsa inapupuna-haze siokyrysaro ty zihuakzonaha.

<sup>15</sup> Sihumo Sesus taokaniki. Pikuzatsa hwyk tsaziki ty tsizezerëna ty wabe niy. Kytsa ipokso zipobaiknaha. Aidy nitururuknaha. Kytsa tahapybyspyk niwakbaiknaha. Hwibihitsa

nisitsihipetotokbaik. Okyrysaro tsizubarēna zitōbaik.

<sup>16</sup> Sesus opykani huahua niy:

– Ahanamy ty ka wabehyryktaha! Ikiahatsa kazo wahoro zubata eze ahanamy zozowy tsikzukninaha ba zikaha. Niwazubaktsa. Nabo pãotaha – niy.

<sup>17</sup> Iwaze zinymyrykynahatsa ibo iktsa nikaranahaze mytsaty nikaranaha. Tubabatu Deus harere papeu humo ziwatahaka ana bo hi mytsaty nikaranaha.

– O Deus awahoro zubata kytsa ataeze hi simys-apybyikitsa mykaranaha. Iwatahi taokaniki – niy. Iharere bo mytsaty nikaranaha.

<sup>18</sup> Iwaze Sudeutsa taparaktsa Sesus pe niaha:

– Aty sa ape niy: “Kytsa Deus wahoro zubata eze tysiksiwyhiktsa!” Aty sa anaharere ape niaha. Deus zikwy ty mybo tsiwatawykta! Deus zikwy mybo tsipiwatawy zeka wasani – niaha.

<sup>19</sup> Sesus ispe niy:

– Ikiahatsa Deus wahoro zubata tsipitsehep-etotokbaiknaha zeka usta wahoro mektatu mozoknizo. Mektatu ezytyk mozoknizo. Harakykbyihi puru nahatuk tu pikymy hỹ – niy.

<sup>20</sup> – Batu ba niaha. Harakykbyihi puru nahatuk tu Deus wahoro zubata mektatu ba zikukni mybarapetu tsimy kara – niaha. – Mytukytsa tubabatu tawahoro nizuknikinaha, kuarēta seis niytyk tseheze zikymynaha. Paze harakykbyihi puru nahatukta zuba mektatu ba zikzuknizo – niaha.

<sup>21</sup> Sesus harere humo batu sihyrinymyry. Iharere tsihokdaharēna. Nitsasokoze wahoro tanury humo ziwatawyky. Inury wahoro

wata niy. Mohyrikosokdaze petok puruze mynahyrikipo mykara. Anahi ziwabykynahatsa batu sihyrinomyry.

<sup>22</sup> Sesus nahyrikipoze anaharere bo mytsaty nikaranaha. Iharere ty zinymyrykynahatsa mytsaty nikaranaha. – Deus harere wasani my, hawa ha ty Sesus nitsasoko inury soho atsatu niy – nikaranaha. Iwaze iharere bo hyĩ nikaranaha ihumo sispirikporẽtsa niyziknaha.

### *Sesus mywatu nimynyba.*

<sup>23</sup> Sesus Serusarẽhe eze tuze kytsa sizubarẽtsa ihumo sispirikporẽtsa moziknaha. Paskoa myikaha myze sizubarẽtsa ihumo sispirikporẽtsa moziknaha. Deus zikwy ty ituk iktsa nikaranahaze iwatsahi iharere bo hyĩ nikaranaha ihumo sispirikporẽtsa niyziknaha.

<sup>24</sup> Sesus sibo tasoho ty batu watawy sihumo tsimytsatyharẽta nikara.

<sup>25</sup> Kytsa mytsaty mykaranaha ana humo hi Sesus tsihyrinomyrẽta. Sesus batu tyso:

– Hawa takta sa mytsaty my – my. Iwa batu tyso. Amy ty kytsa mytsaty mykaranaha humo tsihyrinomyrẽta hĩ.

## 3

### *Nikodemus Sesus bo nikozone.*

<sup>1-2</sup> Unata eze Nikodemus inarokota Sesus bo zumu. Taparakta Pariseutsa Sudeutsa niy. Atahi unata wahoro hara bo nidoko. Atahi:

– O myhyrinomyrytsa! Ikia mopyktsa babata tsihyrinomyrẽta. Deus zikwy ty kytsa bo tsipiwatawyky. Ikia zuba Deus harere bo hyĩ

tsimykara iwatahi Deus zikwy ty mybo tsipi-watawyky. Iwaze katsa tsimytsasokonaha Deus ikia zapehaka tsimykaranaha – niy.

<sup>3</sup> Sesus ipe niy:

– Tsiwabytotokta! Hawa haja motsasoko wasani my. Ikia kyripuruzo ahahabyizeka batu Deus tyryk zikyzyk. Deus tyryk tsimozik tsihikik zeka tsimypurukzokta – niy.

<sup>4</sup> Iwaze Nikodemus hi:

– Hawa sa maku taypykta tu mopurukzo. Taje harakoke bo ba ziktsukzo – niy.

<sup>5</sup> Niytahi Sesus ipezo niy:

– Hawa motsasoko wasani my. Maku pihik ikny nipurukze niy. Maku mopurukzoze Deus hyrikoso ituk mynapykyryk iwaze Deus tyryk mozik. Iwa mopurukzo zeka Deus tyryk mozik.

<sup>6</sup> Tsiikipuruknahaze myje ikny katsa myzotsa hyrytsa zuba tsimaha. Katsa tsimypupurukzonahaze Deus hyrikoso humo iwatsahi katsa Deus tyryk tsimoziknaha.

<sup>7</sup> Iwatahi ape my:

“Tsimypupurukzonahakta” my. Iwaze ikia batu apyby Deus tyryk tsimozikta iwa abo motsasokoze mytsaty mytsaty byity tsimy.

<sup>8</sup> Zopoktsa nabybykyknahaze hana ikny ja batu myhyrinomyry siakpyri zuba piwabynaha. Hana bo mokurunaha batu myhyrinomyry. Ba nabo myku zikaha. Atsawatu hawa Deus tyryk tsimozik batu ahyrinomyry, Deus hyrikoso kino zopoktsa waha nabybykyk my. Hana ikny ja batu myhyrinomyry. Hana bo ja batu myhyrinomyry. Katsa Deus hyrikoso humo ityryk tsimoziknaha iwa ahahyrynomyrëtsa zuba – niy.

<sup>9</sup> Iwaze Nikodemus ipe niy:

– Hawa sa my. Aharere humo batu kahyrinomyry – niy.

<sup>10</sup> Sesus niy:

– Ikiakta Isareu ezekta sihyrinomyrykytsa iwatatu sa batu ahyrinomyry.

<sup>11</sup> Amy ty inomyryky hi anahi motsasoko. Amy ty botu iwaby anahi zuba motsasoko. Tanyhyhi motsasoko. Ikiahatsa kaharere batu ahakparawy – niy.

<sup>12</sup> – Ikiahatsa Deus tyryktsa tsimoziknaha ana soho hi motsasoko. Anahi motsasokoze kaharere humo batu yhỹ tsimaha. Kaharere bo hỹ tsimaha zeka hawa Deus tuk ahawahi tsimynapykyknaha anatyhi yhỹ tsimaha – my.

– Kaharere Deus tuk ahawahi tsimynapykyryknaha soho anatyhi hỹ tsimaha. Batu ahahyrinomyry mytsaty my.

<sup>13</sup> Uta zuba bijoikpe ikny iknasik. Iwatahi kytsa bo motsasoko. Ziknynaha tahi kytsa bo motsasoko. Utakta Deus zikpehata ahawata ikyzik niy.

<sup>14</sup> Tubabatu Moises pyryhyk hyrikoso barõse nizukni. Na pyryhyk hyrikoso hwi humo typu niy. Kytsa simyitsapyrẽtsa pyryhyk hyrikoso bo iktsa nikaranahaze nizororokonaha. Atawahi utakta Deus zikpehata kytsa wata ikyzik iwaze kytsa iharapatawyhyta humo pikyryziknaha.

<sup>15</sup> Kytsa kaharere bo hỹ mykaranaha zeka kahumo sispirikporẽtsa maha. Kytsa kahumo mospirikponaha zeka Deus tuk tahawahi mynapykyryknaha. Kahumo sispirikporẽtsa Deus tuk tahawahi mynapyrykyknaha h̃y

<sup>16</sup> Yhÿ, Deus mybarawy ezektsa humo tsimypokzitsiarêta. Nawatsa humo tsimypokzitsiarêta babata. Iwatahi tatse zipaha. Estuba zuba itse babata. Asaktsa kahumo mospirikponaha zeka Deus tuk mynapykyryknaha, ituk tahawahi mozurukunaha. Deus tuk mynapykyryknaha ba zikykbazonaha.

<sup>17</sup> Deus tatse izipehaze myhumo iakyri byita. Ba kaeze êryk zikahasapynaha. Iwatahi uta mozumuze kazo bo pahaoktyhyryk niy iwaze mybarawy ezektsa humo batu iakyri.

<sup>18</sup> Aty Deus tse babata humo ispirikpo zeka Deus bo mymyoktyhyryk. Deus ihumo ba ziktaokani. Aty kaharere bo hyÿ ahabyi zeka atahi Deus bo ba zikmyoktyhyryk Deus ihumo tsiakyriukrêta.

<sup>19</sup> Deus tatse zuba zipaha. Sizubarêtsa sisopyksapybyitsa tu nikaranaha nisiwatawyky. Wasani mykara nisiwatawyky. Atahi okoroze ky wa. Myzubatsa ihumo batu siakparawy. Sisopyksapybyitsa nikaranaha iwatsahi ihumo batu siakparawy. Asahi miwa ha nizihikiknaha. Iwatsahi batu ihumo sispirikpo.

<sup>20</sup> Sizubarêtsa sisopyksapybyitsa tu nikaranaha ana humo hi kaharere bo batu yhÿ zikaha. Sisikpybyrêtsa ustsakyttsa humo. Asahi kytsa papatu nikaranaha, asaktsa sibokyttsa mykaranaha zeka sisikpybyrêtsa. Miwa ezektsa watsa ustsaba ziksinyaha. Iwa humo hi sisikpybyrêtsa.

<sup>21</sup> Ustsakyttsa kaharere bo hyÿ mykaranaha simysapyrêtsa, kahumo sispirikporêtsa iwatsahitisyprêna ty mykaranaha. Ihumo wasani mykaranaha ana humo hi kytsa sihyrinymyrêtsa. Iwororoha ezektsa watsa ustsamysinyaha



batu sisikpyby – niy. Iwa Sesus Nikodemus tuk nipamykysoko.

*Sesus Suão ahatsa.*

<sup>22</sup> Kyze Sesus tuk zinymyrykynahatsa ituk Sudeja bo niukurunaha. Anaeze niapykyrykspyk naha kytsa nisiharasusuku.

<sup>23</sup> Suão Batista niwatahi myzubaha nisiharasusuku. Eno eze. Eno Sarĩ pauk baze niy. Pihik tsizubarẽna eze hi nisiharasusuku.

<sup>24</sup> Suão ihurukuhubyzetu myzubaha nisiharasusuku. Aiba tohi zuba kytsa sakyriukanikitsa hurukwy bo nitsahuruknaha.

<sup>25</sup> Suão Batista tuk zinymyrykynahatsa Sudeu zipehakanaha. Asahi:

– Aty sa wasanita nikaranaha Suão nisiharasusukuze ja nikaranaha. Sesus nisiharasusukuze ja. Aty sa wasani – nikaranaha.

<sup>26</sup> Iwatsahi Suão pe niaha:

– O myhyrinymyrytsa! Botua ikia amakta taba buburu tsiky. Mytuk maku nipykyrykspyk. Botua isoho ty mybo tsiktsasoko, Sesus my. Atahi myzubaha nisiharasusuku. Sizubarẽtsa iapik mokurunaha. Ikia hapik ba ziktururuknaha – niaha.

<sup>27</sup> Iwaze Suão ispe niy:

– Ana humo hi kakurẽta my. Deus zuba tazikwy ty myzubaha bo nyny my. Asaktsa Deus humo Sesus harere piwabytotokonaha asa bo hi izikwy ty sibo nyny my – niy.

<sup>28</sup> Botua ahabo iktsasoko.

– Utakta Kiristu byita atakta Deus zipehata my. Taharaze zuba zikpeha – niy. Iwaze isoho mot-sasoko.

29 – Maku tasukzata tsakurêta my. Itukta kino niwatihi ihumo tsakurêta. Tasukzata mokozone itukta ihumo tsakurêta. Utakta itukta wata my. Myzubaha Sesus tuk mokurunaha, ana bo hi mokozone kakurêta. Isukzata tukta wata my.

30 Sesus zinymyrykynahatsitsa sizubarêta. Katuk zinymyrykynahatsa batu sizuba. Wasani my iwatahi kakurêta – my. Iwa Suão zinymyrykynahatsa pe niy.

*Atahi bijoikpe iknykta inasik tsimysapyrêta.*

31 Atahi bijoikpe iknykta tsimysapyrêta my. Ata zuba tispirikporêta. Mybarawy ezeiksa batu. Aparakbahatsa tsikaeni zuba sihyrinymyryrêta maha. Mybarawy soho eziky ty zuba mopamykysokonaha.

32 Atakta bijoikpe iknykta ihyrinymyrênikita hÿ. Ata kino nikoze naha zuba motsasoko. Ziwaby naha zuba motsasoko. Batu sizuba iharere bo hÿ mykaranaha.

33 Kytsa iharere bo hÿ mykaranahaze asahi – Deus tsimysapyrêta wasape mykara – mykaranaha

34-35 Deus tihi:

– Utakta katse Sesus pipehaka. Ihumo kamypokzitsiarêta. Kahyrikoso ituk tawahi mynapykyryk. Kahyrikoso hi izikwy kazikwy hi atsatu my. Ata kino wasaniha zuba natsasoko. Kahyrikoso humo zikwy tsizubarêna – niy.

36 Iwaze aty Deus tse harere bo hÿ mykara, atahi meky watu mozik, atahi tawahi Deus tuk mynapykyryk. Aty Deus tse harere bo yhÿ ahabyi zeka, atahi Deus tuk ba zikykykyryk.

Deus ihumo takyri, iharere bo yhÿ ahahabyizeka iwatahi ihumo Deus takyri. Atahi Deus tuk batu tawahi mynapykyk niy, sinini ykarawy bo myzipaha.

## 4

### *Sesus Samarija ezektatsa tuk nipamykysoko.*

<sup>1</sup> Kyze Sesus niukuru Sudeja bo Pariseutsa pokso niparak. Tapara kytsa Pariseutsa pe niaha:

– O kytsa Sesus hapik sizubarëtsa. Atahi kytsa sizubarëtsa nisiharasusuku. Suão Batista tuk zinymyrynahatsa batu sizuba maha – mybarapetu nikaranaha.

<sup>2</sup> Sesus kytsa batu isty harasusu. Zinymyrykynahatsa zuba kytsa nisiharasusuku naha.

<sup>3</sup> Anahi Sesus ziwabyze Sudeja ikny niparak. Karireja bo ziksizo. Zinymyrykynahatsa ituk niukurunaha.

<sup>4</sup> – Samarija bo koiknyktsa kytsa! – Sesus niy.

Yhÿ nikaranaha.

<sup>5</sup> Niahatsahi Sikare myzubaha bo zumunaha. Tubabatu taparakta Sako nihyrikosokdaze tahudikhudikwy Sose bo nyny niy itse ziaксе. Sose nihyrikosokdaze niwatihi itsekokatsa tahudikhudikwy ziaksenaha. Sikare myzubaha baze tu nihyrikosokdata Sako hudikhudikwy niy.

<sup>6-8</sup> Iwaze Sesus pihik zokowy bo izumu. Tapara Sako tykoke nizukninaha. Tokbaha niyzikikze Sesus iakubyrizumu tahi pihik zokowy baze nidyhyky. Zinymyrykynahatsa myzubaha bo niaha. Tahadisahawy bo nitururuknaha.

Iwaze wytyk Samarija ezektatsa nabo izumu. Pihik zotsata niparaktatsa Sesus zihobyk iwaze ipe niy:

– O kaboktsa pihik ty uta piku – niy.

<sup>9</sup> – Batu ikiakta Sudeja ezekta hỹ. Ikza Samarija ezektatsa. Iwaze amo sa “Kabo pihik ty maraktyktsa” tsimy kara – niy. Sudeutsaktsa ba Samarija ezektsa opowysuk eze ka ba zikunaha iwatatsahi hỹbyi nikara.

<sup>10</sup> Sesus:

– O amy tisapyrẽna zuba Deus abo nyny my hỹ. Ana humo hi ja tsahyrinymyrẽtatsa “Kaboktsa pihik ty” botu ape iky – niy. Amy tsa ty hỹ zeka iwatahi Sesus niy. – Ikia batu kabo nyny tsimy. Tsikny zeka ikia kino “kabo ky pihik ty” tsimyze. Yhỹ my. Utakta Deus pihik baba ty abo nyny my. Ana tsipikuze mekywa tu tsimozik. Tsimyhyrikosokdaze tsinahyrikizikoze, Deus baze awahi tsimynapykyryk – Sesus niy.

<sup>11</sup> Niytatsahi:

– O ikia sa batu apihikzowyky pihik zowy tsiokitsihizezerẽna batu izowyky. Hawa sa pihik ty marak tsimy – niy.

<sup>12</sup> – Tubabatu mydiri nihyrikosokdata Sako tykoke ziuku. Iwatahi pihik atsaeye ky zikzikuku. Ihyrytsa niwatihi pihik zikzikukunaha. Siraratsa kino niwatihi pihik zikzikukunaha. Niytahi pihik hoke itsekokatsa ziaksenaha. Mybo nizapikso. Sako harere kytsa ziwabyziunaha. Maku abazubata niy, pihik zikuku. Hawa skaraba ikia hi ja abazubata – niy.

<sup>13</sup> Niytahi Sesus ipe niy:

– Aty na pihik piku zeka tsiarupukrẽtazo.

<sup>14</sup> Uta pihik ty abo nyny maha tsipiku zeka ba iarapuruk zikzumuzo. Pihik mekywaha ty abo nyny my. Hawa pihik pupuputsa watsa pihik batu zepyk pihik ty abo nyny my zeka awahi tsimynapykyk iwatatsahi ba iarapuruk zikzumuzo. Ba ziktsehezo pupuputsa watsa iwaze mekywa tu tsimyzuruku. Tsimyhyrikosokdaze tsimynahyritzikpo iwaze awahi Deus tuk tsimynapykyryk – niy.

<sup>15</sup> Ana ziwaby tatsahi:

– Ana pihik ty kabo nynyty ky niy. Iwaze ba karapuruk ziyk. Ana pihik ty kabo nyny tsimyzeka pihik ba zikzizozo – niy.

<sup>16</sup> Niytahi:

– Abarikta kabo tyzioktyhyktsa! – niy.

<sup>17</sup> – Batu ba. Ikza ba kabarikta ka – niy.

– Ikia wasape tsiky niy. Tsiktsasoze “Ikza batu kabarikta ka” wasape tsiky.

<sup>18</sup> Ikia kytsa katsyhyrytsa watsa tu tsiksiakse. Abakta abariktabyitatu aktaba haĩ niy. Deus okzeka batu amysapy iwaze kape tsikyze:

“Ikza batu kabarikta ka” wasape tsiky – niy.

<sup>19</sup> Iwaze ipe niy:

– Ikia Deus sohokotsa babata tsimy.

<sup>20</sup> Katsa tsimypamykysokonaha anaeze hara bete Deus pe “O ikia tsamysapyrêta” tsimykaranaha. Iwa mydiritsa nihyrikosokdanahatsa nimyhyrinymyrykynaha. Ikiyahatsa Sudeutsa tsimypamykysokonaha, nabo Serusarêhe eze zuba Deus pe. “O ikia tsamysapyrêta” tsimykaranaha. Aty sa wasani mykara – niy. Iwa atatsa Sesus pe niy.

<sup>21</sup> Niytahi:

– Aibani hara bete Deus bo batu tyso “O Deus myzo ikia zuba tsamysapyrêta” tsimaha. Serusarêhe eze Deus bo batu tyso.

“O Deus myzo ikia zuba tsamysapyrêta” tsimaha – niy.

<sup>22</sup> – Ikiahatsa Samarija ezektsa tsimaha. Deus soho humo ahahyrinymyry byitsa tu ikiahatsa tihi:

“O Deus ikia tsamysapyrêta” tsimykaranaha. Ikiahatsa batu ihumo ahaspirikpo. Katsaktsa Sudeutsa tu. Ihumo myspirikporêtsa. Deus Sudeutsa nisinyky. Deus bo mymoktyhykta niyzik.

<sup>23</sup> Kyze abaka ikiahatsa Deus tyryktsa tsimoziknaha. Iharere bo hyÿ tsimykaranaha. Amy mot-sasoko anaty hi tsimykaranaha. Wasani tsimaha. Iwaze Deus ahahumo tsakurêta. Iwa tsimyzurukunaha zeka tsakurêta – Sesus niy.

<sup>24</sup> – Deus inurybyita ihyrikoso zuba my. Batu zinynaha. Kytsa Deus humo sakurêtsa maha zeka wasani mozurukunaha. Hawa wasani zuba mot-sasokonaha. “O Deus ikia zuba tsamysapyrêta mykaranaha” – niy.

<sup>25</sup> Kyze atatsa ipe niy:

– Deus myzipehata mywata mybarawy bo mynasik. Kiristu mozumuze ihumo myspirikporêtsa tsimoziknaha, atahi Deus bo mymyoktyhyryk niy. Ana humo hi kahyrinymyrêtatsa – niy.

<sup>26</sup> – Uta hiba Deus zikpehata. Utakta abo mopamykysoko Deus zikpehata my – niy.

<sup>27</sup> Iwaze babatu zinymyrykynahatsa sidisahawy tuk ziksikizonaha. Sesus atatsa tuk iktsa niahaze paikpa mytsaty nikaranaha. Batu

tyso niaha – O Sesus amo sa ituk tsikpamykysoko. Hawa sa ituk tsikykara – iwa batu tyso nikaranaha.

<sup>28</sup> Niytatsahi taopowysuk zerekik atsoko myzubaha bo niy.

<sup>29</sup> Myzubaha ezektsa pe niy:

– Pany. Maku bo ky niy. Atahi pihik zowy baze nidyhyky. Hawa ha ty ziknakara naha ty kabo nitsasoko. Kiristu Deus zipehata ja iky. Pany ibo ky – niy.

<sup>30</sup> Yhÿ nikaranaha. Iwatsahi myzubaha ezektsa Sesus bo zumukunaha.

<sup>31</sup> Iwaze batu sibo zukbyize zinymyrykynahatsa hi:

– O myhyrinymyrytsa amy ty hauktykta – nikaranaha.

<sup>32</sup> – O batu ba. Uta kino meky watu kadisahawy. Ahanyhybara – niy.

<sup>33</sup> Zinymyrykynahatsa asa zuba ni-pamykysokonaha:

– Aty kok idisahawy ibo zibykare nikaranaha. Mypapatu kok idisahawy ty ibo nyny niy – nikaranaha.

<sup>34</sup> Sesus ispe niy:

– Pikdisaha zeka kakurêta my – niy. – At-sawatu kazo harere bo yhÿ my zeka kakurêta babata mykara. Kazo zikpehatawy iharere humo yhÿ ikykaraze kakurêta. Iharere nihawatu my zeka kakurêta mykara kasoroktawa mokuru.

<sup>35</sup> Ikiahatsa hi: “Napetok napetok nawaze byzoje morahaze kyze arostsas moakuknahaze. Mydisahawytsa mokymynahaze arostsas tahazyzyknaha!” tsimaha. Iwa tsimysasokonaha.

Utakta ahape my: “O batu. Abatu nikymy”. Atsawatu mytsaty tsimykaranaha “O kytsa batu sizuba Sesus humo sispirikporêtsa maha” tsimaha. Ahape my. Iktsa tsimahaktsa! my. Kytsa asahi kaharere bo hyÿ mykaranaha kahumo sispirikporêtsa sibo iktsa tsimahaktsa! Abatu kahumo sispirikporêtsa maha. Ba byri hu tsimaha. Arosta moakuknahaze tsa watsa abatu kytsa kaharere bo hyÿ mykaranaha kahumo sispirikporêtsa maha – niy.

<sup>36</sup> – Maku siriktsa nisiparikik niy. Mektatu arosta nisizyzykyk niy. Kytsa petoktsa arosta humo sakurêtsa. Atsawatu maku kasoho motsasoko, mektatu kasoho humo mysihyrinymyry iwatsahi kytsa kahumo sispirikporêtsa, ana humo hi kytsa petoktsahatsa sakurêtsa. Iwatsahi kytsa kahumo sispirikporêtsa sakurêtsa hÿ. Asahi nahyritzikponahaze katuk tahawahi mynapykyryknaha ana humo hi sakurêtsa hÿ – Sesus niy.

<sup>37</sup> – Estuba maku atazuba mysiparik iwaze maku mektatu mysizozek mykaranaha. Wasani maha.

<sup>38</sup> Atsawatu estuba maku hi kasoho kino motsasoko mekta tu kytsa kahumo mysihyrinymyryknaha. Iwatsahi kytsa sizubarêtsa kahumo sispirikporêtsa. Kaharere tsimytsasokonaha zeka ana humo hi kytsa kaharere bo hyÿ mykaranaha. Kahumo sispirikporêtsa zeka mekywatsatu moziknaha. Utsa kytsa botu kasoho nitsasokonaha iwatsahi siharere humo kaharere bo hyÿ mykaranaha iwaze sispirikporêtsa moziknaha iwatsahi



ahakurëtsa tsimaha – niy.

<sup>39</sup> Kyze Sikare ezektsa Sesus bo zumukunaha. Ihumo sispirikporëtsa. Atatsa harere ziwabynahaze Sesus harere bo hyÿ mykaranaha iwatsahi ihumo sispirikporëtsa moziknaha. Atatsa nitsasokoze:

– Hawa ha ty ziknakara naha ty kabo nitsasoko – atatsa harere ziwabynahaze. Iwatsahi Sesus humo sispirikporëtsa hÿ.

<sup>40</sup> Iwaze Samarija ezektsa zumukunahaze ipe niaha:

– Pany mywahoro bo paku tyny – nikaranaha. Yhÿ niy. Anaeze situk petok zurure.

<sup>41</sup> Mektsatu ihumo sispirikporëtsa. Sibonitsasokoze myzuba ihumo sispirikporëtsa.

<sup>42</sup> Asakino atatsa pe niaha:

– Tapara katsaktsa Sesus bo hyÿ tsimaha ihumo myspirikporëtsa aharere humo tsikykaranaha. Abaka katsa ihumo myspirikporëtsa iharere humo. Atahi mybarawy ezektsa mysioktyhykta – nikaranaha. Iwa atatsa bo nipamykysokonaha.

*Sesus taparakta tse zizororowy.*

<sup>43</sup> Kyze petok zuruze Sesus Karireja bo ziksizo. Samarija ekzekta niparak Karireja bo niukuru.

<sup>44</sup> Tapara Sesus ziknatsasoko – O Deus sohokotsa tahudikhudikwy ezektsa okzeka iharere bo batu waby zikaha. Utsa kytsa iharere bo piwabyziukunaha, tahudikhudikwy ezektsa batu – Sesus niy:

<sup>45</sup> Kyze Sesus bo zumuze Karireja ezektsa Sesus humo sakurëtsa nikaranaha. Asahi Serusarëhe amyikaha bo niaha. Anaeze Sesus bo nikozonaha. Deus hyrikoso ituk mynapykyryk zinyaha. Deus

zikwy ituk zinyana. Iwatsahi sibo zumukuze sakurẽtsa nikaranaha.

<sup>46</sup> Iwaze Kanaã bo ziksizo. Pihik duabohotsa tsik nizukni nahaeze, Kanaã Karireja eze tu niy. Kyze taparakta Kaparanaũ myzubaha ezekta Kanaã eze tu niy. Atahi:

– Katse tsimyitsapyrẽta. Asiba zumuzata atahi Kaparanaũ eze nihoeke, asiba nira – niy.

<sup>47</sup> Iwaze kytsa taparakta pe niaha:

– Sesus izumu Sudeja iknykta. Karireja bo. Mybo izumu – niaha. Iwaze taparakta Sesus bo zumuze ipe niy:

– O Sesus tupakta kawahoro bo tsimy, katse moraka. Pany katse tyzizororowykta! – niy.

<sup>48</sup> Sesus ipe niy:

– Kytsa kahumo batu sispirikpo. Tapara Deus zikwy humo piwatawyky. Anabo hi iktsa mykaranahaze iwatsahi kaharere bo hyỹ maha iwaze kahumo sispirikporẽtsa – Sesus niy.

<sup>49</sup> – O pany Sesus! Aidytykta, katse irabyitu – niy.

<sup>50</sup> – Tsiksizokta! Awahoro bo atse botu nizororo. Tsakurẽta niyzik – Sesus niy.

Maku Sesus harere bo hyỹ nikara ihumo tispirikporẽta nikara. Iwatahi tawahoro ziksikizo.

<sup>51</sup> Atazuba tawahoro bo ziksikirize ske pukteze tu itsumuẽhĩtsitsa zihobyknaha. Ipe niaha:

– Atse nizororo. Iwatahi tsakurẽta – nikara.

<sup>52</sup> – Katse sa nizororo haramwe haneze ja – niy.

– O jatu tokbaha eze atsoko jokboha niyzik. Abaka iakzobyita mopykyryk baba zizororo niy – niaha.

<sup>53</sup> Jatu kino haramwe tokbahaze Sesus tihi:

– Atse botu nizororo – niy. Iwa Sesus kape niy. Anabo hi mytsaty nikara. Iwatahi Sesus humo tispirikporêta niy. Iwahoro ezektsa kino niwatihi Sesus humo sispirikporêtsa niyziknaha.

<sup>54</sup> Iwahatu Sesus Deus zikwy ziwatawyky. Sizubarêtsa bo Deus zikwy ziwatawykyzo niy. Karireja ezektsa bo Deus zikwy ziwatawy. Sudeja ekze nîparakze Deus zikwy petok ziwatawy niy.

## 5

### *Sesus ityryk niakbabata zizororowy.*

<sup>1</sup> Iwaze Sesus Serusarêhe bo niukuru. Sudeutsa myikaha bo Serusarêhe bo zumuku.

<sup>2-3</sup> Serusarêhe eze zarape waha eze niy. Zarape Betesda inarokoha Sudeu harere niy. Betesda zarape waha eze Serusarêhe hokbowytsa baze niy. Hokbowy hozipyrykzatsa ty inapupukunaha inarokota zumubahani. Iwa katsyhyry watsa iwatsa hokbowytsa iwa niaha. Anaeze kytsa sizubarêtsa ziknakpykyryknaha. Simyitsapyrêtsa niaha. Sihyrizikubyitsa, siekbyritsa, sityryktsa niakbabatsa, pãozikahabyitsa iwatsa anaeze ziknapykyryknaha. Sizubarêtsa ziknasisperyknaha.

<sup>4</sup> Bijoikpe iknykta Deus tsumuêhîtsa pihik wastuhu ziknasikik. Pihik zikziktsik pepepewyky. Pihik zikzitsikpepepewykyze kytsa pihik bo ziknautsotsokoknaha. Aty tapara ziknahazukukze zikzizororowy ky.

<sup>5</sup> Anaeze hi Sesus zumu. Maku bo iktsa niy. Atahi tubabatu tsimyitsapyrêta sinini ziknakara niy. Tirîta oito anos niytyk tseheze sinini ziknakara.

<sup>6</sup> Sesus ibo iktsa niy. Tubabatu ziknahoekek ana humo hi tsihyrinymyrëta. Iwaze ibo iktsa niyze ipe niy:

– Ikiã skaraba hawa tsimy tsimyzororo tsihikik sa – niy.

<sup>7</sup> – Yhÿ niy. Myzororo ikykarazetu – niy. – Batu aty tohi katukta ziky. Batu aty tohi zikmokty pihik bo niy. Uta zuba zeka batu pihik bo ziksi. Iwatahi mektsatu katy haraze mykaranaha hÿ pihik bo. Utakta batu. Mektsatu zuba nazororoko naha – niy.

<sup>8</sup> Iwaze Sesus ipe niy:

– O kyiktykta! Awanu ty kokpuhyktykta. Tsiksikta – niy.

<sup>9</sup> Atsoko itarikto. Tawanu ty kokpuhyryk niy. Niparak niy. Tsakurëta nikara hÿ. Nawazuruze Sudeutsa byrywy zumuze hÿ nikara.

<sup>10</sup> Iwatsahi Sudeutsa izororowyhyta pe niaha:

– Aba katsa Sudeutsa tsimymybyrykynaha niaha. Ikiã tarabaja tsimykara. Wasanibara tsimy. Ikiã awanu tsipsisik, iwatahi tarabaja tsimykara – niaha. Myhyrinymyrywy tihi:

– Mybyrywy pumuze batu tarabaja zikaha – niy.

<sup>11</sup> Iwaze izororowyhyta ispe niy:

– Zikzororowyta tihi kape niy: “Awanu ty kokpuhyryktykta tsiksikta” – niy.

<sup>12</sup> Niahatsahi ipe niaha:

– Aty skaraba ape. “Awanu ty kokpuhyktykta tsiksikta!” niy – niaha.

<sup>13</sup> – Batu kanyhy. Inaro batu kawabyhy – niy. Kytsa batu ity nyzo. Kytsa sizubarëtsa anaeze niy.

Iwatahi Sesus niparak. Iwatahi maku naro batu iwabyhy.

<sup>14</sup> Kyze Sesus izororowyhyta. Deus wahoro zuba eze zihobyk. Ipe niy:

– Abaka ikia tsikzororo hỹ awatu ty. Tsimy-namysapybyi zeka sinini tsimy kara – niy.

<sup>15</sup> Iwaze izororowyhyta Sudeutsa bo ziksizo ispe niy:

– Maku Sesus inaro atahi zikzororowy – niy.

<sup>16</sup> Iwatsahi Sudeutsa Sesus nizokyrykynaha. Sesus maku zizororowy zuruze tahabyrykynaha ana humo hi tahakyrikinaha. Iwatsahi Sesus zimyijakaranaha.

<sup>17</sup> Sesus ispe niy:

– Kazo tarabaja mynakara, batu pyk ziky. Uta kino niwatihi tarabaja mynakara – niy.

<sup>18</sup> Iwaze Sudeutsa taparaktsa zibeze tsihikik-naha. Tapara maku zizororowy. Sudeutsa byrykywy eze tuze maku zizororowy. Bykyze nitsaso Deus kazo isopyk niy. Nitsasokoze Deus kazo my, tazikwy Deus zikwy atsatu my nikara. Iwatsahi ihumo tahakyrikinaha.

*Aty sa Deus tse ipehawy.*

<sup>19</sup> Iwaze Sesus taparaktsa pe nitsasokozo:

– Hawa motsasoko wasi my. Deus tse babata my. Atazuba batu. Atazuba batu mykara. Hawa Deus mykara naha ty zuba mykara. Hawa Deus motsasoko naha atsatu motsaso. Kazo tsizubarēna mykara atsatu mykara pisopykzuku – niy.

<sup>20</sup> – Iwatu Deus kahumo tsimypokzitsiarēta. Tatse humo tsimypokzitsiarēta. Iwatahi hawa mykaraze tatse bo piwatawyky. Utakta ihumo

myzisopykzuku. Nawa kasoho mytsaty mykara. Jaba maku ityryk niakbabata izororowy anabo hi iksa tsikaha. Abahi kazo tsizubarëna kabo piwatawyky. Kabo piwatawyky zeka pahawatawyky. Ikiahatsa hi: “O tisapyrëna tsimaha.” Tsimypybynaha – niy.

<sup>21</sup> – Kyze Deus siakbatsa mynasi-hyryzikpobawy. Uta kino niwatihi. Kahumo istsihitsa mysihyryzikpowyzo. Deus tse humo mynasihyryzikpoba.

<sup>22</sup> Deus mybarawy ezeiksa bo batu tyso “O ikia wasani tsimykara. Usta pe batu amysapy tsimykara” my. Batu. Uta zuba mybarawy ezeiksa pe: “Ikia wasani” mykara. Usta pe: “Ikia batu amysapy” mykara – iwa Deus harere kape niy.

– Ikia zuba mybarawy ezeiksa soho tsipiwatawyky. Aty ja imysapybyikita tsimytsasoko. Aty tsimysapyrëta tsimytsasoko – niy.

<sup>23</sup> – Iwatsahi sizubarëtsa kasoho humo maha “O ikia Deus tse babata. Aharere tsipiwabynaha. Tsimyharerewabyrëta tsimy” maha. Asa kino niwatihi Deus harere piwabykynaha. Kaharere bo yhy ahabyi zeka kytsa okzeka Deus harere bo niwatihi batu yhy maha. Iharere kino batu ziwabykynaha. Atahi zikpehahik iharere siwabyhybyitsa hi batu ma zikaha – niy.

<sup>24</sup> – Amy sa motsasoko wasani my. Aty kaharere bo hyhy mykara zeka meky watu mozik. Tawahi ispituzo Deus tuk mynapykyryk. Atahi zikpehakata humo tispirikporëta. Iwatahi tawahi ispitu mynapykyryk. Deus batu tyso ipe. “O ikia batu amysapy. Sinini ykarawy bo tsimy” my. Iwa batu tyso, batu sinini ykarawy bo ba zipaha.

<sup>25</sup> Amy wasani motsasoko. Utakta Deus tse. Abaka sizubarẽtsa simysapybyitsa mykaranaha. Asahi kaharere piwabyziukunaha siakbatsa watsa maha. Abahi kaharere bo hyỹ maha zeka meky watu moziknaha. Kahumo sispitu tahawahi Deus tuk mynapykyryknaha.

<sup>26</sup> Deus zuba mynasihyryzikpo. Kazo kape ty-nasihyryzikpo iwatahi uta kino niwatihi siakbatsa mynasihyryzikpo.

<sup>27</sup> Utakta kytsa wata Deus zikpehata. Deus humo kytsa pe my: “Ikia Deus okzeka wasani” mykara. Utsa kytsa pe: “Ikia batu amysapy” mykara. Deus harere humo iwa motsasoko.

<sup>28</sup> Batu paikpa mytsaty tsimykaranaha. Bykyze siakbatsa kaksoho piwabynaha. Kaksoho piwaby-nahaze tahaytyk ekze myzipunaha.

<sup>29</sup> Asaktsa wasani ziknakaranaha. Nahyryzikpobanahaze tahawahi Deus tuk mynapykyryknaha. Iwaze asaktsa batu simysapy ziknakaranaha nahyryzikponaha kino niwatihi. Simysapybyitsa ziknakaranaha mybara botu tahasapynaha. Tahawahi sinini mynakaranaha. Deus bara botu zitahasapynaha Deus pokso tahawahi mynapykyryknaha. Batu siaku maha – niy.

*Aty sa Sesus zipeha.*

<sup>30</sup> – Motsasoko nahaka kaharere bara tu my.

Tapara kazo harere piwaby iwaze motsaso. Tapara kazo mykara bykyze atsatu mykara iwa mozihikik. Botu zikpehata kabo nitsasoko anahi motsasoko. Iwatahi kytsa pe my: “Ikiahatsa ahamysapyrẽtsa.” Utsa kytsa pe: “Ikiahatsa

batu ahamysapy” mykara. Iwa motsasoze wasani mykara – niy.

<sup>31</sup> – Utatu kasoho motsaso zeka batu sapy. Iharere batu wasani tsinakaranaha.

<sup>32</sup> Iwa batu tyso. Usta kasoho motsasoko. Kazo kasoho motsasokoze iharere kino tisapyrëna hÿ iharere humo wasani mykara.

<sup>33</sup> Tubabatu ahatuktsa Suão Batista bo tsipehakanaha. Ata kino kasoho nitsasoko. Hawa ha nitsasoko wasape niy.

<sup>34</sup> Iwa Suão Batista kasoho ahabo nitsasoko. Utakta pahaoktyhyryk my, iwa Suão Batista kasoho nitsasoko. Iharere batu kasoho tsihikik ahabo zuba kasoho nitsasoko – Sesus niy.

<sup>35</sup> – Rika inapokze amypubyri mozik. Iwaze parakbaha mokozonaha. Haneze miwa bo mokozonaha. Suão Batista rika wata nikara. Deus harere nitsasoko. Iwaze Deus okzeka wasani ahahyrinymyrëtsa. Anahi Suão harere humo ahahyrinymyrëtsa.

<sup>36</sup> Hawa ha Suão nitsasoko tisapyrëna nikara. Hawa ha uta motsasoziuku tisapyrëna hÿ. Uta Deus zikpehata kytsa wata piwatawyky. Iwahu kytsa kape maha:

“O azo mybo zapeha. Deus zikwy tsiwatawyky” mykaranaha.

<sup>37</sup> Kazo zikpeha kino kasoho motsasoko. Ikiatsa iharere batu ahawabyhy. Iwaze ihumo batu ahaspirikpo – niy.

<sup>38</sup> – Kazo mybarawy ezektsa bo zikpeha. Iharere bo tsikaeni zuba yhÿ tsimykaranaha. Kahumo batu ahaspirikpo tsihik iwatsahi iharere bo tsikaeni zuba yhÿ tsimykaranaha – niy.



39 – Deus harere botu ziwatahanaha anaty hi tsipinymyryknaha. Ana humo ja Deus tuk mywahi tsinapykyryknaha ba zikaha. Deus kasoho motsasoko.

40 Tsinahyryzikponahaze Deus tuk ahawahi tsimynapykyryknaha. Kahumo ahaspirikporêtsa. Iwa Deus papeu humo nitsasoko. Ikiahatsa kino kahumo batu ahaspirikpo iwatsahi tsinahyryzikponahaze Deus tuk ba ahawahi tsipahasapynaha. Ikiahatsa kaharere bo batu yhỹ tsimaha.

41 Kytsa kasoho zuba motsasokonaha. Kasoho motsasokonaha zeka. “O atakta tsimysapyrêta my” maha. Mybarapetu sisopyk. Asahi kahumo tsikaeni zuba siakparawy “O atakta tsimysapyrêta maha” zeka mybarapetu mykaranaha.

42 Ikiahatsa Deus humo batu ahapokzitsi ana humo hi kahyrinymyrêta – niy.

43 – Uta aparakhatsa bo kazo harere humo my. Zikpeha iharere bo hỹ ikykara. Ikiahatsa kahumo batu ahaspirikpo. Usta mozumu zeka ipehabyitatu taharere humo zuba mozumu, ikiahatsa iharere bo yhỹ tsimykaranaha.

44 Deusta atababata zuba my. Batu ustaka. Ikiahatsa Deus ahape my: “O ahamysapyrêtsa tsimaha” anahi batu ahatsihik. Kytsa ahasoho motsasokonahaze “O ahamysapyrêtsa.” Anahi zuba ahakparawy. Iwatsahi kaharere bo batu yhỹ tsimykaranaha kahumo batu ahaspirikpo – niy.

45 – Utakta kazo bo myze ikiahatsa soho batu tyso. “O batu simysapy maha” my. Ikiahatsa Moises nihyrikosokdata harere humo tsimyzu-

rukunaha iwaze “O katsa wasani tsinakaranaha” tsimaha. Batu ba.

<sup>46</sup> Moises nihyrikosokdata kasoho ziwatahaka. Iwaha hi ikiahatsa iharere bo hyỹ tsinakaranaha zeka kaharere bo niwatihi hyỹ tsimynakaranaha.

<sup>47</sup> Iharere ziwatahaka naha bo yhỹ ahabyi zeka kaharere bo kino niwatihi ba hỹ tsimaha – niy.

Iwa Sesus Sudeutsa taparaktsa bo nitsasoko.

## 6

### *Sesus sizubarẽtsa nisidisahawyky.*

<sup>1</sup> Kyze Sesus pihik amakta taba zitsikza. Pihikzotsabyri Karireja inarokota niy. Usa inaro Tiberias niy.

<sup>2</sup> Kytsa sizubarẽtsa iapik niukurunaha. – O Sesus simyitsapyrẽtsa nisizororowyky. Ata bo hi iktsa tsimaha – nikaranaha. Iwatsahi iapik niukurunaha.

<sup>3</sup> Iwaze Sesus hara bo nido. Zinymyrykynahatsa tuk nidyhydyhykynaha.

<sup>4</sup> Paskoa zumukunahatsa hi Sudeutsa myikaha niy. Paskoa inarokoha myikaha bo pororo ziknakaranaha. Hawa Deus taparaktsa nisitsumuẽhĩkĩ anahumo mytsaty ziknakaranaha.

<sup>5</sup> Iwaze Sesus aparakbaha inazuzuknahaze sibo iktsa nikara. Ęryktsa tu izumukunaha niy. Iwaze Sesus Piripi pe niy:

– Haneziky ty sa mydisahawy sizubarẽtsa bo nataskyryk. Haneziky ty sa atsikara nataskyryk – niy.

<sup>6</sup> Sesus ta zuba mytsaty nikara.

– Utakta mysidisahawy. Hawa Piripi mytsaty mykara ana humo hi pinymyryky. Tozeka ja

kahumo tispirikporêta nikara iwatahi Piripi pe iky. “Haneziky ty sa mydisahawy nataskyryk” – niy.

<sup>7</sup> Iwaze Piripi Sesus pe niy:

– Batu kahyrinymyry. Myokyryrsaro byizeka ihuak bara ty ba zioknaha. Pibytuhukutu mytyktseheze tarabaja my zeka batu atsikara ba zioknaha. Tarabajaziu mykara zeka ba zikpyk atsikara tsikaeni zuba aparakbaha bo nyny my – niy.

<sup>8</sup> Iwaze ãdere zinymyrykyta Simaõ Peduru tsy tihi niy:

<sup>9</sup> – O ta zito jabasta mybo izumu. Atahi myt-syhyry wa zuba atsikara, piknutsa petoktsa zuba aha niy. Myzubarêtsa mydisahawy panytu – niy.

<sup>10</sup> Sesus ispe niy:

– Ikiahatsa kytsa pe tsimaha “Tyk bo dyhy dyhy tahaktsa tsimaha” – niy. Nabo towahaditsa tis-apyrêna. Kytsa sizubarêtsa tadyhydyhynaha, Siko miutsa kytsa nidyhydyhykynaha. Wytykyryk sihyrytsa ahatsa niwatihi nidyhydyhykynaha.

<sup>11</sup> Iwaze Sesus atsikara ty okok niyze Deus pe niy:

– Ikia humo ka mykurêtsa – niy. Iwaze atsikara ty zinymyrykynahatsa bo nyny niy. Nyny nikaraze tsizubarêna niyzikzik. Ibiakyrybarawa niukuru. Kytsa sizubarêtsa bo nyny nynyzo nikaranaha. Piknutsa kino niwatihi kytsa bo nyny nikaraze sibiakyhybyitsa wa niukurunaha. Nyny nikaraze tsizubarêtsa niyzikiknaha. Iwaze nyny nynyzo niy kytsa sizubarêtsa bo niy. Kyze kytsa tihi:

– O mysorokrētsa tsikahasorokbyrynaha – ni-aha.

<sup>12</sup> Tahadisahabanahaze Sesus tuk zinymyrykynahatsa pe niy:

– Itsatsakyha ty jerehe peryk bo tsipupunahaktsa! Tsipupunaha zeka wasani my – niy.

<sup>13</sup> Iwaze itsatsakyhy ty arehe ty peryk bo zipupukunaha. Dose mytsyhyry tsawa peryktsa mysipyk naha wa Sesus atsikara ziubara piknutsa tsizubarētsa nisiubara aha.

<sup>14</sup> Iwaze aparakbaha izikwy bo iktsa niahaze asa zuba nipamykysokonaha:

– Aty skaraba Sesus. Atahi kok tubabatu tsis-perykynaha. Atahi Deus sohokotsa babata – nikaranaha.

<sup>15</sup> Iwatsahi Sesus zioiky tsihikiknaha. Ipe maha: – Ikia mypehatsa tsimozik – maha. Sesus hawa mytsaty nikaranaha tsihyrinymyrēta. Iwatahi atazuba niparak. Hara bo nido niy.

*Sesus pihik tsiksukpe buruk niukuru.*

<sup>16</sup> Kyze zunubaze zinymyrykynahatsa pihikzotsabyri bo nisiknaha.

<sup>17</sup> Niahatsahi tsaraha sihezōni taeze kokokorohyk niaha. Kaparanaū bo pihikzotsabyri zikt-sikzakanahaze, miwa buruk tu asa zuba niukurunaha. Sesus batu sibo zuk niy.

<sup>18</sup> Ziturikinahatsa tu atsoko zopoktsa inabybyknaha. Pihik zopoktsa humo atsoko ihiridawy waha.

<sup>19</sup> Turi turi turi nikaranaha. Nokponi turi nikaranaha. Sīko kirometero ziturikinahaze. Kyze atsoko Sesus bo iktsa niaha. Atahi sibo izumuku. Pihik tsiksukpe buruk inaukuru. Harazuk

ahabyita inaukuru. Sibõ izumubahanikize sipy-byrẽtsa nikaranaha.

– Aty skaraba – nikaranaha.

<sup>20</sup> Kyze Sesus ispe niy:

– Ahapyby byihuktsa – niy. Uta hiba Sesus ispe niy.

<sup>21</sup> Iwatsahi Sesus pokso batu sipyby. Ipe niaha:

– Pany! Tsaraha bokta! – niaha. Atsoko tsaraha amykta taba niukurunaha bybybyu niaha.

*Kytsa sizubarẽtsa Sesus ziberikinaha.*

<sup>22</sup> Iwaze kytsa sizubarẽtsa asa kino pihik amykta taba nitarenaha Sesus ziberikinaha. Asa zuba nizapykykynaha Sesus sa hana bo. Jatuka tsaraha estuba zuba hỹ niaha. Zinymyrykynahatsa tsaraha eze kokorohyk niaha. Asa zuba koikny niukurunaha. Sesus situk batu ityny niy.

<sup>23</sup> Nipamykysokonahaze ustsã tsarahatsã bybybyu niaha. Tsarahatsã Tiberias iknyktsã. Haneze Sesus kytsã nisidisahawyky naha bazebabatu tsarahatsã bybybyu niaha.

<sup>24</sup> Iwaze Sesus bo batu zuk ituk zinymyrykynahatsã kino batu niaha tsarahatsã tshitsã kytsã pe niy:

– Sesus sa hana bo zinymyrykynahatsã kino hana bo sa – niy.

– Pihikzotsabyri botu zitsikzanaha – niaha.

– Yhỹ. Tupakta! Katsã kino siapik tatsikza – niaha. Tsarahatsã eze kokorohyk niaha. Turi turi. Kaparanaũ bo bybybyu niaha. Sesus ziberikinaha iwatsahi pihikzotsabyri zitsikzanaha.

*Sesus atsikara hyrity wa.*

<sup>25</sup> Myzubaha iziberikinaha. Iwaze zihobykna-haze ipe niaha:

– O mypehatsa hawa eze sa tsikzumu. Katsa tsikaberikiknaha hỹ – nikaranaha.

<sup>26</sup> – Hawa motsasoko wasani my – Sesus niy.

– Ikiahatsa atsikara tsioknahatsawy tsimozikberikinaha. Ana iwatawy naha humo batu ahahyrinomyry – niy.

<sup>27</sup> – Ahadisahawy bo zuba mytsaty tsinakaranaha hỹ. Ahasorokrẽtsa tsikaha. Usa mydisahawy humo meky watu tsimoziknaha. Ana ty kino hauk tsimaha zeka Deus tyryktsa tsimoziknaha. Tsimyhyrikosokdanaha zeka Deus myzahahyrikpowyzo iwaze ituk tsimynapykyryknaha. Ahawahi Deus tuk tsinapykyryknaha. Utakta inasikta ahawata ikyzik Deus hi kazo. Atahi:

“Kaharere bo hyỹ tsimykara. Iwatahi tadisahawy kino kytsa bo nyny tsimykara” niy. Ikiahatsa kino niwatihi Deus harere bo hyỹ tahaktsa – Sesus niy.

<sup>28</sup> Iwaze Sudeutsa ipe niaha:

– Hawa skaraba katsa Deus harere bo hyỹ tsimykaranaha hawa skaraba Deus mozihikik – niaha.

<sup>29-31</sup> Deus hi:

– Atahi ahabo ipehata humo tyspirikponahaktsa! – niy. – Utakta Deus zikpehata. Kahumo tsimyspirikponaha zeka Deus harere bo hyỹ tsimaha – Sesus niy. Kytsa Sesus pe niaha:

– Taparaktsa myzotsa jerukbara eze atsikara waha ty tahadisahakanaha. Deus harere papeu humo ziwatahaka “Moises bo nipamykysokoze

atsikara waha kytsa bo inatsuku. Atsikara waha bijoikpe ikny kytsa nisidisahawykynaha” – iwa Moises Deus zikwy sibo ziwatawyky.

– Ikia ja. Azikwy ty sa mybo tsipiwatawy tsimykarana. Iwaze zuba ahumo myspirikporētsa tsimoziknaha – tsimykarana.

<sup>32</sup> – Hawa utakta motsaso wasani my. Moises atsikara ty zuba kytsa bo nyny nikara. Ana atsikara morapa hwiwy zubaha niy. Kazo hi atsikara babata kytsa bo nyny mykara. Ana atsikara baba humo kytsa meky watu moziknaha. Deus tyryktsa moziknaha atsikara baba humo – niy.

<sup>33</sup> – Deus atsikara ty mybo nyny my bijoikpe iknyky. Utakta atsikara waha, uta hi bijoikpe iknykta. Uta kino kytsa kahumo meky watu moziknaha niy. Mynahyrikponaha kahumo tahawahi Deus tuk mynapykyryknaha – niy.

<sup>34</sup> Kytsa ipe niaha:

– Anaty mybo nyny tykta! Ana hi mydisahawy mozik. Mydisahawy ty mybo nyny tynakara – nikarana.

<sup>35</sup> Sesus niy:

– Uta hiba atsikara baba niy. Deus myzubaha bo nyny mykara. Ikiahatsa kaharere bo hyỹ tsimykarana. Kahumo tsimyspirikponaha zeka ahakurētsa tsimoziknaha iarapa byitawata tsakurēta. Ikiahatsa kahumo tsimyspirikponaha zeka aharapabyitsa watsa tsimoziknaha. Ahakurētsa tsimykarana.

<sup>36</sup> Ikiahatsa kaharere bo batu yhỹ tsimaha. Utakta kazikwy iwatawyky anabo hi tsynaha. Iwa humo kabo batu yhỹ zikaha.

<sup>37</sup> Aparakbaha kahumo mysipirikpoko ana hi kazo mozihikik. Iwatsahi kahumo sispirikporêtsa mykaranaha. Aty skaraba kahumo tispirikporêta atahi batu tyso “O ikia kahumo batu spirikpo, iwahi ba ziktsaso” – niy.

<sup>38</sup> – Utakta bijoikpe ikny iknasikze Deus harere bo zuba hyỹ mynakara. Hawa sa mozihikik naha humo batu yhỹ iky iwa humo batu zuk. Atahi zikpeha iwatahi iharere bo zuba hyỹ mykara.

<sup>39</sup> Hawa sa Deus mozihikik. Kytsa asahi kahumo mospirikponaha mysipokzitsiki. Iwatsahi kahumo sispirikporêtsa ba ziksiere. Mybarawy mopykze kahumo sispirikporêtsa mynahyrikponahaze Deus tuk tahawahi mynapykyknaha.

<sup>40</sup> Yhỹ kazo harere bo mykara. Aty skaraba katse harere bo hyỹ mykaranaha asahi ituk tahawahi mynapykyryknaha. Mybarawy mopykze kahumo ituk mynahyrikponaha. Ana kino Deus harere bo my hỹ – Sesus niy.

<sup>41</sup> Kyze Sudeutsa asa zuba isoho zisapybyrikinaha. Nitsasokoze:

– Uta hiba atsikara waha, uta hiba bijoikpe iknykta nikara – ana humo hi zisapybyrikinaha.

<sup>42</sup> – Iwatsahi nikaranaha hawa skaraba. O atahi sa Sesus zuba. Sose tse sa nikaranaha. Ije niwatihi tsynynaha. Hawaha ta sa “Utakta bijoikpe iknykta” nikara. Atahi mybarapetu nikara – nikaranaha. Iwa asa zuba zisapybyrikinaha.

<sup>43</sup> Iwaze Sesus ispe niy:

– Awatutahaktsa ahamysapybyrihuktsa! – niy.

<sup>44</sup> Kazo zikwy humo zuba kytsa kahumo sispirikporêtsa. Ata kino zikpeha iwaze kytsa



kahumo myspirikpoko. Mybarawy mopykze asahi mynasihyrizikpo iwa Deus tuk tahawahi mynapykyryknaha.

<sup>45</sup> Tubabatu Deus sohokotsa iharere papeu humo ziwatahakanaha:

– Aparakbaha Deus mysihyrinymyryky – niy. Iharere hi kasoho my. Kytsa kahumo mospirikponaha zeka ana kino Deus kazo ihyrinymyrywy. Ana humo hi mysihyrinymyryky.

<sup>46</sup> Batu aty tohi Deus ityny my. Uta zuba iny atahi zikpeha.

<sup>47</sup> Motsasoko wasani my. Aty skaraba kahumo tispirikporêta atahi mynahyrizikpoze Deus tuk tawahi mynapykyryk niy.

<sup>48</sup> Sesus tihi:

– Utakta atsikara baba my. Kahumo kytsa meky watu mozurukunaha. Deus tyryktsa moziknaha. Kahumo simysapyrêtsa moziknaha.

<sup>49</sup> Taparaktsa ahazotsa niakbakanahatsa jeruk bara eze atsikara waha ziokoknaha. Iwatsa tu niakbakanaha.

<sup>50</sup> Aba atsikara baba soho ahabo motsasoko. Ana ty tsimymydisahanaha zeka ba zikumuzanaha ana hi bijoikpe iknykyry. Deus tuk mywahi tsimynapykyryknaha – niy.

<sup>51</sup> Utakta hi bijoikpe iknykta my. Mybarawy ezektsa bo iknasik. Myzubaha mekywatsatu ziyziknaha iky. Kytsa kahumo sispirikporêtsa mohyrikosokdanahaze Deus tuk tahawahi mynapykyryknaha. Atsikara ty sibo nyny my ana hi katsani. Katsani ty mybarawy ezektsa bo nyny

my. Iwatsahi mynahyryzikponaha asahi Deus tuk tahawahi mynapykyryknaha.

<sup>52</sup> Iwaze Sudeutsa asa zuba nipamykysokonaha.

— Hawa skaraba Sesus tatsani ty mybo nyny my. Hawa skaraba inury taboro — nikaranaha.

<sup>53</sup> Sesus ispe niy:

— Hawa motsasoko wasani mykara. Utakta Deus zikpehata ahawata ikyzik. Ikiahatsa katsani ty hauk ahabyizeka batu Deus tyryktsa zikyzyknaha. Batu meky watu zikyzyknaha. Ikiahatsa kaspu ty tsõ ahahabyizeka batu Deus tyryktsa zikyzyknaha. Batu meky watu zikyzyknaha.

<sup>54</sup> Aty katsani pihauk zeka Deus tyryk mozik. Mekywatu mozuruku. Aty kaspu piku zeka Deus tyryk mozik. Mekywatu mozuruku. Tsimysapyrëta mozik. Mybarawy mopykze mynahyryzikpo.

<sup>55</sup> Iwatahi katsani mydisahawy baba my. Kaspu mypowy baba my.

<sup>56</sup> Aty katsani ty tadisaha zeka atahi katuk mynapykyryk. Aty kaspu piku zeka atahi katuk mynapykyryk. Kahyrikoso zikwy situk mozuruku. Uta kino situk niwatihi mozuruku — niy.

<sup>57</sup> — Kazo humo myspitu tsinakaranaha. Uta zikpehata kazo humo kaspitu. Kazo mozikyryzikpozo my. Atsatu kytsa asahi katsani ty tahadisahakanahaze nasihyryzikpo — Sesus niy.

<sup>58</sup> — Utahi atsikara baba bijoikpe iknykta inasik niy. Tubabatu taparaktsa niakbakanahatsa atsikara waha ty ziknatahadisahakanaha. Atsikara waha bijoikpe ikny inatsukunaha. Aparakbaha

atsikara tisapyrëna ty tahadisahakanaha asahi ni-akbabaiknaha. Utakta atsikara wata. Uta bi-joikpe iknykta iknasik. Kytsa katsani ty tahadisahakanaha zeka Deus tuk tahawahi mynapykyryknaha – niy.

<sup>59</sup> Iwa Sesus Sudeutsa zinymyrykynahatsa wahoro eze nisihyrinymyryky. Kaparanaũ eze nikara.

*Hawa katsa Deus tuk mywahi tsimynapykyknaha.*

<sup>60</sup> Kyze kytsa Sesus tuktsa iharere ziwabykynahaze betsakze nikaranaha. Asa tihi:

– O iharere batu mykparawy. Iharere tsihokdahařëna hỹ. Batu aty tohi yhỹ my – nikaranaha.

<sup>61</sup> Upyk harere ahabyitsa tu iwatatu Sesus tsihyrinymyrëta nikara. Imyspirikpowy soho humo taokanikinaha. Iwaze ispe niy:

– Kaharere tsihokdahařëna niy. Kaharere batu ahakparawy iwatsahi kaharere bo batu ma zikaha – niy.

<sup>62</sup> – Utakta iknasikta ahawata ikyzik. Kahumo batu ahaspirikpo iwatahi kaharere tsihokdarëna. Utakta bijoikpe bo kazo bo piksizozze anabo hi iksa tsimaha ja kaharere bo yhỹ tsimaha.

<sup>63</sup> Deus hyrikoso humo aparakbaha meky watu moziknaha. Aparakbaha ihumo Deus tuk siwahi mynapykyryknaha. Kytsa zuba zeka batu Deus tuk mynapykyryknaha. Batu zikaha. Iwa zeka kaharere bo hỹ tsimaha zeka Deus hyrikoso ahatur my. Iwaze ikiahatsa Deus tuk ahawahi tsimynapykyknaha.

64 Wastuhu kaharere bo ba hỹ zikaha ana humo hi kahyrinymyrẽta – niy. Iharere iakparawy byitsa soho humo botu zinymyry. Estuba sisukyrytsitsa bo zioқтыhyrykta humo kino tsihyrinymyrẽta. Zinymyrykynahatsa nisinaropykykze tsihyrinymyrẽta.

65 Iwatahi ahape iky.

– Tapara kazo yhỹ my iwaze kytsa kahumo sispirikporẽtsa. Asa zuba kazo harere bo hyỹ mahaze asahi kahumo sispirikporẽtsa moziknaha – niy.

66 Iwa Sesus tuktsa sizubarẽtsa iharere bo batu yhỹ niaha. Batu iapik pãozo.

67 Kyze Sesus tuk zinymyrykynahatsa dose tsa pe niy:

– Ikiahatsa ja. Ikiahatsa kino sa tsipikarikiknaha – niy.

68 Iwaze Simaõ Peduru ipe niy:

– Mypehatsa aty hapik sa tsimaha. Ikia humo mekywa tu tsimoziknaha. Hawa tsimyhrykosokdanahaze Deus tuk mywahi tsimynapykyknaha anahi ikia zuba tsikmyhyrinymyryky.

69 Iwatsahi aharere humo myspirikporẽtsa. Ikia zuba Deus zahapehata tsimaha. Tsamysapyrẽta – niy. Iwa Simaõ Peduru niy.

70 Iwaze Sesus ispe niy:

– Utakta dose mytsyhyrytsa hawa zinymyrykynahatsa iksiwatawyhik. Estuba ahatukta Satanas mozik – niy.

71 Sesus Sudas soho nitsasoko. Sudas Simaõ Iskariotses tse niy. Atahi Sesus sukyrytsitsa bo pioktyhyryk niy.

## 7

*Sesus tatukytsa tuk.*

<sup>1</sup> Kyze Sesus Karireja bo niukuru. Sudeja bo ka batu pão. Sudeutsa taparaktsa zibeze tsihikik-naha. Iwatahi Sudeja bo batu pão. Karireja eze zuba niapykyryk.

<sup>2</sup> Tapara Sudeutsa myikaha bo pororo zik-nakaranaha. Taparaktsa jerukbara eze tahaparik zizikinaha naha bo hi mytsaty ziknakaranaha. Iwaze amyikaha bytykara isiparik bo niapykyryk-naha.

<sup>3</sup> Iwaze Sesus tukytsa ipe niaha:

– Sudeja bo ikiakta tsiksikta. Anabo tsimyzeka hawa tsimykara atuktsa iktsa maha. Azikwy bo iktsa maha.

<sup>4</sup> Tsipany tsihikik zeka ba okpitsĩkĩ ziky. Atahi izikwy ty sizubarẽtsa bo mysiwatawyky. Iwatahi Sudeja boktsa – niaha.

<sup>5</sup> Itukytsa kino ihumo sispirikpobyitsa nikaranaha iwa ipe nikaranaha.

<sup>6</sup> Sesus ispe niy:

– Uta aba amyikaha bo ba zikumu. Ikiahatsaktsa myikaha bo zeka wasani my tsimykarana.

<sup>7</sup> Aparakbaha asahi Deus harere bo batu yh̃y zikaha kahumo tahakyrikinaha. Ikiahatsa humo ka batu siakryi. Uta kahumo zuba sakyrirẽtsa nikaranaha. Utakta ispe my: “Ikiahatsa ahamys-apybyitsa tsikykarana” my iwatsahi kaharere humo tahakyrikinaha.

<sup>8</sup> Ikiahatsaktsa simyikaha boktsa! Utakta ba zikparak. Abaka ba zikumu. Bykyze zuba my – niy. Iwa Sesus tatukytsa pe niy.

<sup>9</sup> Iwaze itukytsa simyikaha bo niukurunaha. Sesus Karireja eze nitare.

*Sesus simyikaha bo.*

<sup>10</sup> Kyze Sesus niwatihi simyikaha bo niy. Kytsa bo batu tyso. Ity sohabyita tu simyikaha bo niukuru. Kytsa batu sihyrinymyry. Sipapatu niparak.

<sup>11-13</sup> Sudeutsa taparaktsa simyikaha bo niukurunaha. Asahi myikaha eze Sesus ziberikinaha. Asahi:

– Sesus sa hana bo – nikaranaha. Aparakbaha isoho nitsasokonahaze Sudeutsa taparaktsa batu siwaby tsihik. Iwatsahi akbyibatu zuba nipamykysokonaha. Asaktsa:

– O tahi tsimysapyrëta – nikaranaha. Utsa kytsa:

– O batu. Batu imysapy. Atahi kytsa bo nisispihikbataka – mybarapetu nikaranaha. Iwa Sesus soho nitsasokonaha.

<sup>14</sup> Iwaze Sesus zumu. Deus wahoro zubata bo nitsuk. Anaeze iziakbata kytsa nisihyrinymyryky. Simyikaha asiba nepykze nisihyrinymyryky.

<sup>15</sup> Taparaktsa Sudeutsa iharere batu siakparawy. Asa kino:

– Hawa hãta skaraba Deus papeu humo zinymyryba. Nimyhyrinymyrykynahatsitsa batu tyhyrinymyry iwata tu tsihyrinymyrëta. Batu wasani my – nikaranaha.

<sup>16</sup> Iwaze Sesus ispe niy:

– Amy ty pahahyrinymyryky kaharere bara zikpehata harere zuba pinymyryky. Iharere zuba sizubarëtsa mysihyrinymyryky – Sesus niy.

<sup>17</sup> Ikiyahatsa hi:

– O amy ty nisihyrinymyryky iharere zuba ja – tsimykaranaha. Utakta ahape my:

– Aty sa Deus harere piwaby tsihikik anahi kaharere baba hi pihyrinymyryky. Atahi kaharere Deus kabo ziny ny ana humo hi tsihyrinymyrẽta.

<sup>18</sup> Wastuhu kytsa tahaharere ty zuba nisihyrinymyrykynaha. Ustsã kytsa batu. Deus harere humo zuba nisihyrinymyrykynaha. Asahi tahaharere ty zuba nisihyrinymyrykynaha. – Ziwabynahatsã sisoho:

– O siharere wasani my, myhyrizikwanitsã moziknaha – nikaranaha. Iwa kytsã sisoho mot-sasokonahaze anahi mozihikiknaha. Kytsã Deus harere ty zuba nisihyrinymyrykynaha. Aparakbaha hi:

– O Deus harere tisapyrẽna – nikaranaha. Ana soho humo hi sakurẽtsã nikaranaha. Anahi Deus harere soho piwaby tsihikiknaha. Asã zuba wasani mykaranaha. Batu mybarapetu mykaranaha.

<sup>19</sup> – Tubabatu Moises nihyrikosokdata ahadiritsã bo Deus harere ty nisihyrinymyryky. Batu aty tohi iharere bo hyỹ ziknakara. Amy humo sa ikiahatsã tsipikbeze tsihikiknaha – niy. Aparakbaha Deus wahoro zubata eze tu Sesus harere ziwabykynaha.

<sup>20</sup> – O ikia paikpa mytsaty tsimykara. Hyrikoso isapybara atuk my. Aty sa pabezetsihikik – nikaranaha. Iwa kytsã sisukmotsã nikaranaha. Serusarẽhe ezektsã sihyrinymyrẽtsã. Sudeutsã taparaktsã Sesus pibeze tsihikiknaha anahi sihyrinymyrẽtsã.

21 – Sudeutsa byrywy eze kazikwy ty pahawatawyky. Kazikwy humo nipybybaiknaha. Kazikwy bo iktsa tsimykarannahaze, “O batu amysapy my. Atahi byrywy eze tarabaja niy” tsimykarannaha – Sesus niy.

22 Tubabatu Moises Deus harere ziwatahaka – Ahahyrytsa makuskyrytsa tysipiakzyzyknaha. Siwatahawwy mozik atahi Deus tyryk niyzik ziwatawy. Ikiahatsa ahabykyhytsa tabyrywy eze tsinasipiakzyzykyknaha.

23 Tabyrywy ahaskyrywytsa tysipiakzyzykyknaha Moises harere humo. Iharere bo yhỹ tsimyz-ihikiknaha iwatsahi tysipiakzyzykyknaha.

Uta maku izororo baba mybyrywy eze ana humo hi ja tsikahakyrikinaha. Amo humo ja tahakyrikinaha – niy. – O atahi mybyrywy eze tarabaja my. Maku zizororowyze tarabaja nikara. Batu amysapy tsimy – tsikykarannaha.

24 Sizubarẽtsa tsimytsasokonaha:

– Atahi batu wasani my mybarapetu tsimykarannaha niy. Hawa tohi mykara batu tyso “O atahi batu imysapy my”. Awatutaha – Sesus niy.

### *Sesus hi Deus zipehata.*

25 Serusarẽhe eze wastuhu kytsa ni-pamykysokonaha:

– Atahi sa pibeze tsihikiknaha – nikaranaha.

26 – Atahi kytsa okze motsasoko. Batu aty tohi ity sohometu. Tozeka ja taparaktsa Sesus humo sispirikporẽtsa. Tozeka ja Sesus Deus zipehata ana humo hi yhỹ mykarannaha – nikaranaha.



<sup>27</sup> Iwa wastuhu Serusarêhe ezektsa nikaranaha. – Deus zipehata mozumuze batu aty tohi hana iknykta ja zikaha. Katsa zuba ihumo myhyrinymyrêtsa iwatahi batu Deus zipehata my – nikaranaha.

<sup>28</sup> Iwaze Sesus sizubarêtsa Deus wahoro zubata isturupeze nisihyrinymyryky. Opykani haty nisihyrinymyryky:

– Ikiahatsa batu ahanyhỹ. Ikiahatsa hana ikny ta ja izumu ba tsimykaranaha. Deus kazo zikpehatawy ikzumu hỹ. Ba ahabyizeka ba zikzumu. Atahi wasani mykara. Ikiahatsa batu ahahyrinyhy.

<sup>29</sup> Úta zuba iny. Ibaze iknapykyry tatu my. Atahi mybarawy bo zikpehatawy – Sesus niy.

<sup>30</sup> Iwaze kytsa nizokbatsi tsihikiknaha. Sisukyrytsitsa bo itsipa humo tsioktyhyknaha nikaranaha, batu nabaze ity paik ahabyitsa. Deus – Batu yhỹ. Katse Sesus ba zioktynaha – niy. Iwatsahi itsipa humo batu ity oktyhyryk.

<sup>31</sup> Kytsa sizubarêtsa ziwabynahaze iharere bo yhỹ nikaranaha ihumo sispirikporêtsa. Ziwabynahatsa hi:

– Deus zipehata zikwy tsipinynaha. Iwatsahi Deus zipehata my mytsaty tsimykaranaha – niha.

*Deus wahoro zubata perytsitsa Sesus pioktykyzyknaha.*

<sup>32</sup> Iwaze Pariseutsa parakbaha Sesus nizekyryknaha. Kytsa sizubarêtsa Sesus soho nitsasokonahaze iwatsahi ziokttyhyryk tsihikiknaha. Pariseutsa parakbaha, Deus wahoro zubata eze ziknapamykysokonahatsa

taparaktsa iwatsa asahi Deus wahoro perytsitsa nisipehakanaha. Sesus itsipa humo tyzioktyhyknaha nisipehakanaha.

<sup>33</sup> Iwaze Sesus niy myzubaha bo:

– Utakta ahabaze jokbohatu mopykyrykspyk. Aiba zuba kapehatsa bo piksizo.

<sup>34</sup> Iwaze tsipikberinaha ba zik zikahanaha. Kazo bo piksizoze ba kapiktu zikaha – niy.

<sup>35</sup> Sudeutsa asa zuba nipamykysokonaha:

– Hana bo skaraba mykara katsa ba zik zikahanaha. Tozeka ja ustsya kytsa bo my. Bipyritsa bo ja mykara. Sudeutsa nanabyitaba mynapykyryk Kerekatsitsa baze mynapykyryk. Tozeka ja Kereka ezektsa mysihyrinymyryky – nikaranaha.

<sup>36</sup> Tapara mype niy:

– Tshipikberikinaha bazik zikaha naha. Piksizoze ba kapiktu zikaha niy. Iharere myhumo tsihokdaharēna – nikaranaha.

*Deus hyrikoso myhumo pupuputsa hyrity wa.*

<sup>37</sup> Kyze Sesus sizubarētsa bo nipamykysokozo. Opykani haty nipamykysoko. Simyikaha nepykosohokoze nisihyrinymyrykyzo. Nawa zuruze ispe niy:

– Aty tsiarapukrēta zeka pihik piku. Aty meky watu mozik tsihikik zeka kabo tyzumukta. Iwaze tsipikuze hi kahumo tispirikporēta tsimysapyrēta mozik – Sesus niy.

<sup>38</sup> – Pihik waha ituk mynapykyryk. Pupuputsa wa mykara. Asahi kaharere bo hyŷ mykaranaha kahumo sispirikporētsa. Hawa kytsa pihik pikuikiknaha utakta situk mynapykyryk. Iwatsahi mekywa tu moziknaha. Simysapyrētsa.

Iwa Deus harere papeu humo botu iwatahaha – Sesus niy.

<sup>39</sup> Sesus iwaze nitsasoko Deus hyrikoso soho ziwatawyky. Deus hyrikoso Sesus tuktsa tuk my-napykyryk. Deus sibo myzipeha tsihikik. Tapara Deus hyrikoso myzipeha iwaze Sesus tuktsa isoho motsasoko. Mybarawy bo mynasik. Tapara Sesus Deus bo piksizozze iwaze hi Deus hyrikoso mybarawy bo atsoko mynasik. Tapara Sesus Deus bozo my. Bykyze Deus hyrikoso mybarawy bo myzipeha niy.

*Kytsa sizubarẽtsa metutu nikaranaha.*

<sup>40</sup> Kytsa sizubarẽtsa asa zuba Sesus soho humo nipamykysokonaha. Mektsatu nitsasokonaha. Wastuhu kytsa nikaranaha:

– Atakta Deus sohokotsa babata, atahi taperyky hỹ – nikaranaha.

<sup>41</sup> Utsa nikaranaha:

– Atakta Deus zipehata Kiristu my – nikaranaha. Utsa:

– O batu, Deus zipehata Karireja ezekta ja nikaranaha.

<sup>42</sup> Deus harere papeu humo Sesus soho botu iwatahaha nikaranaha. Ziwatahaka:

“Deus zipehata Dawi tsekoka my Berẽhe eze mopuruk. Sudeja eze my.” Iwa Deus harere niy – nikaranaha.

<sup>43</sup> Iwaze kytsa isoho humo niharapepehakanaha. Mekywatu siharere nikaranaha.

<sup>44</sup> Iwaze Deus wahoro perytsitsa Sesus zioқты tsihikiknaha. Asahi batu itsipa humo ity okty.

*Sudeutsa taparaktsa Sesus humo batu sispirikpo.*

<sup>45</sup> Kyze Deus wahoro perytsitsa. Pariseutsa bo ziksizonaha. Zumukunahaze nisipehakanahatsitsa ispe niaha:

– Amo sa Sesus ty batu tyoktyhyryk – niaha.

<sup>46</sup> Deus wahoro perytsitsa hi:

– O batu aty tohi iharere wata my. Iharere tisapyrëna hÿ. Iwatsahi itsipa humo batu tyoktyhyryk – nikaranaha.

<sup>47</sup> Pariseutsa tihi:

– Ikiahatsa kino niwatihi. Iharere humo ja zahaspirikpoko – niaha.

<sup>48</sup> Sadusitsa aparakbaha taparaktsa ihumo batu sispirikpo. Batu estuba zikino ihumo batu ispirikpo. Pariseutsa niwatihi ihumo batu sispirikpo.

<sup>49</sup> Kytsa sizubarëtsa Moises harere humo batu sihyrinomyry. Asa zuba ihumo sispirikporëtsa. Deus ispe niy:

– Ikiahatsa batu ahamysapy tsimaha. Sinini ykarawy bo pahapeha my – Pariseutsa niaha.

<sup>50</sup> Maku Nikodemus ituktsa niapykyryk. Tapara atahi unata Sesus bo nikozone.

<sup>51</sup> Atahi tatuktsa pe niy:

– Katsaktsa Sesus harere batu mywabyhy. Iharere ty waby ahahabyizeka ba ibete hÿ zikaha. Batu ziktsasonaha: “Atakta batu imysapy my. Iwatahi sinini ykarawy bo Deus pipeha” niy. Iwa tubabatu nihyrikosokdata Moises mydiritsa nisihyrinomyry – niy.

<sup>52-53</sup> – O ikia niwatihi hazi nikaranaha. Ikia kino ja Karireja ezekta nikaranaha. Iwa tsimyt-sasokoze Deus papeu humo ihyrinomyrybyita wata – nikaranaha. Taparaktsa hi:

– Deus sohokotsa batu Karireja ikny ta my. Deus papeu humo tsinyziukukta tsimy. Iwatahi atakta Sesus batu Deus sohokotsa my – nikaranaha. Kyze tahawahoro bo ziksibanaha.

## 8

### *Wytyk sizubatsa oke.*

<sup>1</sup> Sesus Oriwerejatsa hara bo niukuru.

<sup>2</sup> Miwa botu Deus wahoro zubata bozo niy. Kytsa sizubarëtsa Deus wahoro bo niaha. Sesus ziwabykynaha iwatsahi izumukunaha. Kytsa sizubarëtsa izumunahaze isitazahaeze nidyhyky. Iwaze nisihyrinymyryky.

<sup>3</sup> Iwaze Deus harere watahatsitsa Pariseutsa niwatihi iwatsa Sesus bo zumunaha. Wytyk ibo zioqtyhyryknaha. Atatsa ipyitsakatatsa tu sizubarëtsa ziknasihewabykyryk. Pariseutsa nizokparakanahaze sibo iktsa niaha. Iwatsahi wytyk zioqtyhyryknaha. Kytsa sizubarëtsa tazahaeze atatsa Sesus bo zioqtyhyryknaha. Niritohoko.

<sup>4</sup> Iwaze Sesus pe niaha:

– O myhyrinymyrykytsa atatsa wytyk usta ibarikta byita tu zipyrirykyknahaze sibo iktsa tsikaha. Iwatsahi atatsa abo tsikzioqtyhyryknaha.

<sup>5</sup> Tubabatu nihyrikosokdata Moises myzotsa bo nitsasoko. Papeu humo ziwatahaka. “Wytyk usta maku zikzipyrirykyk zeka atatsa ty ka bohitaha. Haraharetsa ty tsibezenaha” iwa Moises botu myzotsa nisihyrinymyry. Ikia ja, Hawa sa tsimy – nikaranaha.

<sup>6</sup> Ana hi nitsasokonahaze – Tahaharere tsyhyryzehe nikaranaha iwatsahi nizapykykynaha

– mytsaty ahabyitsa nikaranaha. Asa zuba ni-pamykysokonaha:

– O iharere meky watu my. Amy ty Moises botu ziwatahaka batu yhy my iwaze batu imysapy my – iwa mytsaty nikaranaha.

Iwaze Sesus okmymy hãtatu wytyk bo tatsyhyry tyty tapauk baze ziwatahaka. Atatsa bo ka batu iktsa niy.

<sup>7</sup>Hawa sa tsimy ipe nikaranaha. Kyze niziktsut-suhuku tatu kyik niy sibo iktsa niy. Ispe niy:

– Ikiahatsa baze aty imysapyrãta zeka atahi harahare tapara mopapyk – niy.

<sup>8</sup>Iwaze wytyk bo okmymyzo niy tatsyhyry ty ziwatahakazo.

<sup>9</sup>Kytsa Sesus harere ziwabynahaze sisikpy-byrãtsa nikaranaha. Iwatahi taparakta maku puke niy. Iwaze estuba estuba zuba zipokonaha. Ziharawyta iypykbyita puke niy. Sizubarãtsa puke puke niaha. Iharere humo sisikpybyrãtsa iwatsahi zipobaiknaha. Atatsa zuba Sesus tuk nitare, niriktohoko.

<sup>10</sup>Sesus kyikzo atatsa bo iktsaziu niy. Ipe niy:

– O wytyk kytsa sa hana bo. Asahi ape “Ikia batu amysapy” nikaranaha. Asahi haraharetsa ty zabezekyzykynaha. Kytsa sa hana bo – niy.

<sup>11</sup>– O mypehatsa zipobaiknaha. Aba batu aty tohi kabo “Ikia batu amysapy” mykaranaha – niy. Sesus ipe niy:

– Uta kino niwatihi. Abo batu tyso “Ikia batu amysapy my” iwa abo batu tyso. Tsiksiktsa abaka awatu tynakara! – Sesus niy.

*Sesus harere humo kytsa meky watu mozik-naha.*

<sup>12</sup> Kyze Sesus kytsa sizubarëtsa, Deus wahoro zubata eze nisihrinymyrykyzo. Ispe niy:

– Deus harere ty pahahyrinymyryky Deus harere bo hyỹ tsimykaranaha zeka wasani tsi-moziknaha. Asahi kahumo mospirikponaha zeka imysapybara pimoewynaha Deus mysiokzo. Asa kino kahumo tisapyrëna mynakaranaha, meky watu moziknaha hỹ – nikara. Iwahatyhi ispe niy.

<sup>13</sup> Kyze Pariseutsa tihi:

– O ikia asoho zuba tsimytsasoko. Asoho tsimyt-sasoko zeka batu amysapy tsipimyiki – mybarapetu nikaranaha.

<sup>14</sup> Sesus ispe niy:

– Utakta wasani mykara. Kasoho motsasoko zeka wasani my. Ikiahatsa hana ikny tsikzumunaha humo batu ahahyrinymyry. Hana bo tsimykurunaha humo batu ahahyrinymyry. Utakta kahyrinymyrëta. Hana ikny ikzumuku naha humo kahyrinymyrëta. Hana bo moparak naha humo kahyrinymyrëta. Iwatahi wasani mykara – niy.

<sup>15</sup> – Kytsa harere ty tsiwabyziu zeka ikiahatsa tihi: “O tahi batu wasani” tsimykaranaha. Iharere tsihokdaharëna humo iwa tsimykaranaha. Utakta batu ka moso. Iwata humo hi batu tyso kytsa harere zuba.

<sup>16</sup> Motsaso zeka ikahatsa batu ahamysapy kaharere ahasoho ty wasani mykara. Atakta zikpeha atahi astsatu motsasoko. Uta zuba byita tu mykara. Kazo zikpeha katsaktsa harapetok tsimykaranaha

<sup>17</sup> Moises taparaka ziwatahakaze. Kytsa petoktsa atsatu motsasonahaze siharere piwabynahatsa siharere soho: “O wasani mykaranaha” maha.

<sup>18</sup> Uta hi kasoho motsasoko. Kazo kino niwatihi. Atahi zikpeha kasoho motsasoko. Kasoho tsimytasokonaha. Iwa atsatu petoktsa kasoho motsasokonaha – niy.

<sup>19</sup> Kyze ipe niaha:

– Haneze skaraba azo – niaha.

– Uta batu ahanyhy tsimykaranaha. Kazo kino niwatihi batu ahanyhỹ. Tspiknynaha zeka kazo kino niwatihi tsipinynaha. Iwaze katsa tsimymynynaha – niy.

<sup>20</sup> Anaharere humo kytsa sizubarẽtsa bo nitsasoko. Sesus Deus wahoro zubata eze kytsa sizubarẽtsa okyrysaro suk baze nisihyrinymyryky. Sisukyrytsitsa itsipa humo batu ity oktyhyryk. Deus sibo batu yhỹ niy iwatsahi Sesus tsipa humo batu ity oktyhyryk.

### *Aty skaraba Sesus.*

<sup>21</sup> Sesus ispe niyzo:

– Uta piksi. Ikiahatsa tsipikberinaha zeka ba zikzikahanaha. Uta pahatsumuẽhĩ tsihikik. Ba zikzikahanaha. Tsimyhyrikosokdanahaze Deus ahasapybyitsa tsimykaranaha ba ziksiokzohik. Ikiahatsa ba kapik pão tsimaha.

<sup>22</sup> Sudeutsa asa zuba nipamykysokonaha:

– Ata mybo nitsasoko “hana bo sa piksi batu iapik pão zikaha” nikara. Tozeka ja atatu tabeze. Tabeze zeka katsa batu iapik pão zikaha – nikaranaha. Iwa asazubatsa tu nikaranaha.

<sup>23</sup> Sesus nikarazo:



– Ikiahatsaktsa mybarawy ezektsa. Utakta Deus iknykta ikzumu. Hawa kytsa mytsaty mykaranaha ikiahatsa niwatihi atsatu mytsaty tsimykaranaha. Utakta batu. Kazo mytsaty mykara naha ty zuba mytsaty mykara kazo wata my.

<sup>24</sup> Botu ahabo iktsasoko. Tsimyhyrikosokdanahaze Deus ahamysapybyi ty tsikykaranaha ba zahaokzo. Kahumo ahaspirikpo ahabyizeka tsimyhyrikosokdanaha katuk batu tsimynapykyryknaha. Utakta Deus zikpehata. Kawahi mynapykyryk. Kaharere bo yhÿ ahabyi zeka iwaze tsimyhyrikosokdanahaze ahamysapybyi ty tsikykaranaha ba zahaokzohik – niy.

<sup>25</sup> – Aty skaraba ikia – niaha. – Uta botu ahabo iktsaso – Sesus niy.

<sup>26</sup> – Ahabo puëtsik motsaso tsihikik. “Ahaharere hi batu wasani tsimaha” anahi motsaso tsihikik. Atahi zikpeha iharere zuba motsasoko. Iharere wasani my. Batu mybarapetu ziky. Anaty hi zikyrinymyryky atsatu kytsa sizubarëtsa bo motsaso – niy.

<sup>27</sup> Nitsasokoze zikpehata tazo soho nitsasoko. Sudeutsa ana humo hi batu siwabyziuhu. Iharere sihumo tsihokdaharëna my.

<sup>28</sup> Utakta kytsa wata Deus zikpehatawy. – Iharapatawyhyta humo tsibezenhaktsa! – tsimykaranaha. Iwa tsipikbezenaha. Bykyze tsipikbezenahaze ikiahatsa tihi:

– O ataktsa wasape mykara tawahi mynapykyryk tsimykaranaha. O atakta Deus zipehata tsimykaranaha. Atahi tazo harere zuba

aparakbaha nisihyrinymyryky – tsimykarana. – Hawa tazo nitsasoko yhỹ niy. Taharere ty ka batu tyso. Tazo harere zuba nitsasoko anahi nisihyrinymyryky – tsimykarana.

<sup>29</sup> Tahy zikpeha katuk mynapykyk. Iharere bo hỹ kasopyk – atahi kapokzitsikitsa. Ba zikare – niy.

<sup>30</sup> Iwatsahi kytsa sizubarẽtsa iharere bo hỹ nikarana ihumo sispirikporẽtsa nikarana. Asahi ziwabykynahatsa ihumo sispirikporẽtsa nikarana.

*Kytsa hawa sakurẽtsa moziknaha.*

<sup>31</sup> Iwaze Sesus Sudeutsa pe niyzo ihumo sispirikporẽtsa asa bo hi nitsasoko ispe niy:

– Kaharere bo hỹ tsimykarana zeka katyryktsa tsimoziknaha. Katuk zinymyrykynahatsa babatsa tsimoziknaha.

<sup>32</sup> Amy ty wasani tsipinymyrykynaha, iwatsahi meky watu tsimoziknaha. Taparaka ahapokzitsiukbyitsa tu ahamysapybyitu tsikykarana. Abaka mahani ahapehatsa myzahapokzitsiki iwatsahi ahapunihikrẽtsa tsimoziknaha – niy.

<sup>33</sup> – O batu aty tohi mypehatsa humo mymypokzitsiubyitsa. Katsaktsa nihyrikosokdata Abarão tsekokatsa tsimaha. Amy humo sa mybo tsimy. “Kytsa mypehatsa humo mymypokzitsiubyitsa” tsimykara. Batu – nikarana.

<sup>34</sup> Sesus ispe:

– Kaharere wasani my. Wabyziutaha! Hawa batu mysapy tsimykaranaha. Ahasopyksapybyitsa tsimykaranaha zeka iwatsahi ahapokzitsiukbyitsa tsikyziknaha. Ahapehatsa Satanas mozik. Iharere bo ma tsikykaranaha iwatsahi ahasopyksapybyitsa tsimykaranaha. Ba hawa tohi zikaha. Iwatsahi ahahumo ahapokzi byitsa niy.

<sup>35</sup> Mypehatsa kytsa nasipokzitsizo. Asahi sipokzitsiuk byitsa itukytsa nymyhyrybyita mykaranaha. Bipyritsa zuba. Tatse batu, atahi mymypokzitsiki. Mypehatsa tse humo mymypokzitsiki.

<sup>36</sup> Utakta Deus tse my. Iwatahi kahumo tsimyspirikpokonahaze Deus tyryktsa tsimoziknaha. Iharere bo zuba hyỹ tsimykaranaha. Tapara Satanas ahapehatsa tserikiknaha, iharere bo ka batu yhyỹ tsimaha iwatsahi ahasopyksapybyity tsikykaranaha tsimoewynaha – tsimykaranaha. – Uta ahapehatsa mozik kahumo ahapunihikrẽtsa tsimoziknaha.

<sup>37</sup> Ikiyahatsa nihyrikosokdata Abarãõ tsekokatsa tsimaha ana humo hi kahyrinymyrẽta. Kaharere bo batu yhyỹ tsimykaranaha. Amo sa tsikbeze tsihikiknaha. Iwatsa tu Abarãõ tsekokatsa tu tsikbeze tsihikiknaha.

<sup>38</sup> Kazo zikwatawyky atsatu motsasoko. Ikiyahatsakta Satanas tyryktsa tsikyziknaha. Atahi ahazo my. Hawa mykara atsatu tsimykaranaha – Sesus niy.

<sup>39-40</sup> Kytsa tihi:

– O batu, katsakta Abarãõ tsekokatsa. Nihyrikosokdata Abarãõ mydiri mysopyk – niaha.

Sesus ispe niyzo:

– Deus harere kabo nitsasoko. Iharere humo zuba zahahyrinymyryky. Ikiyahatsa tsikbezekyzykynaha kaharere humo batu ahakparawy niy. Deus harere baba batu ahakparawy. Nihyrikosokdata Abarão Deus harere bo hyỹ ziknakara. Ikiyahatsa Abarão tsekokatsa tsimaha zeka iwata Deus harere bo hyỹ tsimaha. Ikiyahatsa Satanans wata tsikyzyknaha.

<sup>41</sup> Hawa nikara atsatu tsimykaranaha – niy.

– O katsa batu Satanans watsa tsimaha Deus zuba myzo. Iharere bo zuba hyỹ tsimykaranaha – mybarapetu niaha.

<sup>42</sup> Sesus:

– Deus zikpeha. Uta mybarawy bo iknasik – niy. Deus ahazo my zeka ikiyahatsa tihi:

– O zipehata tsimysapyrẽta tsimykaranaha – niy.

<sup>43</sup> – Kaharere bo batu yhyỹ tsimykaranaha. Kaharere bo batu ma zikaha. Iwatsahi batu wabyziu zikaha aha humo kaharere tsihokdaharẽna my niy.

<sup>44</sup> Ikiyahatsaktsa Satanans hyrytsa tsikyzyknaha. Hawa mykara ikahatsa kino niwatihi tsimykaranaha. Tahy imysapybyita mynakara. Ikiyahatsa ahasopyksapybyitsa tsinakaranaha. Hawa mykara yhyỹ ahasopyk. Ataharere humo hi kytsa naharapebakanaha. Deus bijoikpe mybarawy nizuknize ata harere humo hi nahapebakanaha. Aba kino niwatihi kytsa nasiakzokotu. Deus harere babata bo batu yhyỹ mykara. Batu wasani ziky tsimyspihikbatarẽta. Pispihikbatakaze hawa mozihikik atsatu mykara.

Kytsa mymypsihikbatakanahaze ihyrytsa moziknaha – Sesus niy.

<sup>45</sup> – Uta wasani motsasoko. Iwatsahi ikiahatsa kahumo batu ahaspirikpo – nikara.

<sup>46</sup> Ba amy tohi ziksonaha:

– O ikia tsimymysapybyriki – my. – Kaharere wasani ziky iwatsa tu kaharere bo batu yhỹ zikaha tsimykaranaha.

<sup>47</sup> Deus tyryktsa iharere bo hỹ mykaranaha. Ikiahatsaktsa Deus tuktsabyitsa tsimaha. Iwatsahi Deus harere bo batu yhỹ tsimynakaranaha – nikara. Iwa Sesus taparaktsa bo nitsasoko.

*Sesus iwaze Abarão.*

<sup>48</sup> Sudeutsa Sesus pe niaha:

– O ikia hyrikoso sapybara humo tsimytsasoko. Batu amysapy tsimy. Paikpa mytsaty tsimykara. Samarija ezektsa wata batu amysapy tsimy – mybarapetu nikaranaha.

<sup>49</sup> Sesus tihi:

– Aharere batu wasani my. Hyrikoso sapybara humo batu tyso. “Kazo zuba wasani mykara”. Ikiahatsa tsiziksohometukunaha.

<sup>50</sup> Batu katyso “Utakta wasani my.” Deus zuba moziksapywyky “Atakta wasani” mykara. Kytsa kasoho humo piksohometukunahaze Deus tihi: “O aharere batu ahamysapy tsimykaranaha” – niy.

<sup>51</sup> – O kaharere tsiwabytoktonahaktsa. Aty kaharere bo hỹ mykara zeka atakta kazo tuk tawahi mynapykyryk – niy.

<sup>52</sup> Iwatsahi Sudeutsa ipe niaha:

– Abaka tanymyryky h̃y. Ikiahi hyrikoso sapybara humo tsimypamykysoko. Tubabatu

taparakta Abarãõ nihyrikosokda. Deus sohokotsa kino niwatihi nihyrikosokdanaha. Niakbabanaha. Ikia hi motsasoko “Aty kaharere bo hyÿ mykara Deus tuk tawahi mynapykyryk. Siakbatsa ba zikakpykyknaha kaharere humo hyÿ my” tsimy – nikaranaha.

<sup>53</sup> – Tubabatu Abarãõ mydiri nihyrikosokda. Abarãõ atatuze nitsasokoze kytsa iharere ziwabyziukunaha. Tubabatu siakbatsa Deus sohokotsitsa nihyrikosokdanaha. Asahi nitsasokonahaze kytsa siharere ziwabyziukunaha. Ikia ja. Tozeka ja tsimytsasokoze kytsa aharere piwabyziukunaha. Aty skaraba tsimy – nikaranaha.

<sup>54</sup> Sesus ispe niy:

– Utakta kasoho tu motsasoikik zeka “O uta zuba wasani hi mykara” Anahi mykara zeka batu aty tohi kaharere piwabytoktokoro. Kazo kasoho humo moziksapywyky. “O wasani hÿ mykara” – my. Ikiahatsa kazo soho tsimykaranaha zeka – O atakta mypehatsa my tsimykaranaha. Iwa kazo soho tsimykaranaha – niy.

<sup>55</sup> – Ikiahatsa hi batu Deus ahanyhy tsimykaranaha. Utazuba iny. Motsasoko zeka “batu kanyhy my” mybarapetu mykara. Ikiahatsa watsa mozik. Utakta iny. Iharere bo hyÿ mykara hÿ – Sesus niy.

<sup>56</sup> – Ahadiri Abarãõ kasoho humo tsihyrinymyrêta. Mybarawy bo mynasik ana humo hi tsihyrinymyrêta ziknakara. Iwatahi kahumo tsakurêta – niy.

<sup>57</sup> – O ikiakta batu atsaikba. Sÿkuêta anos ahaby-  
itatu. Iwatahi ikiakta Abarãõ batu anyhy. Tuba-

batu nira iwatahi batu anyhy. Tsimymyspihik-bataka – niaha.

<sup>58</sup> Sesus ispe my:

– Kaharere tsiwabytoktonahaktsa. Taparakta Abarão purukbyitu utakta nawa tatu – niy.

<sup>59</sup> Iwaze kytsa haraharetsa ty nasibyknaha. Iwaze zibeze tsihikknaha. Sesus sipokso taokpitsĩ. Kytsa sizubarëtsa papatu izoihik. Batu ity nyzo. Iwaze Deus wahoro zubata isturupeze inawakik.

## 9

### *Sesus ihyrizikubyrita zizororowy.*

<sup>1</sup> Maku ihyrizikubyrita zizororowy. Kyze Sesus niukuruze zinymyrykynahatsa tuk maku ihyrizikubyrita bo iktsa niy. Atahi koikny bakta tu ihyrizikubyrita nipuruk.

<sup>2</sup> Zinymyrykynahatsa tihi:

– O mypehakatsa amo sa maku ihyrizikubyrita nipuruk niaha. Tozeka ja imysapybara humo nihyrizikubyri. Tozeka ja izotsa simysopyksapybyitsa nikaranaha ana humo hi ja nihyrizikubyri – niaha.

<sup>3</sup> Sesus:

– O batu izotsa simysopyksapybyitsa nikaranaha ana humo hi nihyrizikubyri. Abaka Deus zikwy piwatawy. Iwatahi ihyrizikubyrita nipurukze my. Deus zikwy humo piwatawyky niy.

<sup>4</sup> Deus zikpehaka. Abaka Deus pokzi tarabaja-  
jaziu mynakara. Bykyze Deus pokzi tarabaja  
mykara batu zik.

<sup>5</sup> Uta mybarawy eze tuze aparakbaha mysihyrinomyryky. Deus harere bo hyÿ mynakara hawa wasani my mozuruku anaty hi mysihyrinomyryky – niy.

<sup>6</sup> Kyze Sesus tasaytsik ty wytyk bo hezok niy. Tсахõrõ ty tysukni iwaze ihyrizikubyita hyrizik-tsa bo tсахõrõ ty pepetohi niy.

<sup>7</sup> Ipe niy:

– Zarape Siroã inarokoha bo tyzakpikyкта tsimy – niy.

Siroã Sudeja harere zipehata motsaso. Iwaze ihyrizikubyrita zarape bo niparak. Taty hopik hopiky niy. Atsoko nikozi. Nizororobaba.

<sup>8</sup> Iwaze kytsa iotutsa pauktsitsa asa zuba n-pamykysokonaha:

– Tohi sa ske eze ziknadyhykyta. Batu ty ba iktsa ziky. Kytsa ziknasiakzaikik “O kabo ja kabo ja” ziknakara. “Kadisahawy ty kabo nyny tsimy” nikara.

<sup>9</sup> Ata hi sa – Iotutsa pauktsitsa nikaranaha. Ata hiba nikaranaha. Wastuhu nikaranaha:

– O batu. Maku ihyritywata hi zuba – niaha. Iwa asa zuba n-pamykysokonaha. Iwaze tapara ihyrizikubyrita sibo taso:

– Uta hiba kahyrizikubyrita niy. Tapara ske eze ziknadyhyky. Okyrysaro kadisahawy humo niwatihi kytsa bo ziknazapyikik. Uta tihi ba – niy.

<sup>10</sup> – Hawata skaraba abaka ikia iktsa asopyk – niaha.

<sup>11</sup> – Sesus inarokota kabo izumu. Atahi tсахõrõ ty sukni kahyriziktsa bo tsikaeni zuba tsyk niy. Kape “Siroã zarape bo hopiky!” – niy. Yhÿ iky.



Siroã zarape bo ikparak. Ikokpikze atsoko iktsa iky.

- <sup>12</sup> – Haneze sa Sesus – niaha.  
– Yhÿ ja. Batu kanyhy – niy.

*Pariseutsa ihyrizikubyrity pe: – Hawa skaraba abaka iktsa tsimykara – nikaranaha.*

<sup>13</sup> Iwaze iotutsa pauksitsa tapara ihyrizikubyrity Pariseutsa bo zioқтыhyryknaha.

<sup>14</sup> Sesus Sudeutsa byrykywy eze ihyrizikubyrity zizororowy. Tshãrã sukni ty ihyriziktsa bo pepe niyze tabyrykywy eze zizororowy.

<sup>15</sup> Iwaze Pariseutsa niwatihi ipe niaha:

- Hawa ta skaraba abaka iktsa asopyk – niaha.  
– Atahi tshãrã sukni ty kahyriktsa bo tsikaeniha zuba pepe niy. Uta kino hopik hopikyby ikytahi atsoko iktsa iky – niy.

<sup>16</sup> Pariseutsa nikaranaha:

– Atakta zizororowy mybyrykywy eze tarabaja nikara. Aty niwa myzeka Deus iknybyita tarabaja humo – wastuhu nikaranaha. Utsa tihi:

– O batu. Hawa skaraba maku imysapybyita nikara Deus zikwy ty ziwatawy – nikaranaha. Iwaze Sesus zisohometukunaha.

<sup>17</sup> Iwaze ipezo niaha:

– Ikia tsikykara. Ahyrizikubyrity humo zazororowyhik hawa isoho mytsaty tsimy – nikaranaha:

– O atahi Deus sohokotsa my hÿ – niy.

<sup>18</sup> Pariseutsa iharere humo batu sispirikpo niaha. Iharere bo batu yhÿ niaha. Iwatsahi kytsa izotsa nasiokтыhyryknaha.

<sup>19</sup> Zumunahaze ispe niaha:

– Hawa skaraba ahatse hi sa. Atahi sa ihyrizikubyrity nipuruk. Ihyrizikubyrity niy

zeka hawa hãta skaraba abaka iktsa mykara – nikaranaha.

<sup>20</sup> – O atakta katse my izo niy. Nipurukze ihyrizikubyríta hỹ niy.

<sup>21</sup> Abaka iktsa mykara batu kanyhy izo niy. Aty sa zizororowy batu kanyhy. Katse botu taypyk iwatsahi ituk typamykysonaha. Hawa iktsa mykara anahi ituk typamykysonaha – izo niy.

<sup>22</sup> Iwa izo Pariseutsa pokso nitsasoko. Tapara Pariseutsa tihi:

– Aty skaraba Sesus Deus zipehata my zeka atahi Sudeutsa wahoro bo ba ziktsukzo – nikaranaha.

<sup>23</sup> Iwatahi izo nitsasoko:

– Katse botu taypyk. Hawa abaka iktsa mykara anatyhi ipe tsimaha – nikaranaha. Sudeutsa pokso sipybyrẽtsa nikaranaha.

<sup>24</sup> Kyze Pariseutsa tapara ihyrizikubyríta zio-tyhyrykzonaha. Sibó izumuze ipe niaha:

– Katsaktsa Deus okze tu tsimaha. Aharere wasania ty mybo tytsaso. Atahi zazororowyta batu imysapy my ana humo hi myhyrinymyrẽtsa – mybarapetu nikaranaha.

<sup>25</sup> – Atahi zikzororowyta imysapybara ty mynakara zeka batu isoho kawabyhy. Uta taparaka kahyryzikubyríta abaka iktsa mykara hỹ. Ana humo hi zuba kahyrynymyrẽta – niy.

<sup>26</sup> Ipezo niaha:

– Hawa sa niy. Hawa skaraba ahyriziktsa nisi-zororowy – niaha.

<sup>27</sup> – Botu iktsaso. Kaharere humo batu ahaspirikpo. Hawa skaraba kaharere tsipiwaby tsihikikzonaha niy. Tozeka ja ikiahatsa kino

niwatihi ituktsa tsimoziknaha – niy. Iwa zizororota Pariseutsa pe niy.

<sup>28</sup> – Batu ba – nikaranaha. Sisakparëtsa nikaranaha. Zizororowya humo tahakyrikinaha:

– Ikia hi itukta tsimy. Katsa Moises harere bo zuba hyÿ tsimykaranaha. Katsa Moises tuktsa tsimaha.

<sup>29</sup> Moises Deus harere nitsasoko ana humo hi myhyrinymyrëtsa hÿ. Azororowya ja. Aty harere sa motsasoko. Hana iknykta sa izumu batu myhyrinymyry – niaha.

<sup>30</sup> Zizororowya niy:

– Paze. Atahi zikzororowy. Uta kahyrizikubyrity tu zikzororowy. Ikiatsa hi isoho humo batu ahahyrynymyry. Hana ikny sa izumu batu ahahyrynymyry niy.

<sup>31</sup> Katsa myhyrinymyrëtsa. Kytsa simysapybyitsa mykaranaha iwaze Deus bo mopamykysokonahaze batu siwabyhy nikara. Ba ziksitsumuëhÿ. Asaktsa Deus harere bo hyÿ mykaranaha asahi Deus bo mopamykysokonahaze piwabyziuku. Mysitsumuëhÿkÿ.

<sup>32</sup> Batu aty tohi ihyrizikubyrity ty “tyzororowy” iwahaty batu tyso. Batu zik nikaranaha. Abaka atahi kahyriziktsa nisizororowy abaka iktsa kasopyk.

<sup>33</sup> Deus harere bo hyÿ habyi zeka kahyriziktsa bazik sizororowy. Deus humo ipeha ahabyizeka kahyriziktsa ba zik isizororowy hÿ – niy.

<sup>34</sup> Kytsa ihumo tahakyrikinaha. Asahi:

– Ikia amysapybyi ty tsimykara. Tsikpurukze ahyrizikubyrira amysapybara humo mybarapetu nikaranaha. Ikia tsimyhyrinymyry tsihikik nikaranaha. Nabo pãoty. Sudeutsa wahoro bo ba ziktsukzo – niaha. Tahakyrikinaha zizororowyta humo niaha.

*Hawa kytsa Sesus humo sispirikpobyitsa ihyrizikubyrira watsa maha.*

<sup>35</sup> Kyze Sesus isoho ziwabyze. Kytsa nizukehek-naha Deus wahoro bo ba ziktsuk niaha ana hi ziwaby. Iwaze zihobykze ipe niy:

– Ikia Deus zipehata kytsa wata niyzik ihumo aspirikporëta sa – niy.

<sup>36</sup> – Aty sa Deus zipehata mywata niyzik. Ikia kabo tsiwiwatawy zeka ihumo kaspirikporëta hÿ my – niy.

<sup>37</sup> – Aba ibo tsimykozoko. Atakino abo mopamykysoko atsatu Deus zipehata ahawata ikyzik – niy.

<sup>38</sup> Iwaze zizororowyta taekaratsa humo puruk puruk niy.

– O kapehatsa abaka ahumo kaspirikporëta my – niy. Aba motsasoko – Ikia zuba tsamysapyrëta. Ikia zuba wasani tsimykara – niy.

<sup>39</sup> Sesus tihi:

– Mybarawy bo iknasik. Iwaze kahumo kytsa meky watu moziknaha. Asahi katuktsa moziknaha. Deus sisoho “O simysapyrëtsa maha” my. Utsa batu. Kahumo batu sispirikpo. Iwaze asahi Deus tihi: “O batu simysapy mykaranaha” my. Wastuhu Deus harere soho “katsa batu myhyrinymyry. Iharere tsinymyry tsihikiknaha”.

Asahi katuktsa moziknaha. Utsa tihi “O kat-saktsa Deus harere botu tsinymyrybanaha” myt-saty ahabyitsa nikaranaha. Asahi kahumo batu sispirikpo – Sesus niy.

<sup>40</sup> Pariseutsa iharere ziwabykynahaze ipe ni-aha:

– Katsaktsa Deus harere humo my-hyrinymyrëtsa. Iwa tsimytsasokonahaze tahaspihikbatakanaha ja – nikaranaha.

<sup>41</sup> Sesus ispe niy:

– Tsimytsasokonaha zeka: “O Deus harere batu myhyrinymyry, katsa iharere bo tsinymyry tshikiknaha” Iwa tsimytsasokonaha zeka Deus okzeka ahamysapyrëtsa tsimoziknaha hÿ. Iki-a-hatsa hi: “O Deus harere myhyrinymyrëtsa.” Iwat-sahi Deus okzeka batu ahamysapy tsimaha – niy. Iwa Sesus Pariseutsa bo nitsasoko.

## 10

### *Kytsa hozipyrykzatsa watsa soho nitsasoko.*

<sup>1</sup> Sesus nisihyrinymyryky. Hozipyrykzatsa soho humo nisiwatawyky. Kytsa hozipyrykzatsa hyrity watsa nisiwatawyky. Iwa nisihyrinymyryky:

– O kytsa wabyziutaha! – niy. Aty hozipyrykzatsa okarawy hokbowybyita buruk tu mytsuk zeka isoho humo:

– O atakta titsyhyryboarëta. Atahi hozipyrykzatsa mysibykyryk iwatahi inatsuk hokbowybyita buruk tu – tsimykaranaha.

<sup>2</sup> – Atahi hozipyrykzatsa okarawy hokbowy buruk tu paku my tahi sitsihitsa babata my – tsimykaranaha.

<sup>3</sup> — Hozipyrykzatsa tsihitsa mozumuze hokbowy bazekta. Atahi hokbowy ty zoksapare myraratsa bo mytsuk. Hozipyrykzatsa tsihitsa iaksoho piwabynahaze sakurêtsa moziknaha iwaze mysinaropykze estuba estuba zuba zipokonaha. Tahanaro piwabykynahaze ape bo mosisakpare.

<sup>4</sup> Hozipyrykzatsa sizubarêtsa ape bo pipokonahaze sitsihitsa siharaze mynaukuru. Hozipyrykzatsa iapik ziknaukurunaha. Iaksoho humo zinymyrynahatsa hi mykaranaha.

<sup>5</sup> Sitsihitsabyitsa tu zeka batu iapik zikaha. Iaksoho humo batu sihyrinymyry iwatsahi iapik batu zikaha. Tahatsihitsabyita yksoho piwabykynaha zeka paikpa mynatururukuknaha. Sipybyrêtsa moziknaha — Sesus niy.

<sup>6</sup> Kytsa Sesus harere hozipyrykzatsa soho humo batu sihyrinymyry. Amy piwatawy naha humo tsihokdahaarêna.

*Sesus hokbowy wata my.*

<sup>7</sup> Iwaze Sesus ispe niyzo:

— O kytsa wabyziutaha! Hozipyrykzatsa siokarawy eze tu zeka batu aty tohi ziksiba. Batu aty tohi ziksiakse. Anaeze batu aty tohi ba ziksiboro. Uta katuktsa mysiperyky. Katuktsa hozipyrykzatsa watsa uta hi mysipokzitsiki niy.

<sup>8</sup> Hozipyrykzatsa tahatsihitsa byitsa yksoho humo batu sihyrinymyry. Katuktsa niwatihi. Asaktsa zispihikbatakanahatsitsa humo batu sispirikpo. Tapara kaharaze izumukunahatsa wasanibara ty nisihyrinymyrykynaha. Iwatsahi batu siwabyziuhu.

9 Utakta hokbowy wata my iburuk mynapupunaha. Zoksapare mahaze tahadisahawy bo mynakaranaha bykyze mynapupuzonaha. Siokarawy eze batu aty tohi ba ziksiba. Asaktsa kahumo sispirikporëtsa mysipokzitsiki.

10 Sitsyhyryboanikitsa mozumunahaze hozipyrykzatsa humo tahatsyhyryboanaha mysiba tsihikiknaha. Utakta meky watu my. Izkumuze aparakbaha kahumo sispirikporëtsa simysapyrëtsa moziknaha. Sakurëtsa moziknaha katuk mynapykyryknaha.

*Sesus hozipyrykzatsa tsihitsa wata my.*

11 Katuktsa mysipokzitsiki hÿ. Hozipyryktsa tsihitsa wata my. Uta katuktsa sapyzeken mohyrikosokda.

12 Aty hozipyrykzatsa tsihitsa tsumuëhÿtsa atahi okyrysaro soho humo zuba tarabaja mykara. Batu istsihitsa babata byita tu. Sÿtsumuëhÿtsa zuba. Parini mozumuze tsipybyrëta ipokso moparakik. Hozipyryktsa myserekek. Iwaze parini mozumuze hozipyrykzatsa paikpa motururukuknaha. Nanabyitaba motururukuknaha. Parini hozipyrykzatsa mysiboro mykara tahi iwatsahi ipokso sipybyrëtsa mykaranaha.

13 Tsumuëhÿtsa niparakik. Okyrysaro humo tarabaja mykara. Iwaze hozipyrykzatsa batu sipokzitsinymyhy.

14-15 Utakta hozipyrykzatsa tsihitsa wata my. Kamypokzitsiukrëta. Kazo humo kahyrinymyrëta kazo kahumo tsihyrinymyrëta. Nawatu katuktsa kahumo sihyrinymyrëtsa. Utakta katuktsa

iksinyba. Katuktsa pokzi mohyrikosokda. Estuba katukta pibeze zeka sisapyzesty mohyrikosokda – niy.

<sup>16</sup> – Nanabyitaba ustsá sizubarêtsa my. Usa okarawy eze mopykyryknaha. Asahi Deus bo mysioktyhyryk kaharere bo hyŷ mykaranaha. Sizubarêtsa kaharere bo hyŷ mykaranaha. Utakta sizubarêtsa kazo bo mysioktyhyryk hŷ.

<sup>17</sup> Katuktsa pokzi mohyrikosokda. Mohyrikosokda bykyze mynahyryzikpo. Iwaze kazo kahumo tsimypokzitsiarêta. Katuktsa pokzi mohyrikosokda kazo kahumo tsimypokzitsiarêta.

<sup>18</sup> Utakta mohyrikosokda ahabyi zeka ba zik-bezenaha. Tubabatu kazo tihi:

“Tsimyhyrikosokda zeka tsinahyryzikpo”. Iwatahi tsimyhyrikosokda tsihikik yhŷ tsimy. Bykyze tsimynahyryzikpo tsihikikze yhŷ tsimy kazo niy. Iwa – Sesus niy.

<sup>19</sup> Sudeutsa iharere soho niharapepehakanaha.

<sup>20</sup> Wastuhu:

– O atakta hyrikoso sapybara ituk napykyryk. Iwatahi paikpa mytsaty nikara. Amy sa tsipi-wabykynaha – nikaranaha.

<sup>21</sup> Ustsá Sudeutsa tihi:

– O batu. Maku hyrikoso sapybara ituk mopykyryk zeka ba ziktsaso. Maku hyrikoso sapybara ituk mynapykyryk zeka ihyryzikubyríta bazizorowu batu zik – nikaranaha.

*Sudeutsa Sesus harere bo batu yhŷ ahabyitsa nikaranaha.*

<sup>22</sup> Kyze Sudeutsa Sesus bo niaha. Serusarêhe ezektsa myikaha niaha. Pororo ziknakaranaha,



nawa Deus wahoro zubata nizukninahaze myt-saty ziknakaranaha. Hyritsikze imyikaha bo pororo ziknakaranaha.

<sup>23</sup> Sesus Deus wahoro zubata zikarazik buruk paikpa nikaranaha. Tubabatu ispehatsa Soromao sapy zinaroko.

<sup>24</sup> Anaee Sudeutsa Sesus pauk baze niriktoto-hokonahaze ipe niaha:

– Ikia hisa Deus zipehata ja Kiristu. Hawaze sa mybo asoho tsipiwatawyky. Ikia Deus zipehata tsimyzeka mybo tytsaso – niaha.

<sup>25</sup> Sesus hi:

– Botu kasoho iktsaso. Ikiatsa kaharere humo batu ahaspirikpo. Hawa mykara Deus zikwy humo iwaze utakta Deus zikpehata mykara ana hi piwatawyky.

<sup>26</sup> Ikiatsa kaharere humo batu ahaspirikpo.

<sup>27</sup> Katuktsa kaharere bo hyÿ mykaranaha. Asahi hozipyrykzatsa watsa mykaranaha. Hawa hozipyrykzatsa tsihitsa hapik mokurunaha. Katuktsa niwatihi kaharere bo hyÿ mykaranaha. Kaksoho piwabynahaze sispirikporëtsa. Uta kino mysiny. Katuktsa mynamopykyryknaha niy.

<sup>28</sup> Kahumo simysapyrëtsa moziknaha. Batu aty tohi ziksiakse. Batu estuba kino ba ziaksenaha. Tahawahi katuk mozurukunaha hÿ, mohyrikosokdanahaze Deus sihumo tsimypokzit-siukrëta ituk tahawahi mynapykyryknaha

<sup>29</sup> Kazo atahi zikpehahik iwatsahi sizubarëtsa kahumo sispirikporëtsa. Kazokta abazuba zikwy. Ba aty tohi iekze ziksiokty. Ba aty tohi katuktsa ziksiokty – niy.

<sup>30</sup> – Kazikwy kazo zikwy kino atsatu my – Sesus niy.

<sup>31</sup> Iwa Sesus niyze Sudeutsa haraharetsa ty inasikyknaha iwatsahi ity zibezekyzyknaha.

<sup>32</sup> Sesus ispe niy:

– Uta kazo zikwy humo tisapyrẽna ty mykara. Amo sa haraharetsa ty tsipikbeze tsihikiknaha. Hawa sa ikykara – niy.

<sup>33</sup> Sudeutsa:

– Amy ty isapyha ty tsimyzeka ba zabezenaha. Hawa Deus zikwy tsipiwatawy anahumo hi ba zabezenaha. Aharere batu imysapy mytsaty tsimykaranaha. Ikiakta maku zubata. Maku tuze “Kazikwy kazo zikwy kino atsatu” tsimy. Iwatsahi haraharetsa ty tsipabeze tsihikiknaha – niaha.

<sup>34-35</sup> Sesus:

– Amy ty Moises ziwatahaka wasani niy. Deus harere ziwatahakaze wasani niy. Botu ziwatahaka Deus harere papeu humo “Ikiatsa deustsa watsa tsimaha” botu ziwatahaka. Iwa kytsa bo asahi sinarohotsa.

<sup>36</sup> Deus hi zikpeha. Aparakbaha Deus bo mysioktyhyryk my. Utahi mymyoktyhyrykta. Amy skaraba tsimaha: “O iharere ty Deus okzeka batu imysapy my.” Mytsasokoze “Utakta Deus tse my”. O iharere ty batu imysapy mybarapetu tsimykaranaha – niy.

<sup>37</sup> – Utakta Deus zikwy humo watawy abyizeka kahumo batu ahaspirikpo wasani tsimykaranaha. Utakta Deus zikwy piwatawyky iwatsahi batu ahamysapy tsimykaranaha.

<sup>38</sup> Kaharere humo ahaspirikpo ahabyizeka hawa mykara anahumo hi ahaspirikporẽtsa. Tsimyspirikponaha zeka ikiahatsa:

“O Sesus zikwy izo zikwy kino atsatu my”  
tsimaha – niy.

<sup>39</sup> Iwatsahi Sudeutsa itsipa humo asiba ziocky-hyrykzonaha. Batu zik hawa tohi zikaha Sesus niwakik.

<sup>40</sup> Iwaze Sesus buburu Sorodão inarokoha koikny zitsikzazo. Anaeze tapara Suão Batista sizubarẽtsa nisiharasusuku. Anabo hi Sesus niukuru.

<sup>41</sup> Sizubarẽtsa ibo zumunaha. Asahi nipamykysokonaha:

– O Suão Batista Deus zikwy ty batu mybo tywatawy. Amo ata maku soho botu nitsasoko wasani nikara – nikaranaha.

<sup>42</sup> Iwaze kytsa sizubarẽtsa iharere bo hyỹ nikaranaha. Asahi amykta taba buburu Sorodão ezektsa ihumo sispirikporẽtsa niaha.

## 11

### *Rasaru nihyrikosokda naha soho.*

<sup>1</sup> Kyze Rasaru tsimyitsapyrẽta. Sinini nikara. Tatukykyryk tuk Betanija eze hudik ziknakaranaha. Maria inarokotatsa, ustatsa Marata inarokotatsa iwaza.

<sup>2</sup> Maria katsa Rasarutsy hi iokmorẽnikia tsipokz-itsarẽna Sesus zipyryharasusuku. Taharadi ty zipyrywiki. Maria atatsa tihi.

<sup>3</sup> Iwaze wytykyryk maku Sesus bo zipehahik-naha. Sesus bo zumuze ipe niy:

– O ikia aharereziuwyy tsimyitsapyrẽta – niy.

<sup>4</sup> Ana ziwabyze Sesus ipe niy:

– Botu kahyrinymyrẽta. Rasaru tsimyitsapyrẽta hiba. Mohyrikosokdaze niakbanahatsa tuk ba zikapykyryk. Deus zikwy humo mynahyrizikpo. Kytsa isoho motsasokonaha. Rasaru “Deus tse zikwy humo inahyrizikpo” mykaranaha – niy.

<sup>5</sup> Sesus Marata Maria Rasaru iwatsa humo tsimypokzitsiarẽta ziknakara.

<sup>6</sup> Sihumo tsimypokzitsiarẽta tasapy eze inapykyryk iwaze petok zuruze ibo niukuru.

<sup>7</sup> Kyze zinymyrykynahatsa pe niy:

– Tupaktsa kytsa! Sudeja boktsa – niy.

<sup>8</sup> – O mypehatsa Sudeutsa zabeze tsihikiknaha. Botua haraharetsa ty zabeze tsihikiknaha. Iwatatu sa tsipiksikirizo – niaha.

<sup>9-10</sup> – Yhỹ niy. Abaka Deus tarabaja mynakara. Okoroze kytsa haramwe humo amypubyri iktsa mykaranaha. Maku unata pitabakaze mynaraha. Batu iktsa zikaha. Maku okoroze pitabakaze wasani my. Haramwe humo ske buruk iktsa my. Aty Deus tsyhyryze tarabaja my zeka maku okoroze pitabakaze tawata. Bykyze batu zik maku unata pitabakaze tawata. Tupaktsa! Kytsa ba zikbezenaha Deus batu yhỹ mykara. Iwatsahi bazik bezenaha. Tapara Deus hyriziktsokzawy pepykba. Abaka ba zikbezenaha Deus kabete batu hỹ ziky. Aibani zuba pikbezenaha – niy.

<sup>11</sup> Zinymyrykynahatsa pezo niy:

– Myharereziuwu Rasaru purubaka. Abahi mozipopo – niy.

<sup>12</sup> – O purubaka zeka mozororozo hỹ – nikaranaha.

<sup>13</sup> Rasaru botu nihyrikosokda ana humo hi Sesus tsihyrinymyrêta. Iwatatu – “Rasaru purubaka” niy iwatsahi Rasaru purubaka tu ja – mytsaty nikaranaha.

<sup>14</sup> Iwaze Sesus mypubara ty nitsasoko. Ispe niy: – Rasaru nihyrikosokda – niy.

<sup>15</sup> Iwatatu ibo batu pão. – Aba Deus zikwy pahawatawyky. Kazikwy humo iktsa tsimahaze kahumo ahaspirikporêtsa tsimoziknaha. Iwatahi kakurêta. Nihyrikosokdata boktsa kytsa! Tupaktsa – niy.

<sup>16</sup> – O katsa ituk tsimykurunahaktsa kytsa! Sesus pibezenaha zeka katsa niwatihi ituktu tsimyhyrikosokdanaha – Tome niy. Tome beketsa petok inarohota nikara. Iwaze Sesus tuk zinymyrykynahatsa nihyrikosokdata bo zumukunaha.

*Sesus niakbanahatsa nasihyrizikpo.*

<sup>17-18</sup> Betanija bo zumunaha. Betanija Serusarêhe bazebabatu. Harakykbyi kirometero zuba. Nihyrikosokdata sapy bo zumunaha. Kytsa:

– O Rasaru nihyrikosokda. Harakykbyihi zuruze Rasaru harahare oke eze ziytyknaha – nikaranaha.

<sup>19</sup> Marata itsy Maria niwatihi Rasaru pokzi nipuziukunaha. Sudeutsa kytsa situk Rasaru pokzi nipuziukunaha.

<sup>20</sup> Iwaze Marata Sesus sukmo soho ziwabyze atatsa ibo niukuru. Sesus zihobyk. Maria wahoro eze tu niapykyryk.

<sup>21</sup> Marata Sesus zihobykze ipe niy:

– O ikia mytuk tu zeka kaokaha ba zikumuza.

<sup>22</sup> Amy Deus bo tsimyzapykyky atsatu abo nyny my. Ikia Deus bo tsimypamykysoko zeka kaokaha soho amy tsimyzapykyky anahi abo nyny my – niy.

<sup>23</sup> – Aokaha mynahyryzikpo – niy.

<sup>24</sup> – Yhỹ niy. Atahi mynahyryzikpo ana humo hi kahyrinymyrētatsa. Deus myzo siakbatsa sizubarētsa nasihyryzikpoze kaokaha kino niwatihi mynahyryzikpo – niy.

<sup>25</sup> Sesus:

– Uta hiba siakbatsa hyryzikpokotsa. Kahumo nahyryzikponaha. Kytsa kahumo sispirikporētsa asahi mohyrikosokdanahaze nahyryzikponaha asahi Deus tuk tahawahi mynapykyknaha.

<sup>26</sup> Asahi kahumo sispirikporētsa tuze niakbanahatsa tuk ba zikykykyknaha. Asahi Deus tuk mynapykyryknaha. Kaharere bo sa hyỹ tsimy – niy.

<sup>27</sup> – Yhỹ niy. Ikia hi Deus zapehata mywata tsikyzyk. Ikia hi Deus tse babata. Tahy tsipiperyknaha – niy.

### *Sesus kytsa pokzi nipu.*

<sup>28</sup> Iwaze Marata nitsasobaze tatsy bo ziksizo. Tatsy bo nisakzihiki tu. Ustsaktsa batu siwabyhy:

– O katsy mypehatsa izumu ikia zasapykyky. Ske puk teze tu – niy.

<sup>29</sup> Iwaze Maria ziwabyze Sesus bo niparak. Aidy kyikyky niy.

<sup>30</sup> Izumubahaneze pyk niy. Marata zihobyk anaeze ibo zumu.

<sup>31</sup> Sudeutsa atatsa hapik niukurunaha. Asahi Rasaru pokzi nipuziukunaha. Atatsa bo iktsa ni-ahaze:

– O iytyk bo ja moparakak – mytsaty ahabyitsa nikaranaha. Iwatsahi iapik niukurunaha.

<sup>32</sup> Atatsa Sesus bo zumu. Ibo iktsa niyze taekaratsa humo puruk puruk niy:

– O mypehatsa ikia mytuk zeka kaokaha ba zikumuza – niy.

<sup>33</sup> Maria taokaha pokzi nipuziuku atatsa bo Sesus iktsa niy. Sudeutsa kino ituk nipuziukunaha. Sizubarẽtsa nipupuziukunaha. Sisukatsihikrẽtsa. Sesus sihumo tsimypokzitsiarẽta. Iwatahi sihumo tisukatsihikrẽta niyzik.

<sup>34</sup> – Iytyk sa hana eze – niy.

– O mypehatsa panykta anaeze – niaha.

<sup>35</sup> Sesus sipokzi nipu.

<sup>36</sup> Iwatsahi Sudeutsa ihyritsik bo iktsa niahaze:

– O Rasaru humo tsimypokzitsiarẽta – nikaranaha.

<sup>37</sup> Utsa kytsa:

– Tapara ihyrizikubyrita zizororowy. Tozeka ja Rasaru ty iwa my tawata hỹ – nikaranaha. Asa zuba nipamykysokonaha.

### *Sesus Rasaru zihyrizikpowy.*

<sup>38</sup> Iwaze Sesus ihumo tsimypokzitsiarẽta iytyk bo zumu. Tisukatsihikrẽta nikara anaeze harahare hok eze niapykyryk. Sesus Mata Maria Sudeutsa kytsa sizubarẽtsa iwatsa iytyk bo zukumunaha.

<sup>39</sup> Sesus ispe niy:

– Harahare tsispetunahaktsa! – niy.

– Mypehatsa ba hawa tohi zikaha! Abaka inury mobibibaka harakykbyihi zuruze anaeze nitsahok. Tsihōhōrēta – Marata niy.

<sup>40</sup> – Uta zuba botu iktsaso ikia kahumo aspirikporētatsa zeka Deus zikwy piwatawyky. Ana humo hi ma tsimy – Sesus niy.

<sup>41</sup> Iwaze kytsa harahare zipetuhiknaha. Sesus Deus bo nipamykysoko:

– O kazo kaharere tsiwabyikik. Iwatahi “Ikia tsamysapyrēta” mykara.

<sup>42</sup> Kaharere tsiwabyikik. Anahi kahyrinymyrēta. Kytsa kapauk bazektsa okze abo mopamykysoko. Iwatsahi kahumo sispirikporētsa moziknaha. Ikia hi tsikpeha ana humo hi sihyrinymyrētsa – niy.

<sup>43</sup> Sesus tazo bo nipamykysobaze opykani huahua niy:

– Rasaru pany puketyny – niy.

<sup>44</sup> Rasaru nihyrikosokdata tu atsoko izoihik. Panu ty takwarawytuk tu zizoi. Sesus ispe niy:

– Iakwarawy tsipararanahaktsa iwaze pitaba! – niy.

*Sudeutsa taparaktsa: – Hawa sa Sesus tabeze – nikaranaha.*

<sup>45</sup> Iwaze mektsaktsa Sudeutsa Maria bo inakozorenaha Sesus humo sispirikporētsa moziknaha. Asahi Rasaru inahyrizikpo naha zinyanaha Sesus humo sispirikporētsa.

<sup>46</sup> Utsa kytsa ihumo batu sispirikpo. Asahi Pariseutsa bo nitsasokonaha. Ispe niaha:

– O Sesus nihyrikosokdata Rasaru zihyrizikpowy – niaha. Iwa Pariseutsa bo nikaranaha.



<sup>47</sup> Iwaze Pariseutsa, taparaktsa ziknapamykysokonahatsa iwatsa izumubanaha. Asa zuba Sesus soho ty nipamykysokonaha:

– Hawa sa Sesus ty tsimaha. Atakta tazikwy myzubaha bo ziwatawyky. Hawa sa Sesus ty tsimaha

<sup>48</sup> Ata tazikwy piwatawyikik zeka kytsa sizubarẽtsa ihumo sispirikporẽtsa moziknaha. Situktsa moziknaha. Sesus ispehatsa mozik zeka Homa taparakta Sesa sodadutsa mymyoktyhyryk mysipeha Deus wahoro zubata pipaparabanaha. Mytyryktsa mokbabanaha. Myhyrytsa nihyrikosokdata Moises harere ty ba ziksihyrinymyrynaha – iwa asa zuba nipamykysokonaha.

<sup>49</sup> Iwaze taparakta ziknapamykysokota Kajapas inarokota ispe niy:

– Ikiahatsa batu ahahyrinymyry niy.

<sup>50</sup> Sesus tsipibezena zeka Homa sodadutsa mytyryktsa ba ziksibanaha. Iwatsahi katsa Sesus tsipibezena zeka wasani my. Kaharere ahahumo tsihokdaharẽna iwa zeka Homa sodadutsa mytyryktsa ba ziksibanaha – Kajapas niy.

<sup>51</sup> Deus tapara tihi:

– Sesus kytsa sapyzekeny mohyrikosokda – niy. Ana hi Kajapas batu hyrinymyry. Nitsasokoze:

– Katsa Sesus tsipibezena zeka wasani my – niy. Deus harere soho batu ihyrinymyry. Ihyrinymyrybyita tu Deus harere bo yhy niy. Hawa mytsaty nikara batu tyso. Sesus Sudeutsa tyryktsa sapyzekeny mohyrikosokda Deus botu nitsasoko.

<sup>52</sup> Utsa kytsa bipyritsa sapyzky kino niwatihi mohyrikosokda. Iwatsahi sizubarëtsa Deus tyryktsa sakurëtsa moziknaha. Iharere bo hyÿ mykaranaha. Iwatahi Sesus mohyrikosokda Deus niy.

<sup>53</sup> Iwa zeka Sudeutsa taparaktsa asa zuba ni-pamykysokonaha:

— Hawa sa Sesus tabeze — nikaranaha.

<sup>54</sup> Iwatahi Sesus Sudeutsa pokso mekybotu ni-parak. Eparã bo niy. Eparã jerukbara bo tas-apy. Anaeze Sesus tuk zinymyrykynahatsa tuk niapykyryk.

<sup>55</sup> Sudeutsa kytsa sizubarëtsa Serusarëhe bo niukurunaha. Sudeutsa myikaha bo Serusarëhe bo pororo ziknakaranaha. Paskoa mokymyze anaeze Deus taparaktsa nisitsumuëhĩkĩ ana bo mytsaty ziknakaranaha. Sizubarëtsa Serusarëhe bo niukurunaha. Tapara simyikaha kymybyitu tahasopyk tyty nikaranaha.

— Katsa meky watu tsimoziknaha zeka Deus okzeka wasani tsimaha — nisisopykyknaha.

<sup>56-57</sup> Iwaze sizubarëtsa Sesus ziperykynaha. Asahi Deus wahoro zubata sturupe eze ziberikinaha. Asahi:

— Mymyikaha bo ja mozumu — nikaranaha. Asa zuba ziperykynahaze nipamykysokonaha. Pariseutsa, taparaktsa Deus wahoro zubata eze ziknapamykysokonahatsa iwatsa aparakbaha nisipehaka. — Aty Sesus piny zeka mybo tytsaso! — niaha. Iwa nitsasokonaha Sesus tsipa humo zioqty tsihikiknaha hÿ.

## 12

### *Sesus Betanija eze.*

<sup>1</sup> Kyze Sesus Rasaru bo zumu. Atahi zihyrizikpowyta ibo zumu. Rasaru Betanija ezekta niy. Tapara Sudeutsa myikaha Paskoa inarokoha zumubahanize. Iwaze hi zuba simyikaha nakymy. Iwaze Sesus tuk zinymyrykynahatsa tuk Rasaru bo zumunaha.

<sup>2</sup> Anaeze Marata sidisahawy humo bu nikara. Rasaru zinymyrykynahatsa tuk tadisahakanaha.

<sup>3</sup> Maria jokmorënikia zebykyk niy. Jokmorënikia ty tsasuk tisapyrëna eze narado inarokoha ipokzitsanikia. Atatsa jokmorënikia tsizubarëna ty zibykyryk niy. Iwatatsahi Sesus zipyrytsa harasusuku. Iwaze atatsa taharadi tyty zipyrywiki niy. Iwahoro tsiokmorëna niypykyryk. Atatsa Sesus humo tsimypokzitsiarëtatsa iwatatsahi Sesus zipyrytsa harasusuku. Iwa Maria nikara.

<sup>4</sup> Sudas Iskariotses Sesus tuk zinymyrykyta tisakparëta mozik. Atakta Sesus humo tsiharerewabymybarëta, sisukyrytsitsa bo myzioktyhyrykta. Atahi zibetsakak ipe nikara:

<sup>5</sup> – Amy skaraba jokmorënikia ty batu ity huak. Tsipihuak zeka okyrysaro tsizubarëna tsimaha. Iwaze okyrysaro sinamybyitsa bo nyny tsimaha zeka wasani my – niy.

<sup>6</sup> Sudas Iskariotses zinymyrykynahatsa okyrysaro suk zikziperyky. Utsa papatu okyrysaro zikziakseke. Tatsyhyryze hi okyrysaro ziaксеke utsa papatu ziknakara. Nitsasokoze – Amy skaraba jokmorënikia ty batu ity huak – okyrysaro humo niy. Ata kino okyrysaro ziaксе

tsihikik. Imypokzitsiukbyita tu okyrysaro ziakse tsihikik. Batu sinamybyitsa bo nyny ziky.

<sup>7</sup> – O awatu betsak betsak byity! – Sesus niy. – Atatsa hi jokmorënikia ty zipyryktsa harasusuku. Atatsa hi kaokzeka tsimysapyrëtatsa jokmorënikia ty pikarasusuku my niy.

<sup>8</sup> Sinamybyitsa bo nyny tsimykaranaha zeka wasani my. Utakta ahatuk batu mopykyryk kabo ka ba nyny zikaha. Jokboha kyritoktok ahatuk mopykyryk. Aba kabo ty nyny tsimaha zeka wasani my – niy.

*Sudeutsa taparaktsa kino niwatihi nikaranaha: – O Rasaru niwatihi tabezekta! – nikaranaha.*

<sup>9-18</sup> Kyze Sudeutsa sizubarëtsa Sesus bo zumunaha. Sesus Betanija eze niapykyrykspyk. Ana ziwabynahaze Sesus Rasaru ahatsa bo niukurunaha sibo inakozorenaha. Atahi Sesus zihyrizikpozota bo inakozorenaha. Sudeutsa sizubarëtsa taparaktsa Deus wahoro eze ziknapamykysokonahatsa ihumo batu sispirikpo. Rasaru inahyrizikpoze kytsa Sesus humo sispirikporëtsa. Iwaze taparaktsa Deus wahoro eze ziknapamykysokonahatsa nitsasokonaha:

– O Rasaru niwatihi tabezehikta kytsa – nikaranaha. Kyze aparakbaha Sesus bo iktsa nikaranaha. Sesus Rasaru zihyrizikpoze ziwabykynaha. Hawa ipe niy:

– Rasaru pany – niy. Iwaze Rasaru harahare ioke ikny zoihik.

Iwaze Sesus Serusarëhe bo niukuruze pikuzza bete tadyhyhyk. Tubabatu Deus harere papeu humo tubabatu ziwatahaka atsatu Sesus nikara.

Iwatahi pikuza bete tadyhyhyk. Deus harere papeu humo tihi:

– O Serusarêhe ezektsa ahasukatsihik byihuja! –  
niy. –

Ahapehatsa mozumuze pikuza bete tadyhy –  
niy.

Iwa tubabatu Deus harere papeu humo ziwatahaka. Iwatahi Sesus pikuza bete tadyhyky. Iwa Serusarêhe bo niy.

*Sesus Serusarêhe bo zumuku.*

Kyze kytsa sizubarêtsa Serusarêhe bo niukurunaha tahamyikaha bo asahi Sesus bo niaha. Ziwabykynahaze:

– O Sesus mozumuku – nikaranaha. Iwaze ibo niukurunaha.

– O Sesus tazikwy ty mybo tsipiwatawyky – nikaranaha. Tazikwy ziwatawykyze Rasaru zihyryzikpowy niy. Anahi ziwabykynaha. Iwatsahi Sesus haraze niukurunaha. Iwaze tsarakzapatsa nasibykyknaha ske buruk nisipaparakanaha. Sizubarêtsa nikaranaha. Sesus ispehatsa wata humo.

– Sesus Deus tuk niapykyryk. Mywata niyzik. Deus tukta katsa mybo inasik.

Atakta mypehakatsa my, katsa Isareu tsekokatsa ikia hi mypehakatsa.

Atakta Deus ihumo mymysapywyky hỹ. “O mykurêtsa” – nikaranaha.

Sesus Serusarêhe bo niy. Pikuza bete tadyhyhyk iwa Serusarêhe bo zumuku. Hawa tubabatu Deus harere papeu humo ziwatahaka atsatu Serusarêhe bo zumu. Wasani niy. Sesus Serusarêhe bo niyze hawa tubabatu ziwatahaka.

Ana humo hi zinymyrykynahatsa batu sihyrinymyry tsihokdaharẽna. Anaharere batu siwabyhy. Aiba zuba mytsaty nikaranaha. Sesus bijoikpe bo nidoze tahapetu sisopyk:

– O Sesus Serusarẽhe bo zumuze Deus papeu humo botu ziwatahaka tawata hawa tubabatu ziwatahaka atsatu niyze Serusarẽhe bo zumu – iwa Sesus soho bo mytsaty nikaranaha.

<sup>19</sup> Kyze Pariseutsa asa zuba nipamykysokonaha:

– Kytsa sizubarẽtsa ihumo sispirikporẽtsa nikaranaha. Kytsa myharere bo batu yhỹ zikaha. Katsa tsimytsasokonaha zeka “ihumo batu ahaspirikpo” kytsa “ihumo sispirikporẽtsa” – nikaranaha. Asa zuba Pariseutsa nipamykysokonaha.

*Kerokotsa Sesus bo mynakozore tsihikiknaha.*

<sup>20</sup> Kyze Kerokotsa Sesus bo mokozorenaha. Asahi usts tyryktsa meky eze ktsa tu niaha. Asahi Serusarẽhe myikaha bo niukurunaha. Sudeutsa tuk Deus bo nipamykysokonaha:

– O ikia zuba tsamysapyrẽta. Deus zuba atahi tsipunihi krẽta bijoikpe eze my tsimaha – nikaranaha.

<sup>21</sup> Piripi bo nikaranaha. Atahi Betesaida ezekta. Betesaida Karireja eze ky. Ata bo hi niukurunaha. Ipe niaha:

– O Sesus bo tsimynakozore tsihikiknaha – nikaranaha.

<sup>22</sup> Iwaze Piripi ãdere pe niy atahi Peduru tsy ipe niy:

– O Kerekotsa Sesus bo mynakozore tsihikiknaha – niy. Kyze Piripi ãdere ahatsa Sesus pe niaha. Asahi:

– O Kerekotsa abo mynakozore tsihikiknaha – mykaranaha. Iwa Sesus bo nitsasokonaha.

<sup>23</sup> Sesus ispe niy:

– Utakta iknasikta maku babata ahawata ikyzik. Aibani mohyrikosokda. Mohyrikosokdaze kytsa piksohonaha! Atakta tsimysapyrêta tsizikwyrêta my – mykaranaha.

<sup>24</sup> – Wabytoktotaha niy. Katsakta tapara riktsa tsimysipariknaha. Tsimysipariknahaze wytyk bo pokpok tsimykaranaha. Estubaze zuba wytyk eze my, ata hi taypykze riktsa tsiriktsazubarêta mozik. Hawa riktsa mysiubara iwata tabezewy ziwatawyky. (Iwa nitsasokoze tabezewy soho ziwatawyky.) Tapara mohyrikosokda bykyze mynahyryzikpo my. Iwaze kytsa sizubarêtsa kahumo sispirikporêtsa. Rik soho iktsasokoze hawa rik mysiubara iwa tabezewy soho ziwatawyky – niy.

<sup>25</sup> – Aty Deus harere bo yhỹ ahabyizeka mohyrikosokdaze Deus tuk ba zikapykyk. Aty Deus harere bo hỹ mykara zeka mohyrikosokdaze tawahi Deus tuk mynapykyryk.

<sup>26</sup> Aty katukta mozik zeka kaharere bo hỹ mykara. Kaharere bo zuba hỹ mykara, katuk tawahi mynapykyryk. Kazo ihumo mykara: O atakta tsimysapyrêta mykara – niy.

*Sesus tabezewy soho nitsasoko.*

<sup>27</sup> Sesus tihi:

– Abaka paikpa mytsaty mykara. Hawa ha ty ja Deus bo mopamykysoko “O kazo kabezetsihikbyita mykara” my. Iwa Deus bo batu tyso. Utakta

mybarawy eze sinini mykara naha humo tsimyzi-hikik zeka yhỹ my. Iwa ibo mopamykysoko – my.

<sup>28</sup> Kyze Deus bo mopamykysozo:

– O kazo kytsa bo tysisapywyky. Iwatsahi asoho motsasokonaha “O Deus tsamysapyrẽta. Azikwyrẽnikita tu tsimypokzitsiukrẽta” nikaranaha – iwa asoho motsasokonaha. Iwa babatu iaksoho bijoikpe ikny iwaby. Deus tihi:

– Botu kasoho ziwatawyky. Aparakbaha botu kahumo piksohokonaha “O Deus tsamysapyrẽta, azikwyrẽnikita tu tsimypokzitsiukrẽta”. Iki hi myhyrizikwanikita kasoho piwatawykyzo. Kytsa sizubarẽtsa kasoho tihi: “O Deus tsamysapyrẽta, azikwyrẽnikita tu tsimypokzitsiukrẽta” mykaranaha – Deus niy.

<sup>29</sup> Kytsa sizubarẽtsa Sesus baze niriktotohokonaha iaksoho ziwabynahaze. Wastuhu kytsa nikaranaha.

– O nitotokoro – nikaranaha. Utsa kytsa batu.

– Bijoikpe iknyktsa Deus tsumuẽhĩtsa ibo nit-saso – nikaranaha.

<sup>30</sup> Kyze Sesus ispe niy:

– Iaksoho tsiwabynahaze bijoikpe ikny ahatsyhyryze niy. Batu kahumo ka. Iki hatsa bohi Deus harere tsiwabykynaha – niy.

<sup>31</sup> Abadisihi Deus kahumo sispirikpobyitsa bo motsaso ispe my:

– O ikiahatsa batu ahamysapy tsimykaranaha. Sesus humo tsimyspirikpobyrikinaha zeka batu ahamysapy tsimykaranaha. Ahapehatsa Sesus humo mypunihikbyinaha. Batu aty tohi ityryk zikyzyk. Sesus zuba ipunihikanikita my – niy.



<sup>32</sup> — Sizubarẽtsa kahumo batu siakparawy. Iwatsahi pikbezenaha. Iharapatawyhyta humo pikyriziknaha iwa mohyrikosokda. Iharapatawyhyta pitseknahaze pikbezenaha. Iwa mohyrikosokdaze kytsa nanabyitaba kahumo sispirikporẽtsa moziknaha — nikara.

<sup>33</sup> Sesus tasokoze niy iwaze iharapatawyhyta humo pihyrizikiknaha. Hawa mohyrikosokda mysihyrinymyryky niy.

<sup>34</sup> Sizubarẽtsa ipe niaha:

— Tubabatu Deus harere papeu humo Kiristu soho ziwatahaka. Tubabatu nihyrikosokdata Moises ziwatahaka. Kiristu, Deus zipehata ba zihyrikosokda. Tawahi mynapykyryk — niy. — Ikia “Utakta iknasikta maku babata ahawata ikyzik” tsimy. Atahi inasikta maku babata mywata mohyrikosokda bykyze mynahyrizikpo tsimy. Atakta ja Deus zipehata niwatihi atsatu sa — nikaranaha.

<sup>35</sup> Sesus ispe niy:

— Utakta Deus harere myzubaha bo mysihyrinymyryky. Aba mysihyrinymyryky. Aibani mohyrikosokda iwatsahi kahumo ahaspirikporẽtsa tsimoziknaha. Abaka kahumo ahaspirikporẽtsa zeka wasani my. Kahumo ahaspirikpo ahabyizeka sinini ykarawy bo tsimaha. Kytsa unata eze batu pão maha. Hana bo mykaranaha miwa humo batu sihyrinymyry. Iwa kytsa kahumo batu sispirikpo miwa ezektsa watsa mykaranaha. Asahi sinini ykarawy tahasapy humo hi batu sihyrinymyry. Kytsa miwa haburuk tu mokurunahatsa watsa.

<sup>36</sup> Utakta ahatukze kahumo ahaspirikporẽtsakta! Iwaze katyryktsa tsimoziknaha.

Ahamysapyrẽtsa tsimoziknaha. Meky watu tsimoziknaha. Kytsa iwororoha buruk pitabakanahaze ana bo hi pinynaha ikiahatsa siwatsa tsimoziknaha – niy. Iwaze nitsasobaze niparak. Kytsa sizubarẽtsa papatu niparak.

*Sudeutsa Sesus humo batu sispirikpo.*

<sup>37</sup> Kyze Sesus zikwy myzubaha bo ziwatawyky. Asahi ihumo batu sispirikpo. Iwaze iwatawy bo iktsa nikaranahaze ihumo batu sispirikpo.

<sup>38</sup> – Tubabatu Deus sohotsa Isaijas botu ziwatahaka:

“O mypehakatsa aharere ty kytsa sizubarẽtsa bo iktsasoko. Kytsa aharere humo batu sispirikpo.

Ikia azikwy soho humo batu sihyrinymyry. Ikia azikwy soho sihumo tsihokdaharẽna” niy. Iwa nihyrikosokdata Isaijas kasoho ziwatahaka. Iwaha humo hi kytsa batu kahumo sispirikpo mahaze Isaijas harere wasani my nikaranaha. Isaijas papeu humo ziwatahaka – niy. Asa watsa nikaranaha.

<sup>39</sup> Sudeutsa Sesus humo batu sispirikpo. Hawa Isaijas tubabatu ziwatahaka nikaranaha. Isaijas nihyrikosokdata:

<sup>40</sup> – Deus hawa kytsa mytsaty mykaranaha tsihyrinymyrẽta ihumo paikpa mytsaty mykaranaha. Deus zikwy humo batu sispirikpo.

Izikwy bo iktsa nikaranahaze batu ihumo sispirikpo. Deus harere ziwabynahaze batu ihumo sispirikpo. Ihumo sispirikpobyritsa tu simysapybyitsa nikaranaha Deus batu mysiokzo.

Simysapybyritsa situk niapykyknaha.

Batu ihumo sispirikpo iwatsahi simysapyby-  
itsa nikaranaha Deus ba zisiokzo – niy.

Iwa tubabatu Deus sohokotsa Isaijas ziwatahaka.

<sup>41</sup> Tubabatu ziwatahaka iwatsa tu Sesus harere ty kytsa batu siwabyhy, ana humo hi tsihyrinymyrêta. Iwatahi ziwatahakaze Sesus soho ziwatahaka. Aibani zuba aparakbaha ana humo hi sihyrinymyrêtsa.

<sup>42</sup> Sudeutsa taparaktsa sizubarêtsa ihumo sispirikporêtsa. Batu tyso:

– Katsaktsa Sesus humo myspirikporêtsa tsi-  
moziknaha. Ana ty hi batu tyso. Pariseutsa  
pokso sipybyrêtsa ba ziktsasonaha. Sudeutsa wa-  
horo tozeka ja kytsa ispe nabo pâotaha. Iwaze  
ba ziknapupunaha ana pokso sipybyrêtsa iwata-  
sahi batu tyso “Sesus humo myspirikporêtsa” –  
mykaranaha.

<sup>43</sup> Pariseutsa harere bo mytsatyziu nikaranaha. Kytsa harere humo zuba sakurêtsa. Deus humo ka batu. Deus harere humo tsikaeni zuba sihyrinymyrêtsa nikaranaha.

*Sesus harere tsimysapyrêna baba. Izumuze kytsa Deus bo nasioktyhyryk humo iwatahi izumu.*

<sup>44</sup> Sesus sizubarêtsa opykani nisihuahua:

– Kytsa kahumo mynakaranaha zeka kahumo sispirikporêtsa. Ata humo zikpehaka sispirikporêtsa niwatihi – niy.

<sup>45</sup> – Aty pikny zeka kazo kino piny. “O atakta Deus tse” my zeka Deus zikpehaka niwatihi yhy my – Sesus niy.

46 — Uta mybarawy bo ikzumu. Deus harere ty pahahyrinymyry iwatahi ikzumu. Kytsa kahumo sispirikporëtsa iwatsahi simysapyrëtsa moziknaha. Kytsa iwororo ha buruk pitabakanahatsa watsa pinynaha siwatsa moziknaha. Hawa wasani mykaranaha sihyrinymyrëtsa, meky watu moziknaha. Simysapyrëtsa hi.

47 Aty kaharere piwabykyze iwaze batu yhy my. Uta kino batu tyso: “O ikia Deus okzeka batu amysapy tsimy” iwa batu tyso. Utakta mybarawy bo ikzumu kytsa sizubarëtsa bo my. Sizubarëtsa simysapybyitsa nikaranaha kahumo meky watu moziknaha zeka Deus bo mysioktyhyk. Iwatahi ikzumu.

48 Asaktsa kahumo batu sispirikpo. Kaharere bo batu yhy mykaranaha. Usta ispe: “Ikiahatsa Deus okzeka batu ahamysapy tsimykaranaha” my. Deus aparakbaha mynasihyryzikpoze ispe my: “Ikiahatsa Deus okzeka batu ahamysapy tsimykaranaha”. Utakta ahasoho ty batu tyso. Usta iwa motsasoko. Kytsa kaharere bo batu yhy mykaranaha zeka iwa ispe my.

49 Hawa motsasoko kazo harere my. Iharere hi ahabo motsasokoro. Hawa pahahyrinymyryky iharere zuba mykara. Usta harere ty ka batu tyso. Kazo harere zuba motsasoko.

50 Iharere bo hyy tsimaha zeka meky watu tsimoziknaha. Ahamysapyrëtsa tsimoziknaha. Tsimyhyrikosokdanahaze Deus tuk ahawahi tsimynapykyryknaha. Ana humo hi kahyrinymyrëta. Iwatahi iharere zuba motsasoko — Sesus niy.

# 13

## *Sesus tuk zinymyrykynahatsa nisipyrypikik.*

<sup>1</sup> Byriri Paskoa maha taeze myikaha nakymy. Sesus zinymyrykynahatsa tuk tadisahaka. Sesus sihumo tsimypokzitsiarêta. Abahi mohyrikosokda naha humo tsihyrinymyrêta. Tazo bo piksizo ana humo hi tsihyrinymyrêta. Iwatahi tahadisahakanahaze hawa sihumo tsimypokzitsiarêta mysiwatawyky. Sihumo tsimypokzitsiarêta nikara.

<sup>2</sup> Zinymyrynahatsa tuk tadisahaka. Sudas Iskar-iotses Sesus sukyrytsitsa bo pioktyhyryk. Sesus soho sukyrytsitsa bo motsasoko. Sudas Iskariot-ses Simotse my. Hyrikoso sapybara pehakatsa Satanas humo Sudas Iskariot-ses Sesus isukyrytsitsa bo pioktyhyryk isopyksapybyita nikara.

<sup>3</sup> Sesus ana humo hi tsihyrinymyrêta nikara. Atahi:

— O Deus tazikwy ty kabo nynyty niy. Deus kazo zikpeha. Aba Deus bo piksizo — niy. Ana humo kino Sesus tsihyrinymyrêta.

<sup>4</sup> Kyik niyze takpyzazawy ty zukata niy. Iwaze takwiwy ty okok niy. Tazikuoik humo hañ niy.

<sup>5</sup> Iwaze pihik ty mypewy bo zisusuku niy. Maraksu maraksu nikara. Zinymyrykynahatsa nisipyrytsapikik. Tapara zipyrypikik iwaze zipyrywiki. Usta bo zipyrypikik iwaze zipyrywiki. Siwatu nisipyrytsapikik.

<sup>6</sup> Iwaze Simaõ Peduru bo zumuze. Peduru:

— O hawa sa tsimy tsipikpyrytsapik sa — niy.

<sup>7</sup> — Yhỹ my. Aba nawa humo papyrytsapikik batu ahyrinymyry. Aibani zuba tsipinymyry

amy humo papyrytsapik iwatahi aibani zuba tsipinymyry – Sesus niy.

8 – O batu ba niy. Ikiakta ba zikpyrytsapik – Peduru niy. Sesus ipe niy:

– Aty pyrytsapik ahabyizeka batu katuktsa tsimy – niy.

9 – Tsipikpyrytsapik zuba taziwazy. Katsyhyrypetsa tuk tu iwaze kaharek tuk tu tsimy hỹ – niy.

10 – Tsinamurukunahaze batu ahakpiaktsĩ. Tsahabarazarẽtsa. Deus ahasopyksapybyitsa tu tsikykarannahaze pahaokzohik iokzeka nimuruku tawata tsimoziknaha. Deus botu ahamysapybara ty tsikykarannahaze iwatatu pahaokzo iwatahi inamuruhuknahatsa watsa tsimoziknaha. Estuba zuba ahatuk imysopyksapybyita tu nikara ba ziocko. Imysopyksapybyita tu nikara tsiaktsiarẽta wata niy.

11 Estuba sisukyrytsitsa bo moparak isopyksapybyita mykara ana humo hi tsihyrinomyrẽta iwatahi “Estuba ahatuk imysopyksapybyita tu mykara ba ziocko” – niy.

12 Nisipyrytsapikbaze takpyzazawy ty korobykzo niy. Hwibihi mydisahakawy bo zinymyrynahatsa tuk tadyhyzo niy. Ispe niy:

– Ahapyrytsa pikbaze ahahumo ka sa tsihokdarẽna niy.

13 Ikiyahatsa kape tsimykarannaha:

“Mypehakatsa myhyrinomyryktsa” tsimykarannaha. Wasani tsimykarannaha. Ahapehakatsa. Ahahyrynomyrytsa my.

14 Iwaze pahatsumuẽhĩkĩ iwatsahi ikiahatsa kino niwatihĩ ustsã kysã tysitsumuẽhĩnahaktsã!

15 Ikiahatsa kawatu tynakaranahaktsa! Ahapyrytsa pikiknaha wa. Ikiahatsa ustsatsysitsumuêhĩnahaktsa! Utakta batu tyso:

“O uta sipehakatsa my. Iwatahi batu isty tsumuêhĩ.” Utakta ahatsumuêhĩkĩ. Ikiahatsa kawatu ahamytsumuêhĩhuktsa! Tyharape tsumuêhĩnahaktsa tsimykaranaha.

16 Kaharere tsiwabyziukunahaktsa! Sitsumuêhĩtsa pehatsa wa sukni ahabyita my. Zipehata tohi zipehaka harapewa sukni ahabyita my – niy.

17 – Abaka ahahyrinymyrêtsa tsimaha. Kaharere bo tsimykaranaha zeka ahakurêtsa tsi-moziknaha hỹ.

18 Ikiahatsa bo motsasoko. Asahi nisiwatawyhik. Estuba ahatuk kasukyrytsitsa bo pikoktyhyryk. Imyspihikbatanikita iwatsahi pikbezenaha ana humo hi kahyrinymyrêta. Hawa ha ty Deus papeu humo tubabatu ziwatahaka atsafu my:

“Estuba maku katukta isopyksapybyita mykara. Atakta kadisahawy ty katuk hauk my ata hi isopyksapybyita my” niy.

19 Byri puêtsik kytsa pikbezenaha ana kino ahabo motsasoko. Iwaze pikbezenahaze kaharere humo tsimyspirikponaha.

20 Kaharere tsiwabyziunahaktsa! Atakta pipehahik ihumo tsikspirikpokoze kahumo tsaspirikporêta hỹ. Atahi kahumo tsikspirikpoze atakta zikpehahik niwatihi ihumo tispirikporêta hỹ – niy.

*Sesus ispe niyzo: – Estuba maku ahatukta kasukyrytsitsa bo pikoktyhyryk – niy.*

21 Iwa nitsasoze tisukatsihikrêta niy. Zinymyrykynahatsa pe mypubaraty niyzik.

– Tsiwabyziukunahaktsa! Estuba maku ahatukta kasukyrytsitsa bo pikoktyhyryk. Imyspihikbatanikita – iwa sizubarêtsa bo nitsasoko.

22 Iwaze ziwabynaha tsahi paikpa mytsaty nikaranaha. Asa zuba nipamykysokonaha:

– O aty skaraba. Aty sisukyrytsitsa bo sa pioktyhyryk – nikaranaha.

23 Zinymyrykyta hi Sesus ihumo tsimypokzitsiarêta. Atakta ibaze tu nidyhyky.

24 Iwaze Simaõ Peduru tatsyhyrype ty pawyk niy, zinymyrykyta pe niy.

– “Aty skaraba asukyrytsitsa bo paoktyhyryk” iwa Sesus pe tsimy – niy.

25 Iwaze zinymyrykyta hi Sesus bo okmymy niy. Akbyibatu ipe niy:

– Aty skaraba asukyrytsitsa bo paoktyhyryk – niy. Sesus:

26 – Estuba katuk tamihi ty tumy bo sok my tahi kasukyrytsitsa bo pikoktyhyryk atsatu tsakyhy ty ibo nyny my – niy.

Iwaze atsikara ty okok niy. Zitsakze tumy bo sok niy. Iwaze atsikara tsakyhy ty Sudas Iskariotses bo nyny niy.

27-29 Sudas atsikara tsakyhy zioke Sesus ekze niparak. Satanas harere bo hyÿ niy. Iwatahi hyrikoso sapybara ituk mynapykyryknaha. Sesus ipe niy:

– Aidytykta! Hawa tsimyzeka aidytykta – niy.



Sudas zinymyrykynahatsa okyrysaro zikziperykyta. Iwaze wastuhu kytsa mytsaty ahabyitsa nikaranaha.

– O mydisahawy bo ja – nikaranaha. Utsa kytsa:

– O sinamybyikitsa bo okyrysaro ty nyny my. Ana humo hi Sesus ipe niy: “Aidytykta”. – mytsaty ahabyitsa nikaranaha.

Batu aty tohi Sesus harere bo siwabyhy. Si-hyrinymyrybyitsa tu Sudas niparak. Amy humo nitsaso – Aidytykta! Hawa tsimyzeka aidytykta – niy. Anahi nitsasoze zinymyrykynahatsa batu sihyrinymyry. Iharere sihumo tsihokdaharēna.

<sup>30</sup> Sudas atsikara tsakyhy ziohare eze zoihik. Zunubaze niparak.

*Kaharere ezytyk ahape: – Tyharape pokzitsinahaktsa kytsa! – niy.*

<sup>31</sup> Iwaze Sudas niparakze Sesus ispe niy:

– Utakta ikzumuta maku babata ahawata ikyzik. Abahi mohyrikosokda. Aba kazo piwatawyky “Ikia azikwyrēnikita tu tsamypokz-itsiukrēta tsamysapyrēta awa suknihabiyita” mykara. Kytsa sizubarētsa kahyrikosokzawy humo Deus bo mosakibazikiknaha. “O Deus azikwyrēnikita tu tsimypokzitsiukrēta. Tsamysapyrēta” mykaranaha.

<sup>32</sup> Mytsasokoze “O Deus azikwyrēnikita tu tsimypokzitsiukrēta tsimysapyrēta”. Deus kino niwatihi kasoho motsasoko “Katse zikwyrēnikita tu tsimypokzitsiukrēta tsimysapyrēta”. Abahi iwa piwatawyky – niy.

<sup>33</sup> – O kahyrytsa watsa bykyhyze ahatuk zikurubyita tu. Abahi tsikpikberinahaze ba zik zikanahana. Hana bo my ikahatsa kapik ba zik zikanahana tsimaha. Iwa botu Sudeutsa bo iktsaso. Atsatu ahabo motsasoko – niy.

<sup>34</sup> Puëtsik pahahyrinymyryky – Nawa ahahumo kamypokzitsiarëta ikiahatsa niwatihiktsa. Pahasapywyky ziknakara. Ikiahatsa niwatihiktsa. Usta bo tsisapywykynaha tyharape pokzitsikinahaktsa! – niy.

<sup>35</sup> – Tsinaharape pokzitsikinaha zeka kytsa tihi: “O Sesus tyryktsa” mykaranaha – Sesus niy.

*Sesus Peduru nizukpeheze – O batu Sesus kanyhy tsimy – niy.*

<sup>36</sup> Iwaze Simaõ Peduru ipe niy:

– Hana bo sa ikia tsimykuru – niy.

– Aba hana bo my ikiakta ba kapik zikykta. Ikiakta pyktohitykta kapik tynao – niy.

<sup>37</sup> Peduru Sesus pe niyzo:

– Hawata sa uta batu apik my. Abaka ikia apik my. Hawa ikia apik batu yhy tsimykara. Uta kino atuk tu apokzi mohyrikosokda – niy.

<sup>38</sup> – Paze! kapokzi tsimyhyrikosokda ja niy. Kaharere bo mytsatytykta! Kokuaro ipobyize harakykbyi “Batu Sesus kanyhy” mybarapetu tsimykara – Sesus niy.

## 14

*Sesus humo hi Deus hyrytsa tsimoziknaha, atahi myske wata.*

<sup>1</sup> Sesus tuk zinymyrykynahatsa pe niy.

– O mytsaty mytsaty byijataha. Ahasukat-sihikbyihu ja tynakaranaha! Ikiahatsa Deus humo ahaspirikporëtsa. Kahumo kino niwatihi ahaspirikporëtsaktsa kytsa!

<sup>2</sup> Wahoro zuba kazo baze my. Ikiahatsa tsyhyryze wahoro tsizubarëna. Wahoro ahabyizeka ikiahatsa bo ba ziktsaso. Abaka ahatsyhyryze pahawanusapy. Ba ahabyizeka ahape ziky.

<sup>3</sup> Aba piksi. Ahawanu sapy pikymy zeka ahabo myziksizo. Pahaoktyhyryk. Iwaze katuk tsinapykyryknaha. Ahawahi katuk tsinapykyryknaha. Katuk tu tsipahasapynaha.

<sup>4</sup> Ske tsinybanaha. Hana bo mokuru naha bo hi tsinymyrykynaha hỹ – niy.

<sup>5</sup> Tome:

– Hana bo sa tsimykara katsaktsa batu myhyrinymyry. Asapy sa haneze katsaktsa batu myhyrinymyry. Iwatsahi hawa sa nabo tsimykurunaha ana humo hi batu myhyrinymyry hỹ – niy.

<sup>6</sup> Sesus ispe niy:

– Uta hiba ahaske wata buruk kazo sapy bo pahaoktyhyryk. Utakta Deus harere baba ty pahyrynymyryky kahumo zuba meky watu tsimoziknaha. Ahamsapyrëtsa kahumo tsimoziknaha. Ikiahatsa kahumo zuba Deus bo tsipomonaha.

<sup>7</sup> Abaka ikiahatsa botu tsiknynaha hỹ iwatsahi kazo kino niwatihi tsinynaha. Hawa ikykara naha bo iktsa tsikykaranaha zeka anawa hi kazo mykara ahahyrynymyrëtsa hỹ – Sesus niy.

<sup>8</sup> Piripi Sesus pe niy:

– Azo ty mybo tsiwatawykta! Azo bo iktsa tsimaha zeka mykurẽtsa tsimaha – niy.

<sup>9</sup> – O Piripi tubabatu ahatuk ziknapykyryk. Iwatatu sa batu katyny. Ahatuk tu ziknapykyrykta tu batu katyny niy. Aty pikny zeka ata kino niwatihi kazo ziny. Iwatahi amo humo sa tsimytsasoko. “Azo ty mybo tsiwatawykta! tsimy” – niy.

<sup>10</sup> – Uta kazo wata anatyhi yhỹ tsimaha katsa harapewatsa tu. Batu kaharere zuba ahawabyhy. Kazo harere kino ahabo motsasoko. Hawa kazo nitsasoko naha hi motsasoko.

<sup>11</sup> Uta kazo wata. Harapewatsatu tsimaha. Kaharere bo tsikaeni zuba yhỹ tsimaha zeka iwaze kazikwy humo tsimyspirikpotohinaha – niy.

<sup>12</sup> – O wabyziutahaktsa kytsa. Katuktsa kahumo sispirikporẽtsa kawa tu sisopyk. Uta kazo bo piksize izikwy piwatawy. Hawa kytsa bo kazikwy humo iwatawy katuktsa kino niwatihi kazikwy humo kytsa bo piwatawynaha. Kazo bo piksize iwatsahi katuktsa kazikwy tsizubarẽna kytsa bo piwatawykynaha.

<sup>13</sup> Kabo tsinapamykysokonaha zeka “Hawa ha ty tsimyzehikiknaha ana hi tsinazapykykynaha” tsimykaranaha. Iwaze hawa ha tsinazapykykynaha anatyhi ahabo nyny mynakara. Kytsa tihi: “O Deus amysapyrẽnikita” mykaranaha. Hawa ha ty tsikzapykykynaha ty ahabo nyny myze kytsa Deus soho “imysapyrẽnikita” – mykaranaha.

<sup>14</sup> Ikiatsa kabo tsimypamykysokonaha zeka:

– Hawa ha tsimyzehikiknaha ty zuba tsimykaranaha. Iwaze anahi tsimyzapykykynaha

atsatu ahabo nyny mynakara. Tsizubarẽna ty ahabo nyny mynakara – niy.

*Sesus tazo pe: – O kazo usta atsumuẽhĩtsa kawata katuktsa bo tyzipehahikta – niy.*

<sup>15</sup> Sesus tihi:

– Ikiahatsa kahumo ahamypokzitsi zeka kaharere bo hyỹ tsinakaranaha – my.

<sup>16</sup> Kazo pe my zeka:

– O kazo usta tsumuẽhĩtsa katuktsa bo myzipeha. Usta tsumuẽhĩtsa kawata tyzipehakta my. Iwaze ihyrikoso myzipeha. Pahahyrinymyry, tawahi ahatuk mynapykyryk.

<sup>17</sup> Kytsa kahumo batu sispirikpo asahi iharere bo batu yhy zikaha. Iharere sihumo tsihokdahrẽna. Iharere humo ka batu sihyrinymyry. Iki-ahatsaktsa tsahyrinymyrẽtsa. Iharere kino ikiahatsa humo batu ihokzaha – niy.

<sup>18</sup> – Bakta kawahi paharekta ziwazy. Ahabo myziksizo.

<sup>19</sup> Aba nurũbabatu kytsa kahumo sispirikpoby-itsa ba ziknyzonaha. Ikiahatsa iwatsa tu tsipiknyzonaha. Ikiahatsa niwatihi tsimynahyrizikponaha. Iknahyrizikpo naha humo ahamysapyrẽtsa tsimoziknaha.

<sup>20</sup> Uta kazo harere bo hyỹ mynakara. Ikiahatsa kaharere bo hyỹ tsinakaranaha. Uta kino niwatihi ikiahatsa tuk yhy mykara. Iwa mysopyk tsimykaranaha. Bykyze ana hi tsipinymyrykynaha.

<sup>21</sup> Aty kaharere bo hyỹ my zeka atahi kahumo tsimypokzitsiarẽta mykara. Atahi kazo mozipokzitsiki. Uta niwatihi mozipokzitsiki. Kasoho humo

pinymyryky. Kasoho humo tsihyrinymyryrêta mozik – niy.

<sup>22</sup> Sudas Tadeu tihi:

– Hawa skaraba mybo zuba asoho tsipiwatawyky Asaktsa ahumo sispirikpo ahabyizeka asoho batu tsipiwatawy. Hawa tsimy – niy. Iwa Sudas nitsaso. Atakta batu Sudas Iskariotses. Usta Sudas Tadeu inarokota.

<sup>23</sup> Sesus nitsasokozo:

– Asaktsa kahumo simypokzitsirêtsa kaharere bo hyÿ mykaranaha. Kazo sihumo tsimypokzitsiukrêta, iwatahi situk mynapykyryk. Kazo situk mynapykyryk. Uta niwatihi katsa situk mywahi tsinapykyryknaha.

<sup>24</sup> Sispirikpobyitsaktsa kaharere bo batu yhÿ zikaha. Kaharere kazo botu nitsasoko ana kino tsipiwabynaha. Kazo zikpeha iharere hi motsasoko.

<sup>25</sup> Ikiatsa tuk tihi motsasoko.

<sup>26</sup> Kyze kazo hyrikoso ahabo pipehahik. Kaharere humo tahyrikoso ahabo myzipeha. Atahi ahatsumuêhÿtsa mozik. Pahahyrynymyry. Uta ahahyrynymyryky ana humo hi batu ahaspirikt-sokdahu. Kaharere ty pahaspirikpoziuku. Deus hyrikoso tsimysapyrêta hÿ.

<sup>27</sup> Kytsa kahumo batu sispirikpo paikpa mytsaty mykaranaha. Katuktsa batu sispirikpobyitsa watsa. Utakta batu paikpa mytsaty mykara. Iwatahi ikiahatsa kawata mytsaty mytsaty byitaha. Ahakurêtsa tsimaha. Kahumo ahapyby byihu ja. Kahumo ka ahasukatsihik byihuja. Kahumo tspirikpokonahaktsa iwatsahi tsahapunihikrêtsa tsimoziknaha – niy.

<sup>28</sup> Botu tsiwabykynaha:

– Utakta piksi. Bykyze myziksizoze ahatuk mynapykyryk. Anahi motsasokoze tsiwabykynaha. Uta kazo bo. Kaharere bo ma tahaktsa. Kazokta abazubata my. Iwatsahi ahakurẽtsa tsimahaktsa kytsa! Kazo humo ahamypokzitsirẽtsa. Tsipikpokzitsikinaha zeka ahakurẽtsa tsimoziknaha.

<sup>29</sup> Aba motsasoko kyze piksi.

“Piksi zeka kahumo ahaspirikporẽtsa” – mytsaty mykara. – Aba piksi hawa ahabo iktsasoko, ana humo hi ahaspirikporẽtsa.

<sup>30</sup> Aba Satanas harere humo kytsa kahumo batu sispirikpo ispehatsa atahi kabo mozumu. Iwatahi ahabo tsikaeni zuba motsaso. Atahi batu kakzotsabyita. Iharere bo yhyhabyita ziknakara – niy.

<sup>31</sup> – Uta kazo harere bo zuba hyỹ mynakara. Kazo humo kamypokzitsiarẽta mykara. Iwatahi iharere bo zuba hyỹ mykara. Kytsa kahumo batu sispirikpo asa bo hi piwatawyky. Utakta Deus harere bo zuba hyỹ mynakara anabo hi mysiwatawyky – niy.

– Kyikyitahaktsa. Tupaktsa kytsa! – niy.

## 15

### *Sesus hi duabohotsa sa wata.*

<sup>1</sup> Kyze Sesus:

– Uta hi duaboho taypykze mytahara tawata my. Kazo waratok tsihitsa wata my. Waratok eze duabohozatsa nisiparikik.

<sup>2</sup> Katukytsa duabohotsa sakatsa watsa maha. Asahi kazo harere bo batu zikahabyitsa sisakatsa watsa, asaktsa ziktaharanaha ahabyizeka tahasazyzykykwynaha. Utsaktsa

siharahoktsa tsihitsa duaboho taypykze sisupesapy mysisakakare zeka iwatsahi nataharasukbabyinaha. Iwa kazo tihi mykara. Katuktsa iharere bo batu yhỹ mysisakakareke tawata. Kazo katuktsa situk mynapamykysoko iwatsahi simysapybyitsa nikaranaha pimoewynaha iwa mysitsumuẽhĩkĩ. Hawa sibo mykara wasani my ana humo hi simysapyrẽtsa tohi mykaranaha hỹ.

<sup>3</sup> Kazo ahamysapybyitsa tsikykaranaha botu zahaokzohik. Kaharere bo hỹ tsimykaranaha zeka ahamysapybara ty botu zahaokzohik.

<sup>4</sup> Kaharere bo hỹ tynakaranahaktsa kytsa! Kaharere bo hỹ tsimaha zeka uta ahatuk mynapykyryk. Atsa botu mytsaty tsimykaranaha. Mykurẽtsa tsimoziknaha. Duabohotsa sa ppyk ahabyizeka ba ziktaharanaha. Ikiahatsa niwatihi. Kaharere bo yhỹ ahabyi zeka kazo tuk kino niwatihi batu yhỹ tsimaha. Hawa kazo mozihihik batu ahahyrinmyry – Sesus niy.

<sup>5</sup> – Uta duabohotsa sa taypyknahaze mytaha-ranahaze tawata. Ikiahatsa duabohotsa sa watsa tsimaha. Kaharere bo hỹ tsimaha zeka Deus okzeka ahamysapyrẽtsa tsimaha. Uta kino niwatihi ahatuk yhỹ mykara. Katsa mykurẽtsa hi. Ikiahatsa kaharere bo batu yhỹ ahabyizeka hawa tsimaha Deus okzeka batu ahamysapy. Hawa tsimaha Deus okzeka mahani tsimaha – niy.

<sup>6</sup> – Asaktsa kaharere bo yhỹ ahabyi zeka siparahatsa watsa. Waratok tsihitsa siharabyitsa nisizyzykyk izo bo nisiwezohik. Mynaparana-haze izo bo piwezona. Ikiahatsa niwatihi



katuk tsimynapykyryknaha ahabyizeka ahakuby-itsa tsimaha – niy.

<sup>7</sup> Iwatsahi kaharere bo hyĩ tynakaranahaktsa katuk tsimykaranaha, katuk tsinapykyryknaha zeka amy ty Deus bo tsinazapykyrynaha atsatu ahabo nyny my.

<sup>8</sup> Ikiyahatsa kazo harere bo hyĩ tsimykaranaha zeka kytsa kazo pe maha:

– O ikia tsamysapyrēta – mykaranaha. Iharere humo hyĩ tsimykaranaha zeka kytsa ahasoho motsasokonaha:

– O asahi Sesus tuktsa maha – mykaranaha.

<sup>9</sup> – Uta ikiahatsa humo kamypokzitsiarēta. Kazo wata atahi kahumo tsimypokzitsiukrēta my. Ahakuhuktsa kytsa! Sesus myhumo tsimypokzitsiukrēta. Iwatsahi ahakurētsa.

<sup>10</sup> Kazo harere bo hyĩ mynakara. Iwatahi kazo kahumo tsimypokzitsiukrēta. Iwaha bo hi mytsaty mykara zeka kakurēta hi. Ikiyahatsa kino niwatihi kaharere bo hyĩ tsimykaranaha zeka ahakurētsa tsimoziknaha. Sesus katsa myhumo tsimypokzitsiukrēta. Iwaha bo hi mytsaty tsimykaranaha zeka ahakurētsa tsimoziknaha – niy.

<sup>11</sup> – Iwa motsasoko iwaze kahumo ahakurētsa tsimoziknaha. Uta kakurēta hĩ. Ikiyahatsa tsikaeni zuba ahaku zeka batu myzehikik. Ikiyahatsa ahakurētsa babatsa tsimoziknaha zeka iwa hi myzehikik. Kawatsa tsimaha. Kakurēta hi – Sesus niy.

<sup>12</sup> Ahape mykara:

– Tynaharape pokzitsikinaha! Ahakyri byihuja. Uta pahapokzitsiki ikiahatsa kawa tihi tynakaranahaktsa.

<sup>13</sup> Aty tatuktsa pokzi mohyrikosokda zeka kytsa mykaranaha:

“O atakta itukta humo tsimypokzitsiarêta”. Myhyrikosokdaze iwa itukta humo tsimypokzitsiukrêta hiba – nikaranaha.

<sup>14</sup> – Ikiahatsa kaharere bo hyÿ tsimykaranaha zeka ikiahatsa katuktsa babatsa – my.

<sup>15</sup> Ahasoho ty batu tyso – O asahi katsumuêhÿtsitsa mykaranaha. Hawa tsihitsa mykara tatsumuêhÿtsitsa bo batu tyso. Ahahumo meky watu kasopyk. Ikiahatsa kaharereziuwyttsa tsimoziknaha. Nawa kazo kabo nitsasoko atsatu ahabo motsasoko. Iharere ahabo botu iksasoba.

<sup>16</sup> Ikiahatsa humo ka batu kawatawyhy “O kat-saktsa atuktsa tsimoziknaha” tsikaha. – Iwa batu tyso. Uta hi ahawatawyhik.

– Asahi katuktsa moziknaha – iky. Iwa motsasoko.

– Utsa bo pahapehahik iwatsahi kahumo sispirikporêtsa ahaharere humo. Asahi kahumo sispirikporêtsa hi. Amy ty Deus kazo bo tsinazapykykynaha zeka kaharere humo iwatsa tu ahabo nyny my.

<sup>17</sup> Ahatuk napykyknahaze tynaharape pokzitsikinaha – iwa mykarazo.

*Kytsa Sesus humo sispirikpobyitsa hi iwatsahi Sesus tuktsa nasisukyrykynaha.*

<sup>18</sup> Sesus nipamykysokozo:

– Kytsa kaharere bo yh̃y ahabyi zeka asahi kahumo tahakyrikinaha iwatsahi ahabo kino niwatihi batu siakparawy. Pahamyijakanaha. Pahasukyrykynaha. Taparaka batu kahumo siakparawy ana bo hi mytsatzyiutahaktsa kytsa – niy.

<sup>19</sup> Ikiahatsa mekywatsa tu tsimoziknaha. Asahi Deus humo batu siakparawy siwatsa batu tsimykaranaha. Uta hiba ahawatawyhik katyryktsa tsimoziknaha iwatsahi kytsa ahahumo batu simypokzitsiu. Iwatsahi tahakyrikinaha. Pahamyijakanaha. Pahasukyrykynaha. Ikiahatsa siwatsa tsimyzurukunaha zeka ahahumo siakparawy.

<sup>20</sup> Kaharere bo wabyziutaha! Ahatuk tu ka tysosobyijataha:

– O kapehatsa zisukyrykynaha. Katsaktsa batu. Batu myty myija – mytsaty ahabyitsa tsimykaranaha. – Kytsa kahumo batu sispirikpo zikapikiknaha. Iwatsahi aha humo kino niwatihi pahapikiknaha. Kaharere bo ma ahabyitsa ziknakaranaha ahaharere bo niwatihi batu ma zikaha – niy.

<sup>21</sup> – Kapokzi ikiahatsa sinini tsimykaranaha. Kytsa kaharere bo yh̃y ahabyizeka pahasukyrykynaha. Deus zipehata humo batu sispirikpo iwatsahi pahasukyrykynaha.

<sup>22</sup> Uta sibo zuk ahabyi zeka Deus okzeka wasani mykaranaha tsawatsa. Deus harere ty sibo tyso ahabyizeka Deus okzeka wasani mykaranaha tsawatsa. Uta ikzumutawy. Kaharere bo batu yh̃y mykaranaha iwatsahi Deus okzeka batu simysapy mykaranaha – niy.

<sup>23</sup> – Kytsa kahumo batu siakparawy. Kahumo tahakyrikinaha kazo humo kino niwatihi tahakyrikinaha. Asahi ihumo tahakyrikinaha iwatsahi batu siakparawy.

<sup>24</sup> Kazikwy tsizubarēna bo iwatawyky. Utsa zikwy tsikaeni zuba. Utakta kazikwy tsizubarēna. Batu aty tohi zikwykyta. Kazikwy ty tyny ahabyizeka wasani mykaranaha. Kazikwy zinyaha. Zinyahatsa tu kahumo batu sispirikpo. Iwatsahi Deus okzeka batu simysapy mykaranaha. Batu wasani mykaranaha kazo batu siakparawy. Uta kahumo kino niwatihi batu siakparawy mykaranaha – niy.

<sup>25</sup> Deus papeu humo sisoho botu ziwatahaka:

– Batu isty myi. Batu aty tohi humo ykyrisukni. Iwatsa tu kahumo ziknatakyrikinaha – niy.

<sup>26</sup> Kazo bo piksizoze ipe my:

– O kazo ahyrikoso tsipehahikta. Katuktsa bo tsipeha – my.

– Iwaze ikiahatsa bo pipeha. Atahi pahatsumuēhīkī. Hawa wasani atsatu pahahyrinomyryky. Kasoho ty pahahyrinomyryky.

<sup>27</sup> Ikiahatsa kino niwatihi. Kasoho humo kytsa tysihyrinomyrykynaha. Ikiahatsa katuk tapara tu tsikapykyryknaha. Iwatsahi kasoho humo kytsa ty tysihyrinomyrykynaha – niy.

## 16

<sup>1</sup> Sesus:

– Kyze iwa ahabo tsizubarēna iktsasoko. Bykyze kytsa ahape mykaranaha:

“O Sesus harere bo batu yh̄y tsimaha! Ihumo niwazuba tsimahaktsa!” mykaranaha. Iwaze

kaharere bo mytsaty tykaranahaktsa. Iwatahi tsizubarëna ahabo motsasoko.

<sup>2</sup> Kytsa ahahumo tahakyrikinaha. Asahi ahape: “Sudeutsa wahoro bo ba zikpupuzonaha” mykaranaha. Pahaba tsihikiknaha. Pahabanahaze iwa mytsaty mykaranaha. “O Deus okzeka wasani tsimykaranaha” mybarapetu mykaranaha.

<sup>3</sup> Zahasukyrykynahaze kazo humo batu sispirikpo. Kahumo niwatihi batu sispirikpo iwatsahi pahasukyrykynaha.

<sup>4</sup> Iwatahi ahabo motsaso. Aibani kaharere bo mytsaty tsimykaranaha. Pahasukyrykynaha zeka ahatuk zuba tsimypamykysokonaha “O tapara mypehatsa iksibyize mybo botu nitsaso. Kytsa mymysukyrykynaha anahi botu nitsaso tsimaha” – niy.

*Deus hyrikoso pahatsumuëhĩ.*

<sup>5</sup> Sesus nitsasokoze:

– Abaka zikpehata bo piksizo. Batu aty tohi kape ziky hana bo sa tsimy. Iwa batu tyso.

<sup>6</sup> Piksizo zeka ana humo hi ahasukatsihikrëtsa. Iwa motsasoko ahasukatsihikrëtsa.

<sup>7</sup> Hawa tisapyrëna motsasoko. Erete ahabyizeka Deus hyrikoso ba ziknasik. Ahatsumuëhĩtsa ba zikzumu. Piksi zeka ahabo myzipeha. Iwatsahi ahakurëtsaktsa kytsa. Kazo bo piksizo ana humo hi ahakurëtsa tsimoziknaha – niy. Atsatu tsinakaranaha. Iwatahi taparaka ahape ziknakara.

<sup>8</sup> Myzumuze kytsa kaharere humo batu sispirikpo atahi ispe my:

– Kytsa kahumo batu sispirikpo Deus okze batu simysapy mykaranaha. Deus zuba kytsa humo

nasisapywyky. Ihumo zuba simysapyrētsa mozik-naha. Kytsa simysopyksapybyitsa nikaranaha humo pisininiwyky iwa Deus hyrikoso mynasikze motsaso.

<sup>9</sup> Kytsa kahumo batu sispirikpo iwatsahi Deus okze batu simysapy mykaranaha ziknharape-sapybyrikinaha. Kahumo batu sispirikpo iwatsahi simysapybyitsa mykaranaha. Kaharere bo batu yh̄y zikaha iwatsahi ziknharape sapybyrikinaha batu simysapy mykaranaha.

<sup>10</sup> Kazo bo piksize ba ziknywyzo. Jobo kazo bo myzo ba ziknywyzo. Deus hyrikoso kytsa pe: “Sesus tisopyksapyrēta wasani isopyk” – mykara.

<sup>11</sup> Deus botu nitsaso. Taparakta kytsa Sesus harere bo batu yh̄y niy Satanas inarokota sininiwy mykara. Iwatahi Deus hyrikoso kytsa pe simysapybyitsa nikaranaha asahi Deus mysininiwyky.

<sup>12</sup> Ahabo motsaso tsihikik tsizubarēna my. Abaka ba ziktsasozo. Ahasukatsihikrētsa iwatahi ababo ba ziktsaso.

<sup>13</sup> Hawa wasani Deus hyrikoso pahahyrinomyryky. Myzumuze hawa wasani motsasoko. Taharere ka ba ziktsaso. Tapara botu ziwaby ana kino ababo motsasoko. Hawa aiba tohi mykara ana humo kino pahahyrinomyryky.

<sup>14</sup> Pahahyrinomyryze Sesus tisopyksapyrēta wasani mykara iwa kytsa ihumo motsasokonaha. Wasaniha ty zuba ababo motsasoko.

<sup>15</sup> Kazo mykara naha ty uta kino niwatihi mynakara. – Deus hyrikoso harere ababo motsasoko – niy.

*Ahasukatsihikrẽtsa tsimoziknaha. Bykyze ahakurẽtsa tsimozikzonaha.*

<sup>16</sup> Sesus nitsasokozo:

– Abanurybabatu piksi, kabo ba ziknynaha. Aiba zuba kabo tsipiknyzonaha – Sesus niy.

<sup>17</sup> Zinymyrykynahatsa asa zuba nikaranaha:

– Hawa skaraba mykara. “Abanurybabatu piksi. Kyze kabo ba ziknynaha. Utakta kazo bo my niy.” Hawaha skaraba mybo nitsasoko. Iharere tsihokdaharẽna.

<sup>18</sup> Amy humo “aiba zuba tsipiknyzonaha”. Iharere myhumo tsihokdaharẽna – nikaranaha.

<sup>19</sup> Sesus amo zinymyrykynahatsa mytsaty nikaranaha ana humo kino tsihyrinymyrẽta. Iwaze ispe niy:

– Ahabo motsasokozoze “abanurybabatu piksi. Kabo ba ziknyzonaha. Aiba zuba kabo tsipiknyzonaha hỹ”. Ana hi ja tsimytsasokonaha – niy.

<sup>20</sup> Ikiahatsa bo motsasoziuku:

– Mohyrikosokdaze tsimopuziukunaha. Kytsa kahumo batu sispihik asahi batu sisukatsihik ikiahatsa zuba ahasukatsihikrẽtsa tsimoziknaha. Iwaze puẽtsik zuba ikiahatsa tsimysukatsihikbyrinaha. Tsahakurẽtsa tsimoziknaha.

<sup>21</sup> Wytyk ibykyhy natapyrize tisukatsihikrẽtatsa. Itsapyri humo tisukatsihikrẽtatsa. Ibykyhy mopurukze myitsapyripykze tsakurẽtatsa. Iwatatsahi tabykyhy humo tsakurẽtatsa iwatatsahi itsapyri humo nispiriktsokda.

<sup>22</sup> Ikiahatsa atatsa watsa tsimaha. Abaka ahasukatsihikrẽtsa. Utakta piksiki ana humo hi ahasukatsihikrẽtsa. Aiba ababo myzumuze, ahakurẽtsa tsimozikzonaha. Batu aty tohi isukat-sihik. Ahawahi ahakurẽtsa tsimoziknaha.

23 Deus hyrikoso mozumuze pahahyrinymyryky. Iwatsahi kabo batu tyso “katsa mymyhyrinymyry”. Kaharere ba zikokza my. Deus hyrikoso kaharere pahahyrinymyry. Wabyziutaha! Amy ty Deus bo tsimyzapykykynaha zeka kaharere humo, ana ty hi ahabo nyny my. Deus bo tsimyzapykykynaha zeka kaharere humo wasani my ana humo hi ahabo nyny my.

24 Deus bo batu tysapykyk kaharere humo yhỹ tsimaha my. Tyzapykynahaktsa! Hawa ha ty Deus myzehikik ana hi tsimyzapykykynahaze ana ty hi ahabo nyny my. Kazo ahabo nyny my zeka ahakurẽtsa tsimoziknaha. Ahakurẽtsa hỹ.

*Sesus Satanas zikwy zipyk iwatsahi tsikahapunihiknahaktsa kytsa!*

25 — Taparaka kaharere tsihokdaharẽna. Iksasokoze kaharere tsihokdaharẽna. Kaharere iokpitsĩhĩ hawa ziknaukuru. Aibani zuba kazo harere ahabo motsasoze, mahani ihokdaha. Kazo harere motsasokoze batu ihokdaha.

26 Mytsasokoze iokpitsĩhibara wa mozik. Kazo bo hawa kaharere bo yhỹ my ana hi tsimyzapykykynaha. Utakta kazo bo batu ahatsyhyryze ba zikzapyky ikiahatsa tu kazo bo tsimyzapykykynaha hỹ.

27 Ikiahatsa hi tsimyzapykykynaha. Kazo ahaharere piwaby hỹ. Ikiahatsa humo tsimypokzitsiukrẽta iwatahi pahawaby. Ikiahatsa kahumo ahamypokzitsirẽtsa iwatahi kazo ahahumo tsimypokzitsiukrẽta my. Tsimytsasokonaha zeka “O Deus Sesus tsikzipaha tisapyrẽna” tsimaha. Iwatahi ahahumo tsimypokzitsiukrẽta.



<sup>28</sup> Kazo ikny ikzumu. Mybarawy bo iknasik. Mybarawy ezektsa bo ikzumu. Mohyrikosokdaze kazo bo piksizo – niy.

<sup>29</sup> Zinymyrykynahatsa ipe niaha:

– Abaka tsiwabyziukunaha. Aharere mahani ihokdaha. Abaka ipitsĩhibara ty tsimytsasoko.

<sup>30</sup> Ikiahi tsihyrinymyrẽta. Tsizubarẽna humo tsahyrinymyrẽta hỹ. Amy bo mytsaty tsimykarannahaze anahumo hi tsahyrinymyrẽta. Iwatsahi “Hawa tsimykara” batu tyso, amy ty tsinymyrykynaha ana hi mybo tsimytsasoko. Iwatsahi “Deus zipehata babata tsimy” – tsimytsasokonaha.

<sup>31</sup> – Abaka ja kahumo ahaspirikporẽtsa – Sesus niy.

<sup>32</sup> – Aba nanabyitaba tsimopaparahana. Kasukyrytsitsa pokso paikpa mytsaty tsimykarana. Ahapybyrẽtsa. Kytsa pahabezenaha pokso iwatsahi tsimywakbaiknaha. Ahapybyrẽtsa hỹ. Uta zuba motare. Tsipikarekbanaha zeka uta zuba motare. Iwaze kazo zuba katuk. Kazo zuba ba zikare – niy.

<sup>33</sup> – Iwa motsasoko iwatsahi mytsaty mytsaty byitahaktsa kytsa kahumo ahaspirikporẽtsa. Kytsa kahumo batu sispirikpo asahi pahasukyrykynaha. Utakta sispirikpobyitsa pehatsa zikwy pepykbaik. Iwatsahi ahapunihikrẽtsa tsimoziknaha – Sesus niy.

## 17

*Sesus tazo bo nipamykysoko.*

<sup>1</sup> Kyze Sesus bijoikpe bo iktsa niy, tazo bo ni-pamykysoko:

– O kazo utakta atse babata my. Nawa ty botu tsiktsasoko kasoho ana hi myzubaha bo iky uta kamysapyrēnikita kapunihikrēnikita tsiky ana hi tsiwatawyky. Uta kino niwatihi my. Myzubaha bo iky “O Deus kazo imysapyrēnikita ipunihikrēnikita iwa iksiwatawy”.

<sup>2</sup> – O Deus azikwy ty botu kabo nyny tsiky iwatsahi kytsa kahumo sispirikporētsa. Iwatsahi kytsa meky watu moziknaha. Kahumo simysapyrētsa moziknaha.

<sup>3</sup> Ikia zuba Deus babata. Utakta atse babata. Ikia tsikpeha. Mybarawy bo tsikpeha. Utakta Sesus Kiristu, mybarawy bo iknasik. Kytsa kaharere bo hȳ mahaze simysapyrētsa moziknaha. Kytsa ahumo mospirikponahaze simysapyrētsa moziknaha. Myhumo sispirikporētsa. Myhumo simysapyrētsa moziknaha.

<sup>4</sup> Ikia aharene botu kabo tsiktsaso, ana kino myzubaha bo iktsasoko. “Deus imysapyrēnikita ipunihikrēnikita” ana kino myzubaha bo iktsasoko. Abaka kahyrikzokzawy nepykba.

<sup>5</sup> – O kazo tapara ikia tukze bijoikpe iknyktsa atsumuēhītsitsa kasoho ziknatsasokonaha:

“O Sesus imysapyrēnikita ipunihikrēnikita” ziknakanaha. Tapara ikia bijoikpe mybarawy aha tsikzukni bijoikpe iknyktsitsa atsumuēhītsitsa kasoho humo. “O atakta imysapyrēnikita” ziknakanaha. Abaka abo piksizoze iwa motsasonaha h̄y – niy.

<sup>6</sup> Iwaze zinymyrynahatsa tsyhyryze tazo bo ni-pamykysoko:

– O kazo ikia wastuhu kytsa tsiksiakzoko. Asahi atyryktsa niyzikiknaha. Ikia kytsa tsiksiakzohikze iwaze ikia humo katyryktsa niyzikiknaha. Azikwy sibo iwatawyky. Aharere bo hyÿ mykaranaha.

<sup>7</sup> Sihyrinymyryrëtsa mykaranaha. Hawa ha iktsasoko aharere zuba my, ana humo kino sihyrinymyryrëtsa mykaranaha.

<sup>8</sup> Hawa ha ty botu kabo tsiktsasoko kytsa kahumo sispirikporëtsa atsatu iktsasoko. Aharere humo wasani mykaranaha. Ikia tsikpeha ana hi zinymyrykynaha. Ikia tsikpeha ana humo hi wasape mykaranaha.

<sup>9</sup> – O kazo kakzohotsa tsyhyryze abo mopamykysoko. Utsa kytsa kahumo batu sispirikpo batu tyso. Asahi katyryktsabyitsa tu. Kakzohotsa iksihyrinymyryky sitsyhyryze zuba abo mopamykysoko.

<sup>10</sup> Kytsa kahumo sispirikporëtsa atyryktsa moziknaha. Iwatsahi katyryktsa kino niwatihi moziknaha. Mytyryktsa moziknaha – Sesus niy.

– Kaharere humo simysapyrëtsa niyziknaha. Iwatsahi utsa kytsa kahumo sispirikpobyitsa pe maha: “O atakta imysapyrënikita ipunihikrënikita my ityryktsa simysapyrëtsa humo maha” mykaranaha. Iwa motsasokonaha.

<sup>11</sup> – O kazo ikia zuba wasani tsinakara. Azikwy ty botu kabo nyny tsiky. Iwatahi azikwy hi kazikwy mozik. Abaka abo piksizo. Mybarawy eze ka ba mynapykyryk. Ikia bozo my. Katuktsa mybarawy eze mynapykyryknaha tsysipokzitsiki.

O kazo tysipokzitsikikta. Uta atukze atsabotu mytsaty tsimykaranaha abaka asa kino niwatihi atsa botu mytsaty mykaranaha kazo – my.

<sup>12</sup> – Uta situk ziknakaraze kytsa kaharere bo hyỹ ziknakaranaha. Uta ziknasipokzitsiki iwatsahi kahumo sispirikporẽtsa. Myzubaha abo my-sioқтыhyryk. Estuba zuba katuk ba zioқты atakta batu isopyksapy. Atakta batu imysapy nikara iwatahi ba zioқты. Botu apapeu humo ziwatahaka niy. Nawa batu isopyksapy nikara, botu papeu humo ziwatahaka atsatu nikara.

<sup>13</sup> Abatu abo piksizo. Zinymyrykynahatsa situk abo mynapamykysoko. Kaharere humo sakurẽtsa moziknaha. Uta kakurẽta asa kino niwatihi kawatsa sakurẽtsa moziknaha. Sakurẽtsa babatsa mysitsihikik!

<sup>14</sup> Aharere botu sibo iktsasoko. Kasopyk humo sispirikpobyitsa meky watu sisopyk. Katuktsa niwatihi. Asahi sispirikpobyitsa sopyk humo meky watu mykaranaha. Iwatsahi sispirikpobyitsa katuktsa humo tahakyrikinaha. Mekywatsa humo sispirikpobyitsa tahakyrikinaha.

<sup>15</sup> – O kazo “katuktsa mybarawy ekze ka ba ziksiokty” Katuktsa mybarawy ezektsa humo tysipokzitsikikta kazo! Hyrikoso sapybara pehatsa Satanas inarokota katuktsa ipokso sipybyrẽtsa iwatahi tysipokzitsikikta, katuktsa ikia hi tysipokzitsiki.

<sup>16</sup> Kasopyk humo ka batu sispirikpobyitsa watsa. Katuktsa kino niwatihi. Nawa katuktsa sopyk humo batu sispirikpobyitsa watsa maha. Mekywatu mykaranaha. Kahumo simysapyrẽtsa moziknaha.

17 Aharerebaba wasani my. Aharere tisapyrẽna. Aharere piwabykynahaze ahumo hyỹ mykaranaha. Ikia harere bo zuba hyỹ mykaranaha.

18 Ikia tsikpeha mybarawy ezektsa bo tsiky. Tsikzipehaze mybarawy ezektsa iksihyrinymyryky iwatahi zikpeha. Uta kino niwatihi, katuktsa zinymyrykynahatsa mysipeha. Utsa bo mysipeha. Iwaze mysihyrinymyrynaha. Aharere baba myzubaha bo mysihyrinymyrynaha iwatahi mysipehaka.

19 Abaka katuktsa sapyzekenya mohyrikosokda. Kytsa pikbezenaha zeka yhỹ my. Katuktsa pokzi yhỹ my. Mohyrikosokdaze abo hyỹ maha niwatihi. Mohyrikosokda humo katuktsa kino niwatihi aharere bo hyỹ mykaranaha.

20 Zinymyrykynahatsa soho abo motsasoko. Abaka utsa kytsa zinymyrykynahatsa harere piwabykynahaze kahumo sispirikporẽtsa, sityhyryze abo niwatihi mopamykysoko.

21 O kazo tsimysitsumuẽhĩze sakurẽtsa moziknaha mytsaty mytsaty byijataha iwatsahi atsa botu mytsaty mykaranaha. Mywatsa sisopyk. Mywatsa sisopyk zeka sispirikpobyitsa tihi:

– Deus Sesus zipaha – mykaranaha.

22 Kazo tapara azikwy ty kabo nyny tsiky. Ikia wata uta kino kazikwy katuktsa bo nyny iky. Asahi kahumo sispirikporẽtsa iwaze kazikwy ty sibo nyny iky. Iwaze mywatsa moziknaha, asa zuba sakurẽtsa mykaranaha mywatsa kazo.

23 Utakta situk yhỹ my. Ikia katuk yhỹ tsimy. Iwatsahi sisopyk mywatsa mykaranaha. Mywatsa sisopyk zeka sispirikpobyitsa pe maha:

– Deus kino Sesus zipeha – mykaranaha. Hawa Deus Sesus humo tsimypokzitsiarêta. Deus Sesus tuktsa kino niwatihi tsimypokzitsiarêta iwa mot-sasokonaha. Mywatsa sisopyk zeka iwa mot-sasokonaha.

<sup>24</sup> O kazo ikia nanabyri izuknihibyize ikia zikzipokzitsiki. Tapara mybarawy nizukni kape tsiky:

– Kazikwy ty abo nyny my – tsiky. Abaka zinymyrykynahatsa kaharere piwabykynaha:

– Kazikwy ty abo nyny my – tsimy. Iwa pi-wabykynaha mytukze mynapykyryknaha.

<sup>25</sup> O kazo ikia zuba wasani tsimykara. Tisopyksapyrêta amysapyrênikita iwatahi kamysapyrênikita tsimy. Kytsa sispirikpobyitsa tu ikia humo batu sihyrinymyry. Uta zuba any, zinymyrykynahatsa kaso ho humo sihyrinymyrêtsa. Ikia tsikpehahik tahi kahumo sihyrinymyrêtsa.

<sup>26</sup> Botu sibo iktsasoko:

– Kazo ikia kahumo tsikpokzitsiki nawa tihi asa bo kino niwatihi tsimy. Asa zuba simypokzitsirêtsa tyharape pokzitsikinaha. Iwa sisopyk. Katsa mywata ahasopyk uta situk kasopyk mytsaty mytsaty byijataha atsa botu mytsaty mykaranaha – Sesus niy.

Iwa Sesus nipamykysoko tsizubarêna tazo tuk zinymyrykynahatsa tsyhyryze nikara. Iwa.

## 18

### *Sesus tahurukwy.*

<sup>1</sup> Kyze Sesus tazo bo nipamykysobaze niparak. Zinymyrykynahatsa tuk itsipa tsibik Kederõ

inarokota zitsikzakanaha. Ana hwitsa sazík ziparikiknaha ana bo zumukunaha.

<sup>2</sup> Ana hi zinymyrykynahatsa zinynaha. Ana bo hi Sesus zinymyrykynahatsa tuk pororo ziknakara. Sudas kino ziny. Isopyksapybyita isukyrytsitsa mysioktyhyryk.

<sup>3</sup> Atakta Sesus bo niy. Kederõ tisaziksapyrëna ibo niy. Sodadutsa, Deus wahoro perytsitsa kino niwatihi Sudas nisioktyhyryk. Taparaktsa Deus wahoro eze ziknapamykysokonahatsitsa, Pariseutsa niwatihi sodadutsa Sesus bo nisipehakanaha. Sudas isopyksapybyita iwatahi sodadutsa Deus wahoro perytsitsa kino niwatihi ibo nisioktyhyryk. Sodadutsa tahatanoratsa tahabototsa iwa inasibykyknaha. Rika izo tupyri humo hopok nikaranaha niwatihi zibykyknaha. Sesus bo sizubarëtsa izumukunaha.

<sup>4</sup> Sesus hawa mykaranaha botu tsihyrinymyrëta. Iwatahi kytsa nisihobykze ispe niy:

– Aty sa tsipiberikinaha – niy.

<sup>5</sup> – Sesus tsipiberikinaha. Nasare ezekta – nikaranaha.

– Uta hiba Sesus – niy. Sudas imyspihikbatanikita sisukyrytsitsa tuk niriktohoko.

<sup>6</sup> Nitsasokoze – Uta hiba Sesus – niyze sodadutsa. Iharere ziwabynahaze wytyk bo natsubaiknaha.

<sup>7</sup> Iwaze Sesus ispezo niy.

– Aty sa tsipiberikinaha – niy.

– Sesus Nasare ezekta – niaha.

8 – Batu kawabyhy botu iksaso uta hiba Sesus – niy. – Tshipikberi tshikiknaha zeka katuktsa ty ka paik paik byitaha iwaze piksinaha – niy.

9 Iwa nitsasoko. Nawa botu nitsaso tazo bo:

– Uta iksipokzitsiki asahi kahumo sispirik-porẽtsa – niy. Iharere wasani atsatu nikara. Iwaze kytsa Sudas tuktsa tihĩ – O zinymyrykynahatsa ty ka paik paik byitaha – niaha.

10 Iwaze Simaõ Peduru tasokorotsapu tsizezerẽta zibokik. Ziknapamykysokota Deus wahoro zubata tsumuẽhĩtsa zispizykik. Ispipyryburuk niy. Marakos inarokota.

11 Iwaze Sesus Peduru pe niy:

– Asokorotsapu ty ipesuk bo koroktykta! – niy.

– Niwazubakta katy pokzitsi pokzitsi byity. Uta sinini mynakara. Tubabatu Deus papeu humo ziwatahaka iwa sinini mynakara. Iwa Deus kazo botu nitsaso iwa sinini mynakara – niy.

### *Sesus Anas bo ziockyhyryknaha.*

12 Iwaze kytsa Sudas tuktsa Sesus tsipa humo ziockyhyryknaha. Sodadutsa pehatsaktsa Deus wahoro zubata perytsitsa sizubarẽtsa iwatsa it-sipa humo ziockyhyryknaha. Zipawarakanaha.

13 Niahatsahi Anas taparakta bo ziockyhyryknaha. Anas Kajapas tsere niy. Kajapas Deus wahoro zubata eze ziknapamykysokonahatsa taparakta my.

14 Atakta botu nitsaso Sudeutsa pe niy.

– Estuba zuba tsipibezena zeka wasani maha. Iwatsahi mytyryktsa ba zik mymybanaha estuba zubata tsipibezena zeka wasani my – niy.



*Peduru Sesus soho: – Batu kanyhy – mybarapetu nikara.*

<sup>15</sup> Kyze Simaõ Peduru Sesus hapik niukuru. Usta zinymyrykyta Peduru tuk Sesus hapik niukurunaha. Taparakta ziknapamykysokota ziny. Atahi iwahoro pe zumu Sesus hapik wahoro isturupeze zumu.

<sup>16</sup> Peduru batu paku ape baze tu hokbowy baze niriktohoko. Iwaze usta izoizo. Wytyk hokbowy perytsata pe niy:

– Katukta tynatsukta! tsimy – niy.

Yhỹ niy.

– Anaeze paku tsimy – perytsata Peduru pe niy. Iwaze nitsuk.

<sup>17</sup> Inatsukze atatsa ipe niy:

– O ikia sa niwatihi Sesus tukta – niy.

– Batu kanyhy – mybarapetu niy.

<sup>18</sup> Tsiwarikrẽna. Kytsa sodadutsa tsumuẽhĩtsitsa niwatihi izo zipoknaha. Kytsa izo baze niakpyzazakaranaha. Peduru situk niriktohoko niakpyzazaka.

*Sesus taparakta ziknapamykysokonahatsa bo zioktyhyryknaha.*

<sup>19-21</sup> Iwaze taparakta ziknapamykysokonahatsa Sesus bo nipamykysoko:

– Hawa sa zinymyrykynahatsa mykaranaha Hawa ha ty sa tsiksihyrinymyryky – niy. Sesus:

– Amy humo sa kaspirikpowy soho tsimykara Zikwabykynahatsa sihyrinymyrẽtsa. Uta iksihyrinymyryky iwatsahi ispetaha. Iktsasokoze

aparabaha kaharere ziwabykynaha, anatyhi ik-sihyrinymyryky. Batu okpitsĩ. Sudeutsa wahoro eze ziknasihyrinymyryky, Deus wahoro zubata eze ziknasihyrinymyryky. Batu amy tohi ty okpitsĩ. Iwahatu kaharere soho zikwabykynahatsitsa bo tsimy – niy.

<sup>22</sup> Anas nitsasohoze estuba maku Deus wahoro perytsa ibaze niriktohokota tatsyhyrype ty zioypykik. Ipe niy:

– Iwa taparakta ziknapamykysokonahatsa bo batu tyso. Batu wasani my – niy.

<sup>23</sup> Sesus:

– Kaharere ty wasani ahabyizeka kytsa bo tsimytsasoko. Kaharere wasani my zeka amy skaraba tsikokpykik – niy.

<sup>24</sup> Anas Sesus Kajapas bo zioptyhyryknaha. Itsipatsa waraha tatu ibo zioptyhyryknaha.

*Peduru Sesus soho: – Batu kanyhy – mybarapetu nikarazo.*

<sup>25</sup> Iwaze Peduru izo baze niakpyzazaka kytsa baze nidyhykyze wytyk ipe niy:

– O ikia niwatihi Sesus tukta sa – niy.

– O batu. Batu kanyhy – niy.

<sup>26</sup> Iwaze usta Peduru pe niy. Atahi taparakta tsumuẽhĩtsa. Atahi Peduru zispizykikta tsy. Atahi ipe niy:

– Uta tisaziksapyrẽna eze ikozo tawata. Sesus tukta sa ikia bo ikozo – niy.

<sup>27</sup> Peduru:

– Batu ba. Batu kanyhy. Aty skaraba Sesus – niy.

Iwa niyze hi kokuaro nipo.

*Kytsa Sesus ispehatsa Piratus bo zioқтыhyryknaha.*

<sup>28</sup> Iwaze Kajapas Sesus tuk nipamykysobaze ispehatsaktsa wahoro bo zioқтыhyryknaha. Sipehatsa Piratus inarokota iwahoro bo miwa botu zioқтыhyryknaha. Sudeutsa Piratus wahoro bo batu paku zikaha. Mynapupunaha zeka Paskoa eze Sudeutsa ba zik tahadisahanaha. Iwaze hi — Deus okzeka batu simysapy tsimykaranaha — nikaranaha. Maku Sudeutsa byitatu wahoro bo ba zikpupunaha sihumo batu simysapy maha. Paskoa myikaha batu tahadisahanaha mykaranaha. Iwatsahi Piratus wahoro bo ka batu paku zikaha.

<sup>29</sup> Iwaze Piratus sibo zoihik. Ape baze tu ispe niy:

— Amy humo sa Sesus kabo tsikzioқтыhyryknaha. Atakta sa batu imysapy tsimykaranaha — niy.

<sup>30</sup> Yhÿ nikaranaha.

— Atahi batu imysapy mytsaty tsimykaranaha. Moises harere bo batu yhÿ niy, iwatahi ikia kino ity tsipibeze tsimykaranaha — nikaranaha.

<sup>31</sup> Piratus:

— Ikihatsa zuba isoho tsimytsasokonaha. Hawa Moises harere bo batu yhÿ niy ahahyrinymyrÿtsa iwatsahi isoho tsimytsasokonaha — niy.

— Batu. Katsazuba ziky iharapatawyhyta humo ba zibezenaha. Katsaktsa iharapatawyhyta humo ba zihyryziknaha. Batu tybeze. İkia zuba tsipibeze katsaktsa batu — nikaranaha.

<sup>32</sup> Iwa nipamykysokonaha. Sesus botu nitsaso:

– Kytsa iharapatawyhyta humo pihyryzik tsihiknaha iwa pikbezenaha – niy. Sudeutsa iharere humo batu sihyrinymyry iwa Piratus bo nipamykysokonaha. Sesus harere atsatu nipamykysokonaha.

<sup>33</sup> Iwaze Piratus tawahoro bo pakuzo niy. Kytsa pe niy:

– Sesus kabo tyzioktyhyknaha – niy. Zioktyhyryknahaze ipe niy:

– Ikia hi ja Sudeutsa pehatsa – niy.

<sup>34</sup> Sesus:

– Aharere pe sa tsimykara. Mekta harere pe tu sa tsimykara – niy.

<sup>35</sup> Piratus tihi:

– Hawa ha usta mytsaty mykara motsasoko. Utakta Sudeutsa byitatu. Sudeutsa taparaktsa hi ikia kabo zaoktyhyryknaha. Hawa amysapybyita tu tsimykara. Ikia Sudeutsa pehatsa ja hawa tsimy – Piratus niy.

<sup>36</sup> Sesus:

– Hawa ikia kytsa tysipeha utakta batu. Hawa apehatsa Sesa inarokota kytsa mysipeha utakta batu. Utakta pipeha zeka ikia wata katyryktsa takyrikinaha, iwaze kasukyrytsitsa mowatsorokonaha iwaze Sudeutsa ba zikoktynaha. Katyryktsakta mekywatsa tu maha. Batu Homa tyryktsa byitsawatsa tu – niy.

<sup>37</sup> Piratus:

– Ikia hi sa ispehatsa – niy.

– Yhÿ uta hi ispehatsa. Mybarawy ezektsa bo wasania ty mysihyrynymyryky. Asahi ana ty hi

hyỹ mykaranaha zeka asahi kaharere bo kino niwatihi hyỹ mykaranaha – niy.

<sup>38</sup> – Amy sa wasape – Piratus niy.

*Kytsa tihi: – Sesus tabezekta! Iharapatawyhyta humo tabezekta! – nikaranaha.*

Iwaze nipamykysobaze Piratus tawahoro ikny zoizo. Sudeutsa pe niy:

– Atakta batu amy tohi ziky iwatahi ba zibeze – niy.

<sup>39</sup> Tubabatu tahamyikahakanahaze maku estuba myzuke ziknakara iwa sisopyk. Kytsa sizubarẽtsa sakyriukrẽnikitsa hurukwy eze tu mykaranaha. Iwaze ispe niy:

– Aty sa myzuke, Sudeutsa pehakatsa Sesus za myzuke – niy.

<sup>40</sup> – Batu ba – kazi nikaranaha.

– Atakta batu myzuke – Opykani kaziu nikaranaha.

– Bahabas tyzukekta – nikaranaha.

– Bahabas sakyriukrẽnikitsa hurukwy ezektsa tyzukehikta tsimy tawata hỹ – nikaranaha. Bahabas kytsa bakatsa niy.

## 19

<sup>1</sup> Iwaze Piratus sodadutsa pe niy:

– Sesus tytsakihiknahaktsa. Sirara hwyk tsarik-ihĩ tsizezerẽna ty tytsakinaha – niy.

Yhỹ niaha. Isukpetara buruk nitsakikinaha.

<sup>2</sup> Iwaze sodadutsa inisaha ty zitsorikeknaha. Ziky my nahaze iharek humo pu niaha. Iwa nikaranaha. Ispehatsa mekywa tu sitsorik Sesus zimyijakanaha. Isuk tsahirita ty zuba korobyk ispehatsa hyritywata nikaranaha.

<sup>3</sup> Iwaze ibo ibaba botu ipe niaha:  
 – O Sudeutsa pehatsa ja tsimy – zimyijakanaha.  
 Ziokpypykyknaha.

<sup>4</sup> Iwaze Piratus zoizo. Kytsa pe niy:  
 – Iktsa tahaktsa. Ikiahatsa boktahi myzioktyhyryk. Atakta batu amy tohi nikara batu ziky – niy.

<sup>5</sup> Iwaze Sesus puke niy. Zoize inisaha ty zit-sorikiknaha Isuk tsazirita tsizezerêta niy. Iwa kytsa sizubarêtsa bo ziooktyhyryk. Piratus ispe niy:  
 – Iktsa tahaktsa kytsa! Tah ihumo batu ahamy-pokzitsiuk – niy.

<sup>6</sup> Ibo iktsa niahaze kazi nikaranaha:  
 – Tabezekta! Iharapatawyhyta humo tabezekta! – nikaranaha.

Taparaktsa Deus wahoro eze ziknapamykysokonahatsa, Deus wahoro perytsitsa kino niwatihi opykani kazi nikaranaha.

– Tabezehikta tybezehik tsimaha – nikaranaha. Piratus tihi:

– Ikiahatsa kino kabo tsikzioktyhyryknaha. Iki-ahatsa hi tsipibezena. Atakta wasani mytsaty mykara. Iwatahi batu pibeze. Tsimysapyrêta hi batu pibeze – niy.

<sup>7</sup> – Katsa tabeze zeka wasani hÿ. Iharere batu imysapy my. “Utakta Deus tse” botu nitsasoko iwatsahi tabeze zeka wasani my. Moises harere humo wasani my – nikaranaha.

<sup>8</sup> Nitsasokonahaze:  
 – Atakta Deus tse – Piratus ana ziwabyze iharere pokso tsipybyrêta.

<sup>9</sup> Iwaze tawahoro bo pakuzo niy. Iwaze Piratus Sesus pe niy:

– Hana iknykta sa ikia – niy. Sesus batu harere.

<sup>10</sup> – Amo skaraba batu harere ziky – niy.

– Hawa motsasoko kytsa kaharere bo hyÿ mykaranaha. Mysipeha zeka kytsa pasukenaha atsipatsa warawy ty satsuk maha niy. Mysipeha zeka “Tabezekta”. Kytsa iharapatawyhyta humo pahyryziknaha iwa pabezenaha. Ana humo hi tsihyrinymyrêta – Piratus niy.

<sup>11</sup> Sesus:

– Amy ty tsimytsasoko kytsa aharere bo hyÿ mykaranaha. Aharere wasani my. Deus humo kytsa aharere bo hyÿ mykaranaha. Deus abo yhÿ ahabyi zeka aharere bo kytsa batu ma zikaha. Batu kabo tsimy. Tsiplikbezenaha zeka Deus okze ka batu amysapy tsimy. Kytsa asahi abo zikoktyhyryknaha Deus okzeka simysapybyitsa babatsa mykaranaha – niy.

<sup>12</sup> Ana ziwabykyze nizuke tsihikik. Sudeutsa taparaktsa kazi nikaranaha.

– Sesus tsimyzuke zeka Sesa pehatsa harere bo batu yhÿ tsimy, Sesa pehatsa nanabyitaba zipaha. Aparakbaha motsasokonahaze “Ikia mypehatsa”, Sesa Homa ezektsa pehatsa takyri, iwatahi Sesus tsimyzuke zeka Sesa pehatsa harere humo batu yhÿ. Tsimyzuke zeka Homa pehatsa ikia humo takyri – nikaranaha.

<sup>13</sup> Siharere ziwabyze Sesus ape bo zioқтыhyrykzo. Myzubaha bo zoizo. Iwaze Piratus kytsa harerewabykywy bo niy anaeze tadyhywy bete nidyhyky. Anaka Kabata Sudeutsa harere inarokoha.

<sup>14</sup> Tokbaha niyzikze sesta-peira eze niy. Sudeutsa myikaha nakymysohoze niy. Iwaze Piratus tihi:

– Atakta ahapehatsa – niy. Iwa Piratus Sudeutsa pe niy.

<sup>15</sup> – Batu, tabezehik nikaranaha. Ihumo tahakyrikinaha “Tabezekta” kazi nikaranaha. Iharapatawyhyta humo tabezekta! – nikaranaha.

– Ahapehatsa iharapatawyhyta humo pihyrizikik iwa pibezenaha. Iwa sa tsimyzehikiknaha – niy.

– Yhÿ. Katsa mypehatsa estuba zuba. Sesa zuba mypehatsa – nikaranaha.

<sup>16</sup> Iwatahi Piratus sodadutsa pe niy – Sesus iharapatawyhyta humo tsipibezenaha – niy. Iwaze zioқтыhyrykzonaha.

*Sodadutsa Sesus iharapatawyhyta humo zihyryziknaha iwa zibezenaha.*

<sup>17</sup> Myzubaha pauk baze hara bo zioқтыhyryknaha. Hara iharekpokoso inarokota Sudeutsa harere kokokta my. Sesus iharapatawyhyta tasukara bete zibykyryk. Hara bo zumunaha.

<sup>18</sup> Anabo izumunahaze iharapatawyhyta humo itsyhyry soik eze zihyryziknaha. Ipyrytsa humo niwatihi zihyryzikiknaha iwa niaha. Zikymynahaze iharapatawyhyta zitseknaha. Ituk makutsa petoktsa nisibanaha. Siharapatawyhytsa humo nisibanaha. Nataba natabaha.

<sup>19-20</sup> Kyze Piratus usta pe:

– Tsiwatahakta! niy. SESUS NASARE EZEKTA SUDEUTSA PEHATSA – niy. Anahi Sudeutsa harere hi ziwatahaka. Kereko harere niwatihi ziwatahaka. Ratĩ harere kino niwatihi



ziwatahaka. Ziwatahabaze iharapatawyhyta Sesus harapu bete zihyryzik. Ana parakbaha pinynaha. Iharapatawyhyta Serusarêhe pauk baze parakbaha iwataha zinykynaha. Siharere ziwatahaka – Sesus Nasare ezekta Sudeutsa pehatsa – niy.

<sup>21</sup> Iwaze taparaktsa Deus wahoro zubata eze ziknapamykysokonahatsa Piratus pe niaha:

– “Sudeutsa pehatsa” tsiwatahakanaha batu mykparawy tsimaha. Tsipiwataha zeka. “Atakta botu nitsaso Sudeutsa pehatsa niy” iwa zeka yhỹ tsimaha – niaha.

<sup>22</sup> Piratus:

– Batu. Hawa botu iwataha nahaka niwatihi – niy.

<sup>23</sup> Kyze sodadutsa Sesus iharapatawyhyta humo zihyryzikbanahaze isuk botu zibokiknahaze ziaksenaha. Jokboha zisysykyryknaha napetok napetok niaha. Estuba isuk tisapyrêta ana hi sodadutsa nizihikiknaha.

<sup>24</sup> Iwatsahi asa zuba nipamykysokonaha:

– Na ty ka syk syk byitaha! Haraharezipyryktsa tahapaparanahaktsa kytsa, aty ja isuk piakse tsahi mybo piwatawy – iwa asa zuba nipamykysokonaha. Asahi yhỹ nikaranaha. Iwaze haraharezipyryktsa nisipaparanahaze estuba zuba isuk tisapyrêta ziaксе. Tubabatu Deus harere papeu humo botu ziwataha:

– Kasuk ty metutu nikaranaha.

Estuba kasuk ty haraharezipyryktsa mysipaparanaha – niy.

Iwa tubabatu ziwatahaka, aba atsatu sodadutsa niaha.

<sup>25</sup> Iwaze kykyryk iharapatawyhyta pauk baze niriktotohokonaha Sesusje, atatsa taeky tuk. Karapas oke Maria inarokotatsa niwatihi. Maria Madarena niwatihi situk niriktohoko. Sizubarêza iharapatawyhyta pauk eze niriktotohokonaha.

<sup>26</sup> Sesus taje bo iktsa niy. Zinymyrykyta atahi Sesus ihumo tsimypokzitsiarêta atatsa baze niriktohoko. Iwaze Sesus taje pe niy:

– Atahi atse mozik. Atahi taje zipokzitsiki nahawahi papokzitsi hÿ – niy.

<sup>27</sup> Iwaze zinymyrykyta pe niy:

– O atatsa aje. Ikiã aje baba tatsa wa tsipokzitsi – iwa niy. Sesus nihyrikosokdaze zinymyrykyta Sesusje tawahoro bo zioқтыhyryk. Iwahoro eze ziknapykyryk, ije watatsa niyzik.

### *Sesus nihyrikosokda.*

<sup>28</sup> Kyze Sesus tahyrikzitsokzawy zepkybaze ana humo hi tsihyrinymyrêta. Iwaze hawa tubabatu Deus papeu humo isoho ziwatahaka, atsatu nitsasoko:

– Karapukrêta – niy.

<sup>29</sup> Anaeze duabohotsa tsik itsârãkbara ty morosuk eze ky ty tsikok niy. Kytsa mazori waha ty humo duabohotsa tsik bo tsikuk tsikuk niaha. Iwaze mazori hyritywaha ty hwi humo zitsihibunaha iwaze zidokonaha. Iparikiha sazik ty isope inarokoha. Iwaze jobo Sesus sak bo tsyk tsyk nikara.

<sup>30</sup> Iwa duabohotsa tsik itsârãkbara tu ziku. Iwaze nitsaso.

– Aba pomozaka. Kahyriziktsokzawy zipykba. Deus kape nikara naha zipykba. O Deus mohyrikosokdaze wasani my ikia kahumo tsamy-pokzitsiarêta – niy.

Iwaze taharek ty tyk bo harapusiri niy. Iwa nihyrikosokda.

*Sodadu tanora hyritywata ty ipektsa baze ziskoik.*

<sup>31</sup> Kyze taparaktsa Sudeutsa Piratus pe niaha:

– Kytsa asahi siharapatawyhytsa humo nisihyrizikiknahaze mybyrykywy pomoze ba zik sereknaha siharapatawyhytsa humo mysereknaha zeka batu isapy mytsaty tsimykanaha. Iwatahi sodadutsa pe tsimy. “Asahi siharapatawyhytsa humo tsikyrizikiknaha tyseksaharakiknaha” iwaze atsoko zikbanaha. Iwa byiri sabado siharapatawyhytsa humoktsa mahani. Sinurytsa ty mysibykyknaha mybyrykywy sabado sukmobyitu – nikaranaha. Iwa nitsasokonaha sesta-peira eze. Byiri sabado zumuze tabyrykywy Sudeutsa myikahakawy zumu. Iwatsahi asahi siharapatawyhy humoktsa nasispik tshikiknaha sabado sukmobyitu my.

<sup>32</sup> Iwatsahi sodadutsa siharapatawyhy humoktsa bo niukurunaha. Sibozumunahaze tapara estuba maku zeksaharakiknaha. Usta ty kino niwatihi zeksaharakiknaha.

<sup>33-37</sup> Iwaze Sesus bo zumunahaze. Botu zumuza.

– Atakta botu zumuza – asa zuba nipamykysokonaha. Iwatsahi batu tyektsaharak. Tubabatu Sesus soho Deus harere papeu humo ziwatahaka:

– Batu typoiktsa harak. Estuba zuba batu ty-  
poiktsa harak – niy.

Iwa tubabatu ziwatahaka. Hawa ha ty botu  
ziwatahaka atsatu sodadutsa nikaranaha. Iwaze  
sodadu tanora ty ipektsa baze ziskoik. Ziskoikze  
ispu zipoko niy. Pihik tuk tu zipoko niy. Tubabatu  
Sesus soho Deus harere papeu humo ziwatahaka:

– Kytsa iskohokta bo iktsa mykaranaha – niy.

Iwa ziwatahaka. Sodadutsa ziskoiknahaze ana  
soho humo hi batu sihyrinymyry iwatsa tu Deus  
harere bo hyÿ nikaranaha.

Utakta Sesus nihyrikosokdaze ibo iktsa iky. Ana  
hi pykyhytu iktsasoko. Wasani niy. Ikiyahatsa  
bo nihyrikosokdata soho iktsasoko iwahatu ikia-  
hatsa kino niwatihi ihumo ahaspirikporëtsa. Ana  
hi iktsasoko wasani hiba. Kahyrynymyrëta hÿ.

*Sose, Nikodemus ahatsa Sesus nury  
nitsahoroknaha.*

<sup>38</sup> Kyze Sose Arimeteja ezekta Piratus bo zumu.  
Sose Sesus humo tispirikporëta zinymyrykyta.  
Batu tyso. – Utakta Sesus harere bo hyÿ ikykara  
ihumo kaspirikporëta – Sudeutsa pokso batu tyso.  
Tsipybyrëta. Atahi Sesus zispirikpoko. Atahi Pira-  
tus pe niy:

– O Sesus nury ty uta kabokta! – niy.

– Yhÿ. Inury tynazipikta – niy. Kyze inury  
inazipikze iytyk bo zibykyknaha.

<sup>39</sup> Nikodemus Sose tuk, atahi jokmorënikia  
tsizubarëna zebykyryk. Tirïta sïko kiros  
jokmorënikia zebykyryk. Jokmorënikia mira hwi  
soporo iwaze aroes wihara soporo itsakykyha.  
Tsokmorëna. Anahi zibykyknaha. Tubabatu

Nikodemus Sesus bo nipamykysoko. Sesus atazuba tabo unata eze inakozoreze.

<sup>40</sup> Sesus nury nazipiknahaze panu ty zia-kwarakanaha. Inury bo jokmorënikia ty ziharasunaha. Iwa Sudeutsa sopykwy.

<sup>41</sup> Sesus iharapatawyhyta humo zihyrikik-naha eze hwitsa sisaziksapyrëtsa my. Anaeze iytyk ezytyk niy. Batu aty tohi humo iwihihukbara.

<sup>42</sup> Nubaze sesta-peira Sudeutsa tahadisahawy humo nikaranaha sabado sukmoboyitu nikaranaha. Sabado eze ka tahabyri nepykyryknaha. Byri ziktahabyrykynaha. Iwaze iytyk ezytyk tykarawa tu anaeze nitsahukarenaha. Sesus iytyk bo zihoekarenaha.

## 20

### *Sesus ytyk tsarawybara niapykyryk.*

<sup>1</sup> Kyze zokorobyitu Maria Madarena iytyk bo niukuru. Miwa botu domiko eze atatsa iytyk bo zumuku. Zumuze harahare ihokbowy hana bo ja, sukyhy zikare niy.

– O aty sa inury zibykyk – mytsaty nikara.

<sup>2</sup> Iwatatsahi atsoko Peduru bo ziksizo. Utakta Sesus zinymyrykyta kahumo tsimypokzitsiarëta kabo niwatihi ziksizo. Ziksizoze. Atatsa:

– Kytsa Sesus nury zibykyryknaha. Hana bo ja. Iytyk batu tsarawyky niy. Hana bo sa zebykyryknaha – niy. Iwa makutsa petoktsa bo nitsasoko.

<sup>3</sup> Iwaze Peduru itukta iwa atsoko iytyk bo nitururuknaha.

<sup>4</sup> Petoktsa iytyk bo nitururuknaha. Uta hi Peduru haraze ikpapakak. Tapara iytyk bo ikumu.

<sup>5</sup> Ikumuze iytyk bo iktsa iky, okmymy ikyze panu iakwarawy zuba nizozohoko ana bo zuba iktsa iky. Utakta batu paku.

<sup>6</sup> Iwaze Simaõ Peduru iytyk bo zumuze. Atsoko iytyk bo zekeba. Panu bo iktsa niy.

<sup>7</sup> Usa panu bo iktsa niy. Panu nihyrikosokdata iharekwarawy bo iktsa niy. Usa panu ka meky botu niapykyryk. Inury ykwarawy ka bara botu niapykyryk. Inury hana bo ja niy.

<sup>8</sup> Utakta tapara iytyk bo ikumu. Iwaze uta kino niwatihi iktsuk. Ikozoze:

– Inury hana bo ja Sesus inahyrizikpo – atatuke iky. Iwatahi Sesus humo kaspirikporêta.

<sup>9</sup> Tubabatu Deus harere papeu humo botu ziwatahaka:

– Sesus siakbatsa tukze Deus zihyrizikpowy – niy. Zinymyrykynahatsa anaharere humo tsihokdaharêna niy.

<sup>10</sup> Kyze katsa zinymyrykynahatsa bo tsiksizonaha.

### *Sesus Maria Madarena bo natahaha.*

<sup>11</sup> Kyze Maria Madarena iytyk bo niukuruzo. Atatsa iytyk baze nipuziuku. Nipuziukutatsa tu iytyk bo ziktsutsu niy.

<sup>12</sup> Bijoikpe iknyktsa Deus tsumuêhĩtsa petoktsa bo iktsa niy. Sisukbarazarêtsa. Sesus nury sapy eze nidyhydyhykynaha. Estuba iharek sapy taba nidyhyky. Usta ipyrytsa sapy taba nidyhyky.

<sup>13</sup> Ipe niaha:

– Amo skaraba tsimopuziuku – niaha. – Kapehatsa nihyrikosokdata nury zibykyknaha. Hana bo ja zibykyknaha – niy. Iwatatsahi pipokzitsiki.

<sup>14</sup> Iwa nitsasokoze tasukpe bo uwok niy. Sesus ibaze niriktohoko. Ibo iktsa niy. Ihyritsik humo inyhybyitawa nio. Sesus batu inyhy.

<sup>15</sup> Atahi ipe niy:

– Amo skaraba tsimopuziuku. Aty sa tsipiberiki – niy. Atatsa kino isazikperytza ja niy. Iwatatsahi ipe niy:

– O aty sa zibykyk tsibykyryk zeka ikza kabo ky. Ikza mekybotu piytykzo – niy.

<sup>16</sup> – O Maria – niy.

Iwaze zinyziu.

– Raboni – niy. Sudeutsa harere ka. – Kapokz-itsitsa – piwatawyky.

<sup>17</sup> Sesus ipe niy:

– Katy paik paik byityktsa! Kazo bo ka batu kado. Katuktsa bo tynakozorektsa! “Sesus jobo modo. Kazo bo modo.” Kazo Deus ikiahatsa kino niwatihi ahazo Deus tihi “Myzo Deus”. Iwa katuktsa bo tsimy – niy.

Yhỹ niy.

<sup>18</sup> Iwaze Maria Madarena niparak. Zinymyrykynahatsa bo zumuze ispe niy:

– O Sesus iny. Inahyritzikpo. Abahi jo bo Deus bo modo. Ata hi ipokzitsihi. Katsa kino niwatihi Deus myhumo tsimypokzitsiukrêta – niy.

*Sesus tuk zinymyrykynahatsa bo natahaha.*

<sup>19</sup> Zunubakaze Sesus tatuktsa bo. Domiko eze sibo zumu. Asahi wahoro bo inakypykbanahaze. Tahahokbowy zitsykykiknaha. Sudeutsa taparaktsa pokso sipybyrêtsa nikaranaha. Iwaze Sesus sibo natahaha ispe niy:

– Ahapybybyihuktsa. Ahapunihikuktsa kytsa! – niy.

<sup>20</sup> Tapapepe humo ky ziwatawyky. Tapek-  
tsa humo ky ziwatawyky. Zinymyrykynahatsa  
sakurëtsa nikaranaha. Tahapehakatsa bo niko-  
zonahaze sakurëtsa niyziknaha.

<sup>21</sup> Ispezo niy:

– Ahapunihikuktsa ahapyby byihu ja kytsa!  
Tapara kazo mybarawy ezektsa bo zikpeha. Uta  
kino niwatihi, utakta myzahapehaka. Myzubaha  
bo kasoho tsimytsasonaha iwatahi myzahape-  
haka – niy.

<sup>22</sup> Iwaze Sesus sibo huhu nikara. Ispe niy:

– Deus hyrikoso ikiahatsa tuk mynapykyryk.

<sup>23</sup> Tsimytsasonaha zeka sizubarëtsa  
pe: “Ahamysapybyri Deus pahaokzohik”  
tsimykaranaha. Deus simysapybyri siokzohik.  
Tsimytsasonaha zeka kytsa pe: “Deus  
ahamysapybyri batu pahaokzo” tsimykaranaha.  
Deus simysapybyri ba ziksiokzo. Deus  
simysapybyitsa tu ba zikspiriktsokda my – niy.

### *Sesus Tome iwa.*

<sup>24</sup> Iwaze zinymyrykyta Tome inarokota niy.  
Usta inarokota beketsa niy. Atahi Sesus batu  
inyhy. Sesus zinymyrykynahatsa bo izumuze  
Tome batu situk dyhy niy. Sesus inahyrikpoze  
Tome batu inyhy.

<sup>25</sup> Iwatsahi ustsã ipe niy:

– O Tome katsaktsa mypehakatsa tsinynaha –  
niaha.

– Batu ma. Ipapepehyrizikwy sapy bo katsy-  
hyry ty kuruk ahabyizeka ba ma ziky. Nataba  
tanora sapy bo katsyhyry ty kuruk ahabyizeka ba  
ma ziky – iwa ustsã zinymyrykynahatsa bo Tome  
nitsaso.



<sup>26</sup> Kyze mytsyhyrytsa wa zuruze Sesus tuktsa wahoro bo izumubazonaha. Tome situkniapykyryk. Wahoro tahahokbowy zitsykykiknaha. Atsoko Sesus sibo natakaha. Sesus zinymyrykynahatsa pe:

– Ahapunihiktsa kytsa. Ahapybybyihuktsa! – niy.

<sup>27</sup> Iwaze Tome pe niy:

– Pany! Katsyhyrype bo iktsa tykta. Na katsyhyrype hyrizikwy sapy bo atsyhyry ty kuruktykta. Na kaskowy tanora sapy bo atsyhyry ty kuruktykta. “Sesus nihyrikosokdata ba ziknahyryzikpo” ana ty hi sosobyity tsimy. Kahumo aspirikpokta! – niy.

<sup>28</sup> Tome:

– Ikia kino kapehatsa tsimy. Ikia humo kaspirikporêta hÿ. Ikia hi Deus babata – niy.

<sup>29</sup> Sesus ipe niy:

– Tsikny taowy kahumo aspirikporêta. Wasani my. Utsa kytsa katy nyahabyitsatu kahumo sispirikporêtsa. Asa hi sakurêtsa babatsa – niy.

### *Abaka pepykbaka.*

<sup>30</sup> Sesus tazikwy ziwatawyky. Zinymyrykynahatsa izikwy bo iktsa nikaranaha. Izororohotsa bo iktsa nikaranaha. Anasoho ba ziwataha. Papeu humo sisoho ty batu tywataha.

<sup>31</sup> Hawa Sesus zikwy zororotsa soho tsikaeni zuba ziwatahaka. Anasoho ziwatahaka iwatahi pahaspirikpoko Sesus Deus tse. Deus Sesus zipehata pahaspirikpoko. Ana humo hi ahaspirikporêtsa zeka mekywatsa tu tsimoziknaha. Ihumo ahamysapyrêtsa tsimoziknaha. Ihumo ahaspirikporêtsa zeka

tsimyhyrikosokdanahaze tsinahyrizikponaha.  
Iwaze Deus tuk ahawahi tsimynapykyryknaha.

## 21

*Sesus sete zinymyrykynahatsa bo natakaha.*

<sup>1</sup> Kyze Sesus tuk zinymyrykynahatsa bo inatakahazo. Pihikzotsabyri baze sibo izumu. Pihikzotsabyri Tiberiades inarokoha. Anaeze sete ahatsa ituktsa zitsikpaparakanaha.

<sup>2</sup> Peduru, Tome, Natanieu, Suão, Tsiaku, ustsá petoktsa iwatsa situk nikaranaha.

<sup>3</sup> Peduru ispe niy:

– Pihik pitsikpapara – niy.

– Yhỹ! Katsa ikia hapik – niaha. Haramwe zunubakaze kokorohyk. Turi turi turi niaha. Zitsikpaparakanaha. Batu istyzo.

<sup>4</sup> Kyze zokorobyitu Sesus pihik sak eze nirikto-hoko. Tsaraha bytykarawa tu niy, Sesus pihik sak eze niriktohoko. Zinymyrykynahatsa nikozone-haze:

– O aty skaraba.

O batu mynyhy – nikaranaha.

<sup>5</sup> Iwaze Sesus huahua niy:

– Tsiknasizokonaha sa kytsa! – niy.

Batu niaha.

<sup>6</sup> – Tõhõryk ty natába tsioktsokzonahaktsa! Abaka tsinasizonaha ty – niy.

Iwaze tõhõryk zióktsoknaha. Abaka tõhõryk piknutsa tsakyrik humo, ba zikzizonaha.

<sup>7</sup> Iwaze uta inymyrykyta Sesus kahumo tsimypokzitsiarêta Peduru pe iky:

– O mypehakatsa Sesus – iky. Peduru ziwabyta takpyzazawy ty korobyk niy. Tahyriziktsokzawy

humo awani nikarata iwaze takpyzazawy zikoboykze pihik bo nioktsok. Sesus bo atsoko uruk uruk nikara.

<sup>8</sup> Ustsaktsa mahani. Tõhõryk zikyrikinaha. Tisakyrikrẽna. Tsaraha imyrazata bytykara wata nowẽta meteros zuba niy. Nakpo bybybyu niaha. Tahatsaraha piknutsa ty nasihareknaha.

<sup>9</sup> Nakpo tsaraha ekze nizuknahaze izo bo nikozonaha. Sesus izo bete piknutsa nisizoko sizubabyitsa tu. Atsikara niwatihi.

<sup>10</sup> Sesus tihi:

— O piknutsa ty puẽtsik kabo wabehyryk tynaha — niy.

Yhỹ Peduru niy.

<sup>11</sup> Iwaze Peduru tsaraha bo takoro, piknutsa tõhõryk eze inasikyriki:

— O inahareknaha — niy. Piknutsa sizubarẽtsa nasizokonaha. Sẽto sũkuẽta teres piknutsa sizubarẽtsa nikaranaha. Inahareknahatsa tu tõhõryk batu tuzu.

<sup>12</sup> Sesus:

— Parany! tyzahadisahanaha kytsa! — niy.

Yhỹ niaha. Zinymyrykynahatsa batu — Aty sa — niaha.

<sup>13</sup> Mynyhy tihi Sesus atsikara ty sibo nyny niy. Piknutsa ty kino niwatihi. Tahadisahakanaha.

<sup>14</sup> Abaka Sesus tuk zinymyrykynahatsa bo harakykbyi inahyryzikpota inatakaha.

*Sesus Peduru ahatsa.*

<sup>15</sup> Kyze Sesus Simaõ Peduru pe niy, atahi Suão tse iwaze Sesus ipe niy:

— Simaõ ikia sa kahumo tsamypokzitsiarẽta — niy.

– Yhÿ. Uta atukta babata my – niy.

– Kaharere ty katuktsa tysihyrinomyrykta. Hawa hozipyrykzatsa tsihitsa siraratsa tysipokzitsiki iwa ikia katuktsa humo tynasipokzitsiki.

<sup>16</sup> Sesus ipe niyzo:

– Simaõ kahumo sa tsamypokzitsiarêta babata tsimy – niy.

– Yhÿ utakta atukta babata my – niy.

– Kaharere katukytsa bo tysihyrinomyrykta! Hawa hozipyrykzatsa tsihitsa siraratsa tysipokzitsiki iwa katukytsa humo tysipokzitsi – niy.

<sup>17</sup> Sesus ipe niyzo:

– Simaõ ikia sa kahumo tsamypokzitsiarêta babata tsimy – niy.

Iwaze Sesus nitsasokoze – Iki sa kahumo tsamypokzitsiarêta – atsa tyty harakykbyi Peduru pe niyze tisukatsihikrêta niyzik. Peduru:

– O kapehakatsa tsahyrinomyrêta hiza. Ikiakta tsiknyba hÿ. Utakta ahumo kamypokzitsiarêta. Ana humo hi ahyrinomyrêta – niy. Sesus:

– Kaharere ty za katukytsa tysihyrinomyrykta! Hawa hozipyrykzatsa tsihitsa siraratsa tysipokzitsiki iwa katukytsa humo hi tysipokzitsiki hÿ.

<sup>18</sup> Wabyziutykta. Simaõ mykyryburukta zikzurukuze asuk ty korobykyk ziknakaraze paikpa ziknakara hÿ. Iki tsimytsaikbaze usta atsipatsa mysakwara. Akparawy bara bo paoktyhyryknaha – niy.

<sup>19</sup> Iwa Peduru pe niy. Peduru mora naha soho nitsasoko. Ipe niy:

– Tsimyhyrikosokdaze kytsa sizubarêtsa mot-sasokonaha “Deus hi Peduru zipunihikwyky hÿ.

Iwatahi mohyrikosokdaze batu ipyby. Deus imys-apyrêta hỹ” mykaranaha – niy. Hawa Peduru mohyrikosokda naha soho botu ibo nitsasoko.

Iwaze ipe niyzo:

– Kaharere bo hyỹ tsimykta! Kapik tynao – niy.

*Hawa Sesus kasoho nitsasoko.*

<sup>20</sup> Kyze Peduru uwok niyze kabo iktsa niy. Utakta zinymyrykyta Sesus kahumo tsimypokz-itsiarêta. Uta Peduru sukpe baze ikziktohoko. Tapara Sesus nihyrikosokda katsa ituk amyikaha eze tuze uta zuba ipe iky:

– Aty skaraba asukyrytsitsa bo paoktyhyryk – ikykara. Aba Peduru kabo iktsa niyze ta tihi:

<sup>21</sup> – Hawa sa ipe tsimy – niy.

<sup>22</sup> Sesus:

– Batu ityso. “Hawa sa ipe tsimy”. “Uta sa Deus harere bo zuba yhỹ my” tsimy. Iwa tsimy hỹ – niy. – Utakta motsasoko zeka “Atakta ba zikyrikosokda, atahi myziksizoze motare”. Wasani my. Ikia kino kaharere bo zuba hyỹ tsimykara. Utsa soho bo batu paikpa mytsaty tsimykara. Kaharere bo zuba hyỹ tsimykara. Ikia humo wasani tsimyzeke kaharere bo zuba hyỹ tsimykara.

<sup>23</sup> Kyze Sesus tuktsa asa zuba nipamykysokonaha:

– Atakta ba zikyrikosokda, Sesus myziksizoze ispitu my – nikaranaha.

Iwa Sesus batu tyso. – “Atakta ba zikyrikosokda” tapara nitsaso “motsaso zeka atakta ba zikyrikosokda atahi myziksizoze motare” – iwa nitsaso. Batu siwabyziuhu.

<sup>24</sup> Zinymyrykyta Sesus kahumo tsimypokzitsiarẽta piwatahaka. Hawa ha ty piwatahaka naha wasani my. Utakta Sesus harere ahabo mot-sasoko.

*Abaka nepyk.*

<sup>25</sup> Sesus tsizubarẽna ty nikara. Iokboha zuba papeu humo ziwataha. Nanabyi soho ziwataha zeka abazuba papeu humo ba zikpyk. Ziwatahaba zeka papeu zikpykba. Niwazuba. Suão.

# **Deus Harere Aibaky Sesus mymyspirikpoko naha**

## **New Testament in Rikbaktsa (BR:rkb:Rikbaktsa)**

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Rikbaktsa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

2f0260ea-5969-5180-9ac5-183d63a989f1